

नमो नमो निम्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

२

सूयगडो- बीडअं अंगसुत्तं

मुनि दीपरत्नसागर

Date : / / 2012

Jain Agam Online Series-2

२ गंथाणुककमो

◦ पढमो सुयक्खंधो ◦

कमंको	अज्झयणं	उद्देसक	सुत्तं	गाहा	अणुककमो	पिड्ढंको
१	समए	१-४	-	१-८८	१-८८	२
२	वेयालिए	१-३	-	८९-१६४	-१६४	७
३	उवसग्ग परिण्णा	१-४	-	१६५-२४६	-२४६	१२
४	इत्थिपरिण्णा	१-२	-	२४७-२९९	-२९९	१७
५	नरयविभत्ती	१-२	-	३००-३५१	-३५१	२१
६	महावीरत्थुइ	-	-	३५२-३८०	-३८०	२४
७	कुसीलपरिभाषितं	-	-	३८१-४१०	-४१०	२६
८	वीरियं	-	-	४११-४३६	-४३६	२८
९	धम्मो	-	-	४३७-४७२	-४७२	२९
१०	समाही	-	-	४७३-४९६	-४९६	३२
११	मग्गे	-	-	४९७-५३४	-५३४	३३
१२	समोसरणं	-	-	५३५-५५६	-५५६	३५
१३	आहत्तहीयं	-	-	५५७-५७९	-५७९	३७
१४	गंथो	-	-	५८०-६०६	-६०६	३८
१५	जमईए	-	-	६०७-६३१	-६३१	४०
१६	गाहा	-	१	-	-६३२	४१

◦ बीओ सुयक्खंधो ◦

कमंको	अज्झयणं	उद्देसक	सुत्तं	गाहा	अणुककमो	पिड्ढंको
१	पौंडरीए	-	२-१६	-	६३३-६४७	४२
२	किरियाठाणे	-	१७-४३	-	-६७४	५१
३	आहार परिण्णा	-	४४-६३	६३२-६३५	-६९९	६३
४	पच्चक्खाण किरिया	-	६४-६८	-	-७०४	६८
५	आयारसुयं	-	-	६३६-६६८	-७३७	७१
६	अद्दइज्जं	-	-	६६९-७२३	-७९२	७३
७	नालंदइज्जं	-	६९-८२	-	७९३-८०६	७७

२

सूयगडो-बीइअं अंगसुत्तं

०-पढमो सुयक्खंधो-०

० पढमं अज्झयणं - समए ०

० पढमो उद्देशो ०

- [१] बुज्झैज्ज तिउट्टेज्जा, बंधणं परिजाणिया ।
किमाह बंधणं वीरो, किं वा जाणं तिउट्टइ ? ॥
- [२] चित्तमंतमचित्तं वा, परिगिज्झ किसामवि ।
अन्नं वा अनुजाणाइ, एवं दुक्खा न मुच्चइ ॥
- [३] सयं तिवातए पाणे, अदुवा अन्नेहिं घायए ।
हणंतं वाऽनुजाणाइ, वेरं वड्ढइ अप्पणो ॥
- [४] जस्सिं कुले समुप्पन्ने, जेहिं वा संवसे नरे ।
ममाती लुप्पती बाले, अन्नमन्नेहिं मुच्छिए ॥
- [५] वित्तं सोयरिया चेव, सव्वमेयं न ताणइ ।
संखाए जीवितं चेवं, कम्म,णा उ तिउट्टइ ॥
- [६] एए गंधे विउक्कम्म, एगे समण माहणा ।
अयाणंता विउस्सिता, सत्ता कामेहिं माणवा ॥
- [७] संति पंचं महब्भूया, इहमेगेसिमाहिया ।
पुढवी आउ तेऊ वा, वाऊ आगास पंचमा ॥
- [८] एए पंच महब्भूया, तेब्भो एगो त्ति आहिया ।
अह तेसिं विनासे उ, विनासो होइ देहिनो ॥
- [९] जहा य पुढवीथूभे, एगे नाणा हि दीसइ ।
एवं भो ! कसिणे लोए, विण्णू नाणाहिं दीसए ॥
- [१०] एवमेगे त्ति जप्पंति, मंदा आरंभ निस्सिया ।
एगे किच्चा सयं पावं, तिव्वं दुक्खं नियच्छइ ॥
- [११] पत्तेयं कसिणे आया, जे बाला जे य पंडिया ।
संति पेच्चा न ते संति, नत्थि सत्तोववाइया ॥
- [१२] नत्थि पुन्ने व पावे वा, नत्थि लोए इओऽवरे ।
सरीरस्स विनासेणं विनासो होइ देहिनो ॥
- [१३] कुव्वं च कारयं चेव, सव्वं कुव्वं न विज्जइ ।
एवं अकारओ अप्पा, एवं ते उ पगब्भिया ॥

- [१४] जे ते उ वाइणो एवं, लोए तेसिं कओ सिया? ।
तमाओ ते तमं जंति, मंदा आरंभ निस्सिया ॥
- [१५] संति पंच महब्भूया, इहमेगेसिं आहिया ।
आयच्छट्ठो पुणो आहु, आया लोगे य सासए ॥
- [१६] दुहओ ते न विणस्संति, नो य उप्पज्जए असं ।
सव्वेऽवि सव्वहा भावा, नियत्तीभावमागया ॥
- [१७] पंच खंधे वयंतेगे, बाला उ खणजोइणो ।
अन्नो अन्नो नेवाहु, हेउयं च अहेउयं ॥
- [१८] पुढवी आऊ तेऊ य, तहा वाऊ य एगओ ।
चत्तारि धाउणो रूवं, एवमाहंसु जाणगा ॥
- [१९] अगारमावसंता वि, अरण्णा वा वि पव्वया ।
इमं दरिसणमावण्णा, सव्वदुक्खा विमुच्चति ॥
- [२०] ते नावि संधिं नच्चाणं, न ते धम्मविऊ जना ।
जे ते उ वाइणो एवं, न ते ओहंतराऽऽहिया ॥
- [२१] ते नावि संधिं नच्चाणं, न ते धम्मविऊ जना ।
जे ते उ वाइणो एवं, न ते संसारपारगा ॥
- [२२] ते नावि संधिं नच्चाणं, न ते धम्मविऊ जना ।
जे ते उ वाइणो एवं, न ते गब्भस्स पारगा ॥
- [२३] ते नावि संधिं नच्चाणं, न ते धम्मविऊ जना ।
जे ते उ वाइणो एवं, न ते जम्मस्स पारगा ॥
- [२४] ते नावि संधिं नच्चाणं, न ते धम्मविऊ जना ।
जे ते उ वाइणो एवं, न ते दुक्खस्स पारगा ॥
- [२५] ते नावि संधिं नच्चाणं, न ते धम्मविऊ जना ।
जे ते उ वाइणो एवं, न ते मारस्स पारगा ॥
- [२६] नानाविहाइं दुक्खाइं, अनुहवंति पुणो पुणो ।
संसारचक्कवालंमि, वाहिमच्चुजराकुले ॥
- [२७] उच्चावयाणि गच्छंता, गब्भमेस्सं ति नंतसो ।
नायपुत्ते महावीरे, एवमाह जिनोत्तमे ॥ त्ति बेमि

॥

◦ पढमे अज्झयणे पढमो उद्देशो समत्तो ◦

◦ बीओ उद्देशो ◦

- [२८] आधायं पुण एगेसिं, उववन्ना पुढो जिया ।
वेदयंति सुहं दुक्खं, अदुवा लुप्पंति ठाणओ ॥

[२९] न तं सयं कडं दुक्खं, न य अन्नकडं च णं ।
सुयक्खंधो-१, अज्झयणं-१, उद्देशो-२

- सुहं वा जइ वा दुक्खं, सेहियं वा असेहियं ॥
[३०] न सयं कडं न अन्नेहिं, वेदयंति पुढो जिया ।
संगइयं तं तहा तेसिं, इहमेगेसिं आहियं ॥
[३१] एवमेयाणि जंपंता, बाला पंडियमानिनो ।
निययानिययं संतं, अयाणंता अबुद्धिया ॥
[३२] एवमेगे उ पासत्था, ते भुज्जो विप्पगब्भिया ।
एवं उवट्टिया संता, न ते दुक्खविमोक्खया ॥
[३३] जविणो मिगा जहा संता, परिताणेण वज्जिया ।
असंकियाइं संकंति, संकियाइं असंकिणो ॥
[३४] परिताणियाणि संकंता, पासिताणि असंकिणो ।
अन्नाणभयसंविग्गा, संपलित्ति तहिं तहिं ॥
[३५] अह तं पवेज्ज बज्झं अहे बज्झस्स वा वए ।
मुच्चेज्ज पयपासाओ, तं तु मंदे ण देहए ॥
[३६] अहियप्पाऽहियपण्णाणे, विसमंतेनुवागए ।
से बद्धे पयपासाइं, तत्थ घायं नियच्छइ ॥
[३७] एवं तु समणा एगे, मिच्छादिट्ठी अनारिया ।
असंकियाइं संकंति, संकियाइं असंकिणो ॥
[३८] धम्मपन्नवणा जा सा, तं तु संकंति मूढगा ।
आरंभाइं न संकंति, अवियत्ता अकोविया ॥
[३९] सव्वप्पगं विउक्कस्सं, सव्वं नूमं विहूणिया ।
अप्पत्तियं अकम्मंसे, एयमट्ठं मिगे चुए ॥
[४०] जे एयं नाभिजाणंति, मिच्छादिट्ठी अनारिया ।
मिगा वा पासबद्धा ते घायमेसंति नंतसो ॥
[४१] माहणा समणा एगे, सव्वे नाणं सयं वए ।
सव्वलोगेऽवि जे पाणा, न ते जाणंति किंचण ॥
[४२] मिलक्खू अमिलक्खुस्स, जहा वुत्ताणुभासए ।
न हेउं से वियाणाइ, भासियं तऽनुभासए ॥
[४३] एवमन्नाणिया नाणं, वयंता वि सयं सयं ।
निच्छयत्थं न जाणंति, मिलक्खूव्व अबोहिया ॥
[४४] अन्नाणियाणं वीमंसा, अन्नाणेण नियच्छइ ।
अप्पणो य परं नालं, कुतो अन्नाणुसासिउं? ॥
[४५] वने मूढे जहा जंतू, मूढे नेयानुगामिए ।
दो वि एए अकोविया, तिव्वं सोयं नियच्छई ॥

[४६] अंधो अंधं पंहं नितो दूरमद्धानुगच्छई ।
सुयक्खंधो-१, अज्झयणं-१, उद्देसो-२

- आवज्जे उप्पहं जंतू, अदुवा पंथानुगामिए ॥
[४७] एवमेगे नियागट्ठी, धम्ममाराहगा वयं ।
अदुवा अहम्ममावज्जे, न ते सव्वज्जुयं वए ॥
[४८] एवमेगे वियक्काहिं नो अन्नं पज्जुवासिया ।
अप्पणो य वियक्काहिं, अयमंजूहिं दुम्मई ॥
[४९] एवं तक्काए साहेता, धम्माधम्मे अकोविया ।
दुक्खं ते नाइतुट्ठंति, सउणी पंजरं जहा ॥
[५०] सयं सयं पसंसंता, गरहंता परं वयं ।
जे उ तत्थ विउस्संति, संसारं ते विउस्सिया ॥
[५१] अहावरं पुरक्खायं, किरियावाइदरिसणं ।
कम्मचिंतापणट्ठाणं, संसारस्स पवड्ढणं ॥
[५२] जाणं काएणऽनाउट्ठी, अबुहो जं च हिंसइ ।
पुट्ठो संवेदेइ परं, अवियत्तं खु सावज्जं ॥
[५३] संतिमे तओ आयाणा, जेहिं कीरइ पावगं ।
अभिकम्मा य पेसा य, मनसा अनुजाणिया ॥
[५४] एए उ तओ आयाणा, जेहिं कीरइ पावगं ।
एवं भावविसोहीए, निव्वाणमभिगच्छइ ॥
[५५] पुत्तं पिता समारंभ, आहारज्जे असंजए ।
भुंजमाणो वि मेहावी, कम्मणा नोवलिप्पते ॥
[५६] मनसा जे पउस्संति, चित्तं तेसिं न विज्जइ ।
अनवज्जं अतहं तेसिं, न ते संवुडचारिणो ॥
[५७] इच्चेयाहि य दिट्ठीहिं, सायागारवनिस्सिया ।
सरणं ति मन्नमाणा, सेवंती पावगं जना ॥
[५८] जहा अस्साविणिं नावं, जाइअंधो दुरूहिया ।
इच्छई पारमागतुं, अंतरा य विसीयई ॥
[५९] एवं तु समणा एगे, मिच्छादिट्ठी अनारिया ।
संसारपारकंखी ते, संसारं अनुपरियट्ठंति ॥ त्ति बेमि ॥

◦ पढमे अज्झयणे बीओ उद्देसो समत्तो ◦

◦ तइओ उद्देसो ◦

- [६०] जं किंचि वि पूइकडं, सइढी मागतु मीहियं ।
सहस्संतरियं भुंजे, दुपक्खं चेव सेवई ॥
[६१] तमेव अवियाणंता, विसमंसि अकोविया ।

- [६२] उदगस्स पभावेणं, सुक्कंमि घातमंति उ ।
ढंकेहि य कंकेहि य, आमिसत्थेहिं ते दुही ॥
- [६३] एवं तु समणा एगे, वट्टमाण सुहेसिणो ।
मच्छा वेसालिया चेव, घायमेस्संति नंतसो ॥
- [६४] इणमन्नं तु अन्नाणं, इहमेगेसिं आहियं ।
देवउत्ते अयं लोए, बंभउत्ते त्ति आवरे ॥
- [६५] ईसरेण कडे लोए, पहाणाइ तहावरे ।
जीवाजीवसमाउत्ते, सुहदुक्खसमन्निए ॥
- [६६] सयंभुणा कडे लोए, इति वुत्तं महेसिणा ।
मारेण संथुया माया, तेण लोए असासए ॥
- [६७] माहणा समणा एगे, आह अंडकडे जगे ।
असो तत्तमकासी य, अयाणंता मुसं वए ॥
- [६८] सएहिं परियाएहिं, लोगं बूया कडे त्ति य ।
तत्तं ते न वियाणंति, न विनासी कयाइ वि ॥
- [६९] अमणुन्न समुप्पायं, दुक्खमेव विजाणिया ।
समुप्पायमजाणंता, कहां नाहिंति संवरं? ॥
- [७०] सुद्धे अपावए आया, इहमेगेसिं आहियं ।
पुणो कीइडापदोसेणं, से तत्थ अवरज्झई ॥
- [७१] इह संवुडे मुनी जाए, पच्छा होइ अपावए ।
वियडंबु जहा भुज्जो, नीरयं सरयं तहा ॥
- [७२] एयाणुवीइ मेहावी, बंभचेरेण ते वसे ।
पुढो पावाउया सव्वे, अक्खायारो सयं सयं ॥
- [७३] सए सए उवट्टाणे, सिद्धिमेव न अन्नहा ।
अहो इहेव वसवत्ती, सव्वकामसमप्पिए ॥
- [७४] सिद्धा य ते अरोगा य, इहमेगेसिं आहियं ।
सिद्धिमेव पुरो काउं सासए गढिया नरा ॥
- [७५] असंवुडा अनादीयं भमिहिंति पुणो-पुणो ।
कप्पकालमुवज्जंति, ठाणा आसुरकिब्बिसिया ॥ त्ति बेमि ॥
- पढमे अज्झयणे तइओ उद्देसो समत्तो ◦

◦ चउत्थो उद्देसो ◦

- [७६] एते जिया भो ! न सरणं, बाला पंडियमानिनो ।
हिच्चा णं पुव्वसंजोगं, सिया किच्चोवएसगा ॥

[७७] तं च भिक्खू परिण्णाय विज्जं तेसु णं मुच्छए ।
सुयक्खंधो-१, अज्झयणं-१, उद्देसो-४

- अणुक्कस्से अप्पलीणे, मज्झेण मुनि जावए ॥
[७८] सपरिग्गहा य सारंभा, इहमेगेसिं आहियं ।
अपरिग्गहे अनारंभा, भिक्खू ताणं परिव्वए ॥
[७९] कडेसु घासमेसेज्जा, विऊ दत्तेसणं चरे ।
अगिद्धो विप्पमुक्को य, ओमाणं परिवज्जए ॥
[८०] लोगवायं निसामेज्जा, इहमेगेसिं आहियं ।
विवरीयपन्नसंभूयं, अन्नवुत्तं तयाणुयं ॥
[८१] अनंते नितिए लोए, सासए न विनस्सती ।
अंतवं नितिए लोए, इइ धीरोऽतिपासई ॥
[८२] अपरिमाणं वियाणाइ, इहमेगेसिं आहियं ।
सव्वत्थ सपरिमाणं, इइ धीरोऽतिपासई ॥
[८३] जे केइ तसा पाणा, चिइंति अदु थावरा ।
परियाए अत्थि से अंजू, जेण ते तसथावरा ॥
[८४] उरालं जगतो जोगं, विवज्जासं पलेति य ।
सव्वे अकंतदुक्खा य, अओ सव्वे अहिंसिता ॥
[८५] एयं खु नाणिणो सारं, जं न हिंसइ कंचन ।
अहिंसा समयं चेव, एयावंतं वियाणिया ॥
[८६] वुसिते विगयगेहि य, आयाणं संपरक्खए ।
चरियासण सेज्जासु, भत्तपाने य अंतसो ॥
[८७] एतेहिं तिहिं ठाणेहिं, संजए सययं मुनी ।
उक्कसं जलणं नूमं, मज्झत्थं च विगिंचए ॥
[८८] समिए तु सया साहू, पंचसवरं संवुडे ।
सितेहिं असिते भिक्खू, आमोक्खाए परिव्वएज्जासि ॥ त्ति बेमि ॥

◦ पढमे अज्झयणे चउत्थो उद्देसो सम्मत्तो ◦

मुनि दीपरत्नसागरेण संशोधितः सम्पादितश्च “पढमं अज्झयणं सम्मत्तं”

० बीअं अज्झयणं - वेयालिए ०

◦ पढमो उद्देसो ◦

- [८९] संबुज्झह किं न बुज्झहा ?, संबोही खलु पेच्च दुल्लहा ।
नो ह्वणमंति राइओ, नो सुलभं पुनरावि जीवियं ॥
[९०] उहरा वुड्ढा य पासह, गब्भत्था वि चयंति मानवा ।
सेणे जह वट्टयं हरे, एवं आउखयंमि तुट्टई ॥
[९१] मायाहिं पियाहिं लुप्पई, नो सुलहा सुगई य पेच्चओ ।

- [९२] जमिणं जगई पुढो जगा, कम्महेहिं लुप्पंति पाणिणो ।
सयमेव कडेहिं गाहई, नो तस्स मुच्चेज्जसुपुड्वं ॥
- [९३] देवा गंधव्वरक्खसा, असुरा भूमिचरा सरीसिवा ।
रायनर सेट्ठि माहणा, ठाणा तेऽवि चयंति दुक्खिया ॥
- [९४] कामेहिं न संथवेहि गिद्धा, कम्मसहा कालेण जंतवो ।
ताले जह बंधनच्चुए, एवं आउक्खयंमि तुट्टई ॥
- [९५] जे यावि बहुस्सुए सिया, धम्मिए माहणे भिक्खुए सिया ।
अभिन्मकडेहिं मुच्छिए, तिव्वं से कम्महेहिं किच्चती ॥
- [९६] अह पास विवेगमुट्ठिए, अवितिण्णे इह भासई धुवं ।
नाहिसि आरं कओ परं ?, वेहासे कम्महेहिं किच्चई ॥
- [९७] जइ वि य निगिणे किसे चरे, जइ वि य भुंजिय मासमंतसो ।
जे इह मायादि मिज्जई, आगंता गब्भाय नंतसो ॥
- [९८] पुरिसोरम पावकम्मणा, पलियंतं मनुयाण जीवियं ।
सण्णा इह काममुच्छिया, मोहं जंति नरा असंवुडा ॥
- [९९] जययं विहराहि जोगवं, अनुपाणा पंथा दुरुत्तरा ।
अनुसासणमेव पक्कमे, वीरेहिं सम्मं पवेइयं ॥
- [१००] विरया वीरा समुट्ठिया, कोहकायरियाइ पीसणा ।
पाणे न हणंति सव्वसो, पावाओ विरयाऽभिनिव्वुडा ॥
- [१०१] न वि ता अहमेव लुप्पए, लुप्पंती लोगंसि पाणिणो ।
एवं सहिएहिं पासए, अनिहे से पुट्ठे अहियासए ॥
- [१०२] धुणिया कुलियं व लेववं, किसए देहमनासना इह ।
अविहिंसामेव पव्वए, अनुधम्मे मुणिणा पवेइओ ॥
- [१०३] सउणी जह पंसुगुडिया, विहुणिय धंसयई सियं रयं ।
एवं दविओवहाणवं कम्मं, खवइ तवस्सि माहणे ॥
- [१०४] उट्ठियमनगारमेसणं, समणं ठाणठियं तवस्सिणं ।
डहरा वुड्ढा य पत्थए, अवि सुस्से न य तं लभे जना ॥
- [१०५] जइ कालुणियाणि कासिया, जइ रोयंति य पुत्तकारणा ।
दवियं भिक्खुं समुट्ठियं, नो लब्भंति णं संठवेत्तए ॥
- [१०६] जइविय कामेहिं लाविया, जइ नेज्जाहि णु बंधिउं घरं ।
जइ जीवित नावकंखिए नो लब्भंति तं संठवेत्तए ॥
- [१०७] सेहंति य णं ममाइणो, मायापिया य सुया य भारिया ।
पोसाहि न पोसओ तुमं, लोगं परं पि जहासि पोसणे ॥
- [१०८] अन्ने अन्नेहिं मुच्छिया, मोहं जंति नरा असंवुडा ।

विसमं विसमेहिं गाहिया, ते पावेहिं पुणो पगब्भिया ॥
सुयक्खंधो-१, अज्झयणं-२, उद्देशो-१

- [१०९] तम्हा दवि इक्ख पंडिए, पावाओ विरतेऽभिनिव्वुडे ।
पणए वीरे महाविहिं, सिद्धिपहं नेयाउयं धुवं ॥
- [११०] वेयालियमग्गमागओ, मनवयसा काएण संवुडो ।
चिच्चा वित्तं च नायओ, आरंभं च सुसंवुडे चरे ॥ त्तिबेमि ॥
- बीए अज्झयणे पढमो उद्देशो समत्तो ◦

◦ बीओ उद्देशो ◦

- [१११] तयसं व जहाइं से रयं, इइ संखाय मुनी न मज्जई ।
गोयन्नतरेण माहणे अहसेयकरी अन्नेसि इंखिणी ॥
- [११२] जो परिभवई परं जनं, संसारे परिवत्तई महं ।
अदु इंखिणिया उ पाविया, इह संखाय मुनी न मज्जई ॥
- [११३] जे यावि अनायगे सिया, जे वि य पेसगपेसए सिया ।
जो मोनपयं उवट्टिए, नो लज्जे समयं सयाऽऽयरे ॥
- [११४] सम अन्नयरंमि संजमे, संसुद्धे समणे परिव्वए ।
जा आवकहा समाहिए, दविए कालमकासि पंडिए ॥
- [११५] दूरं अनुपस्सिया मुनी, तीयं धम्ममनागयं तहा ।
पुढे परुसेहिं माहणे, अवि हण्णू समयंसि रीयइ ॥
- [११६] पण्णसमत्ते सया जए, समता धम्ममुदाहरे मुनी ।
सुहुमे उ सया अलूसए, नो कुज्झे नो माणि माहणे ॥
- [११७] बहुजननमणंमि संवुडे, सव्वट्टेहिं नरे अनिस्सिए ।
हरए व सया अनाविले, धम्मं पादुरकासि कासवं ॥
- [११८] बहवे पाणा पुढो सिया, पत्तेयं समयं समीहिया ।
जे मोनपयं उवट्टिए, विरइं तत्थ अकासि पंडिए ॥
- [११९] धम्मस्स य पारगे मुनी, आरंभस्स य अंतए ठिए ।
सोयंति य णं ममाइणो, नो य लभंतो नियं परिग्गहं ॥
- [१२०] इहलोगे दुहावहं विऊ, परलोगे य दुहं-दुहावहं ।
विद्धंसण धम्ममेव तं, इति विज्जं कोऽगारमावसे ॥
- [१२१] महया पत्तिगोव जाणिया, जा वि य वंदणपूयणा इहं ।
सुहुमे सल्ले दुरुद्धरे, विउमंता पयहिज्ज संथवं ॥
- [१२२] एगे चरे ठाणमासने, सयने एगे समाहिए सिया ।
भिक्खू उवहाणवीरिए, वइगुत्ते अज्झत्तसंवुडे ॥
- [१२३] नो पीहे न यावपंगुणे, दारं सुन्नघरस्स संजए ।
पुढे न उदाहरे वयं, न समुच्छे नो संथरे तणं ॥

[१२४] जत्थऽत्थमि ए अनाउले, समविसमाइं मुनीऽहियासए ।
सुयक्खंधो-१, अज्झयणं-२, उद्देसो-२

- चरगा अदुवा वि भेरवा, अदुवा तत्थ सिरीसिवा सिया ॥
[१२५] तिरिया मनुया य दिव्वगा, उवसग्गा तिविहाऽहियासए ।
लोमादीयं न हारिसे, सुन्नागारगए महामुनी ॥
[१२६] नो अभिकंखेज्ज जीवियं, नोऽवि य पूयणपत्थए सिया ।
अब्भत्थमुर्वेति भेरवा, सुन्नागारगयस्स भिक्खुणो ॥
[१२७] उवनीयतरस्स ताइणो, भयमाणस्स विविक्कमासनं ।
सामाइयमाहु तस्स जं, जो अप्पाणं भए न दंसए ॥
[१२८] उसिणोदगतत्तभोइणो, घम्मद्वियस्स मुनिस्स हीमतो ।
संसग्गि असाहु राइहिं, असमाही उ तहागयस्स वि ॥
[१२९] अहिगरणकडस्स भिक्खुणो, वयमाणस्स पसज्झ दारुणं ।
अद्दे परिहायई बहुं, अहिगरणं न करेज्ज पंडिए ॥
[१३०] सीओदग पडिदुगंछिणो, अपडिण्णस्स लवावसक्किणो ।
सामाइयमाहु तस्स जं, जो गिहिमत्तेऽसनं न भुंजई ॥
[१३१] न य संखयमाहु जीवियं, तह वि य बालजनो पगब्भई ।
बाले पावेहिं भिज्जई, इइ संखाय मुनी न मज्जई ॥
[१३२] छंदेण पले इमा पया, बहुमाया मोहेण पाउडा ।
वियडेण पलेति माहणे, सीउण्हं वयसाऽहियासए ॥
[१३३] कुजए अपराजिए जहा, अक्खेहिं कुसलेहिं दीवयं ।
कडमेव गहाय नो कलिं, नो तीयं नो चेव दावरं ॥
[१३४] एवं लोगंमि ताइणा, बुइए जे धम्मे अनुत्तरे ।
तं गिण्ह हियं ति उत्तमं, कडमिव सेसऽवहाय पंडिए ॥
[१३५] उत्तर मणुयाण आहिया, गामधम्म इति मे अनुस्सुयं ।
जंसी विरया समुट्टिया, कासवस्स अनुधम्मचारिणो ॥
[१३६] जे एय चरंति आहियं, नाएणं महया महेसिणा ।
ते उट्टियं ते समुट्टिया, अन्नोऽन्नं सारंति धम्मओ ॥
[१३७] मा पेह पुरा पणामए, अभिकंखे उवहिं धुणित्तए ।
जे दूमण तेहिं नो नया, ते जाणंति समाहिमाहियं ॥
[१३८] नो काहिए होज्ज संजए, पासणिए न य संपसारए ।
नच्चा धम्मं अनुत्तरं कयकिरिए य न यावि मामए ॥
[१३९] छन्नं च पसंस नो करे, न य उक्कोस पगास माहणे ।
तेसिं सुविवेगमाहिए, पणया जेहिं सुज्जोसियं घुयं ॥
[१४०] अनिहे सहिए सुसंवुडे, धम्मट्ठी उवहाणवीरिए ।
विहरेज्ज समाहिइंदिए अत्तहिअं दुहेण लब्भते ॥

[१४१] न हि नून पुरा अनुस्सुयं, अदुवा तं तह नो समुद्धियं ।
सुयक्खंधो-१, अज्झयणं-२, उद्देसो-२

मुणिणा सामाइयाहियं, नाएणं जगसव्वदंसिणा ॥
[१४२] एवं मत्ता महंतरं, धम्ममिणं सहिया बहू जना ।
गुरुणो छंदानुवत्तगा, विरया तिण्णा महोघमाहियं ॥ त्ति बेमि ॥
◦ बीए अज्झयणे बीओ उद्देसो समत्तो ◦

◦ तइओ उद्देसो ◦

- [१४३] संवुडकम्मस्स भिक्खुणो, जं दुक्खं पुट्ठं अबोहिए ।
तं संजमओऽवचिज्जई, मरणं हेच्च वयंति पंडिया ॥
- [१४४] जे विन्नवणाहिऽजोसिया, संतिण्णेहिं समं वियाहिया ।
तम्हा उड्ढं ति पासहा, अदक्खू कामाई रोगवं ॥
- [१४५] अग्गं वणिएहिं आहियं, धारंती राइणया इहं ।
एवं परमा महव्वया, अक्खाया उ सराइभोयणा ॥
- [१४६] जे इह सायाणुगा नरा, अज्झोववन्ना कामेहिं मुच्छिया ।
क्विवणेण समं पगब्भिया, न वि जाणंति समाहिमाहियं ॥
- [१४७] वाहेण जहा व विच्छए, अबले होइ गवं पचोइए ।
से अंतसो अप्पथामए, नाईवहइ अबले विसीयइ ॥
- [१४८] एवं कामेसणं विऊ, अज्ज सुए पयहेज्ज संथवं ।
कामी कामे न कामए, लद्धे वा वि अलद्ध कण्हुई ॥
- [१४९] मा पच्छ असाहुया भवे, अच्छेही अनुसास अप्पगं ।
अहियं च असाहु सोयई, से थणई परिदेवई बहं ॥
- [१५०] इह जीवियमेव पासहा, तरुण एवाससयस्स तुट्ठई ।
इत्तरवासे व बुज्झह गिद्ध नरा कामेसु मुच्छिया ॥
- [१५१] जे इह आरंभनिस्सिया, आयदंड एगंतलूसगा ।
गंता ते पावलोगयं, चिररायं आसुरियं दिसं ॥
- [१५२] न य संखयमाहु जीवीयं, तह वि य बालजनो पगब्भई ।
पच्चुप्पन्नेण कारियं के दट्ठं परलोगमागए ? ॥
- [१५३] अदक्खुव दक्खुवाहियं सद्धहसू अदक्खुदंसणा ।
हंदि हु सुनिरुद्धदंसणे मोहणिज्जेण कडेण कम्मणा ॥
- [१५४] दुक्खी मोहे पुणो पुणो, निव्विंदेज्ज सिलोगपूयणं ।
एवं सहिएऽहिपासए, आयतुलं पाणेहिं संजए ॥
- [१५५] गारं पि य आवसे नरे, अनुपुव्वं पाणेहिं संजए ।
समया सव्वत्थ सुव्वए, देवाणं गच्छे सलोगयं ॥
- [१५६] सोच्चा भगवानुसासनं, सच्चे तत्थ करेज्जुवक्कमं ।

- [१५७] सव्वं नच्चा अहिद्वए, धम्मट्ठी उवहाणवीरिए ।
गुत्ते जुत्ते सया जए, आयपरे परमायतद्विए ॥
- [१५८] वित्तं पसवो य नाइओ, तं बाले सरणं ति मन्नई ।
एए मम तेसुवि अहं, नो ताणं सरणं न विज्जई ॥
- [१५९] अब्भागमियंमि वा दुहे, अहवा उवक्कमिए भवंतिए ।
एगस्स गई य आगई, विदु मंता सरणं न मन्नई ॥
- [१६०] सव्वे सयकम्मकप्पिया, अवियत्तेण दुहेण पाणिणो ।
हिंडंति भयाउला सढा, जाइजरामरणेहिऽभिद्वया ॥
- [१६१] इणमेव खणं वियाणिया, नो सुलभं बोहि च आहियं ।
एवं सहिएऽहियासए, आह जिने इणमेव सेसगा ॥
- [१६२] अभविंसु पुरा वि भिक्खुवो, आएसा वि भवंति सुव्वया ।
एयाइं गुणाइं आहु ते, कासवस्स अनुधम्मचारिणो ॥
- [१६३] तिविहेण वि पाण मा हणे, आयहिए अनियाण संवुडे ।
एवं सिद्धा अनंतसो, संपइ जे य अनागयावरे ॥
- [१६४] एवं से उदाहु अनुत्तरनाणी अनुत्तरदंसी अनुत्तरनाणदंसणधरे ।
अरहा नायपुत्ते भगवं, वेसालिए वियाहिए ॥ त्ति बेमि ॥

० बीए अज्झयणे तइओ उद्देसो समत्तो ०

मुनि दीपरत्नसागरेण संशोधितः सम्पादितश्च “बीअं अज्झयणं समत्तं”

० तइयं अज्झयणं - उवसग्गपरिण्णा ०

० पढमो उद्देसो ०

- [१६५] सूरं मण्णइ अप्पाणं, जाव जेयं न पस्सई ।
जुज्झंतं दढधम्माणं सिसुपालो व महारहं ॥
- [१६६] पयाया सूरा रणसीसे, संगामंमि उवद्विए ।
माया पुत्तं न जाणाइ, जेएण परिविच्छिए ॥
- [१६७] एवं सेहे वि अप्पुट्ठे, भिक्खुचरिया अकोविए ।
सूरं मन्नइ अप्पाणं, जाव लूहं न सेवए ॥
- [१६८] जया हेमंतमासंमि, सीयं फुसइ सवायगं ।
तत्थ मंदा विसीयंति, रज्जहीणा व खत्तिया ॥
- [१६९] पुट्ठे गिम्हाहितावेणं, विमाने सुपिवासिए ।
तत्थ मंदा विसीयंति, मच्छा अप्पोदए जहा ॥
- [१७०] सया दत्तेसणा दुक्खा जायणा दुप्पणोल्लिया ।
कम्मत्ता दुब्भगा चेव, इच्छाहंसु पुढोजना ॥

[१७१] एए सद्दे अचायंता, गामेसु नगरेसु वा ।
सुयक्खंधो-१, अज्झयणं-३, उद्देसो-१

- तत्थ मंदा विसीयंति, संगामंमि व भीरुया ॥
[१७२] अप्पेगे खुधियं भिक्खु, सुणी डंसइ लूसए ।
तत्थ मंदा विसीयंति, तेउपुट्ठा व पाणिणो ॥
[१७३] अप्पेगे पडिभासंति, पाडिपंथियमागया ।
पडियारगया एए, जे एए एवजीविणो ॥
[१७४] अप्पेगे वइ जुंजंति, नगिणा पिंडोलगाहमा ।
मुंडा कंडू-विणट्ठंगा, उज्जल्ला असमाहिया ॥
[१७५] एवं विप्पडिवन्नेगे अप्पणा उ अजाणया ।
तमाओ ते तमं जंति मंदा मोहेण पाउडा ॥
[१७६] पुट्ठो य दंसमसगेहिं, तणफासमचाइया ।
न मे दिट्ठे परे लोए, जइ परं मरणं सिया ॥
[१७७] संतत्ता केसलोएणं, बंभचेर-पराइया ।
तत्थ मंदा विसीयंति मच्छा पविट्ठा व केयणे ॥
[१७८] आयदंडसमायारे, मिच्छासंठियभावणा ।
हरिसप्पओसमावन्ना केई लूसंतिऽनारिया ॥
[१७९] अप्पेगे पलियंते सिं चारो चोरो त्ति सुव्वयं ।
बंधंति भिक्खुयं बाला, कसायवयणेहि य ॥
[१८०] तत्थ दंडेण संवीते, मुट्ठिणा अदु फलेण वा ।
नार्इणं सरई बाले, इत्थी वा कुद्धगामिणी ॥
[१८१] एए भो ! कसिणा फासा, फरुसा दुरहियासया ।
हत्थी वा सरसंवीत्ता कीवा वस गया गिहं ॥ त्ति बेमि ॥
• तइए अज्झयणे पढमो उद्देसो समत्तो •

• बीओ उद्देसो •

- [१८२] अहिमे सुहुमा संग्गा, भिक्खूणं जे दुरुत्तरा ।
जत्थ एगे विसीयंति, न चयंति जवित्तए ॥
[१८३] अप्पेगे नायओ दिस्स, रोयंति परिवारिया ।
पोस णे तात! पुट्ठोऽसि कस्स तात ! जहासि णे? ॥
[१८४] पिया ते थेरओ तात ! ससा ते खुइडिया इमा ।
भायरो ते सगा तात ! सोयरा किं जहासि णे ? ॥
[१८५] मायरं पियरं पोस, एव लोगो भविस्सइ ।
एवं खु लोइयं तात ! जे पालेंति उ मायरं ॥
[१८६] उत्तरा महरुल्लावा, पुत्ता ते तात ! खुइडया ।

- [१८७] एहि तात ! घरं जामो, मा य कम्मे सहा वयं ।
बीयं पि ताय ! पासामो, जामु ताव सयं गिहं ॥
- [१८८] गंतुं तात ! पुणोगच्छे, न तेणासमणो सिया ।
अकामगं परिक्कमं को तं वारेउमरिहइ? ॥
- [१८९] जं किंचि अनगं तात !, तं पि सव्वं समीकतं ।
हिरण्णं ववहाराइ, तं पि दाहामु ते वयं ॥
- [१९०] इच्चेव णं सुसेहंति, कालुणीयसमुद्धिया ।
विबद्धो नाइसंगेहि, तओऽगारं पहावइ ॥
- [१९१] जहा रुक्खं वने जायं, मालुया पडिबंधई ।
एव णं पडिबंधंति, नायओ असमाहिणा ॥
- [१९२] विबद्धो नाइसंगेहिं, हत्थी वा वि नवग्गहे ।
पिड्डओ परिसप्पंति, सूयगोव्व अदूरए ॥
- [१९३] एए संग्गा मणुस्साणं, पायाला व अतारिमा ।
कीवा जत्थ य किस्संति, नाइसंगेहि मुच्छिया ॥
- [१९४] तं च भिक्खू परिन्नाय, सव्वे संग्गा महासवा ।
जीवियं नावकंखेज्जा, सोच्चा धम्ममनुत्तरं ॥
- [१९५] अहिमे संति आवट्टा, कासवेणं पवेइया ।
बुद्धा जत्थावसप्पंति, सीयंति अबुहा जहिं ॥
- [१९६] रायाणो रायऽमच्चा य, माहणा अदुव खत्तिया ।
निमंतयंति भोगेहिं, भिक्खुयं साहुजीविणं ॥
- [१९७] हत्थऽस्स-रह-जाणेहिं, विहारगमणेहि य ।
भुंज भोगे इमे सग्घे महरिसी ! पूजयामु तं ॥
- [१९८] वत्थगंधमलंकारं इत्थीओ सयणाणि य ।
भुंजाहिमाइं भोगाइं आउसो ! पूजयामु तं ॥
- [१९९] जो तुमे नियमो चिण्णो, भिक्खुभावंमि सुव्वया ! ।
अगारमावसंतस्स, सव्वो संविज्जए तहा ॥
- [२००] चिरं दूज्जमाणस्स, दोसो दाणिं कुओ तव ? ।
इच्चेव णं निमंतेति, नीवारेण व सूयरं ॥
- [२०१] चोइया भिक्खुचरियाए, अचयंता जवित्तए ।
तत्थ मंदा विसीयंति, उज्जाणंसि व दुब्बला ॥
- [२०२] अचयंता व लूहेणं उवहाणेण तज्जिया ।
तत्थ मंदा विसीयंति, उज्जाणंसि व जरग्गवा ॥
- [२०३] एवं निमंतणं लद्धुं, मुच्छिया गिद्ध इत्थिसु ।
अज्झोववन्ना कामेहिं, चोइज्जंता गया गिहं ॥ त्ति बेमि ॥

सुयक्खंधो-१, अज्झयणं-३, उद्देसो-३

• तइओ उद्देसो •

- [२०४] जहा संगामकालंमि, पिट्ठओ भीरु वेहइ ।
वलयं गहणं नूमं, को जाणइ पराजयं? ॥
- [२०५] मुहुत्ताणं मुहुत्तस्स, मुहुत्तो होइ तारिसो ।
पराजियाऽवसप्पामो इति भीरु उवेहई ॥
- [२०६] एवं तु समणा एगे, अबलं नच्चाण अप्पगं ।
अनागयं भयं दिस्स, अवकप्पंतिमं सुयं ॥
- [२०७] को जाणइ विऊवातं, इत्थीओ उदगाउ वा ।
चोइज्जंता पवक्खामो न, नो अत्थि पकप्पियं ॥
- [२०८] इच्चेव पडिलेहंति, वलयाइ पडिलेहिणो ।
वित्तिगिंछसमावन्ना, पंथाणं व अकोविया ॥
- [२०९] जे उ संगामकालंमि, नाया सूरपुरंगमा ।
नो ते पिट्ठमुवेहंति, किं परं मरणं सिया ॥
- [२१०] एवं समुट्ठिए भिक्खू, वोसिज्जाऽगारबंधणं ।
आरंभं तिरियं कट्ठु, अत्तत्ताए परिव्वए ॥
- [२११] तमेगे परिभासंति, भिक्खुयं साहुजीविणं ।
जे एवं परिभासंति, अंतए ते समाहिए ॥
- [२१२] संबद्धसमकप्पा उ, अन्नमन्नेसु मुच्छिया ।
पिंडवायं गिलाणस्स, जं सारेह दलाह य ॥
- [२१३] एवं तुब्भे सरागत्था, अन्नमन्नमनुव्वसा ।
नट्ठ-सप्पह-सब्भावा, संसारस्स अपारगा ॥
- [२१४] अह ते परिभासेज्जा, भिक्खू मोक्खविसारए ।
एवं तुब्भे पभासंता, दुपक्खं चेव सेवहा ॥
- [२१५] तुब्भे भुंजह पाएसु, गिलाणोऽभिहडंमि या ।
तं च बीओदगं भोच्चा, तमुद्देस्सादि जं कडं ॥
- [२१६] लित्ता तिव्वाभितावेणं, उज्झिया असमाहिया ।
नाइकंइइयं सेयं अरुयस्सावरज्झई ॥
- [२१७] तत्तेण अनुसिद्धा ते, अपडिण्णेण जाणया ।
न एस नियए मग्गे, असमिक्खा वई किई ॥
- [२१८] एरिसा जा वई एसा, अग्गे वेणु व्व करिसिया ।
गिहिणो अभिहडं सेयं, भुंजिउं न उ भिक्खुणं ॥

[२१९] धम्मपन्नवणा जा सा, सारंभा ण विसोहिया ।
सुयक्खंधो-१, अज्झयणं-३, उद्देशो-३

- न उ एयाहिं दिट्ठीहिं, पुव्वमासि पगप्पियं ॥
[२२०] सव्वाहिं अनुजुत्तीहिं अचयंता जवित्तए ।
तओ वायं निराकिच्चा, ते भुज्जो वि पगब्भिया ॥
[२२१] रागदोसाभिभूयप्पा मिच्छत्तेण अभिदुया ।
अक्कोसे सरणं जंति टंकणा इव पव्वयं ॥
[२२२] बहुगुणप्पकप्पाइं, कुज्जा अत्तसमाहिए ।
जेणऽन्ने न विरुज्जेज्जा, तेणं तं तं समायरे ॥
[२२३] इमं च धम्ममादाय, कासवेण पवेइयं ।
कुज्जा भिक्खू गिलाणस्स, अगिलाए समाहिए ॥
[२२४] संखाय पेसलं धम्मं, दिट्ठिमं परिनिव्वुडे ।
उवसग्गे नियामित्ता, आमोक्खाए परिव्वएज्जासि ॥ त्ति बेमि ॥
◦ तइए अज्झयणे तइओ उद्देशो समत्तो ◦

◦ चउत्थो उद्देशो ◦

- [२२५] आहंसु महापुरिसा, पुव्विं तत्त तवोधना ।
उदएण सिद्धिमावन्ना, तत्थ मंदो विसीयइ ॥
[२२६] अभुंजिया नमी वेदेही, रामउत्ते य भुंजिया ।
बाहुए उदगं भोच्चा, तहा नारायणे रिसी ॥
[२२७] आसिले देविले चव, दीवायण महारिसी ।
पारासरे दगं भोच्चा, बीयाणि हरियाणि य ॥
[२२८] एए पुव्वं महापुरिसा, आहिया इह संमया ।
भोच्चा बीओदगं सिद्धा, इइ मेयमनुस्सुयं ॥
[२२९] तत्थ मंदा विसीयंति वाहच्छिन्ना व गद्धभा ।
पिड्डओ परिसप्पंति, पीढसप्पीय संभमे ॥
[२३०] इहमेगे उ भासंति, सातं सातेण विज्जई ।
जे तत्थ आरियं मग्गं, परमं च समाहियं ॥
[२३१] मा एयं अवमन्नंता, अप्पेणं लुंपहा बहुं ।
एयस्स अमोक्खाए अयोहारि व्व जूरह ॥
[२३२] पाणाइवाए वट्टंता, मुसावाए असंजया ।
अदिन्नादाणे वट्टंता, मेहुणे य परिग्गहे ॥
[२३३] एवमेगे उ पासत्था, पन्नवैति अनारिया ।
इत्थीवसं गया बाला, जिनसासनपरंमुहा ॥
[२३४] जहा गंडं पिलागं वा, परिपीलेत्ता मुहुत्तगं ।

एवं विन्नवणित्थीसु, दोसो तत्थ कओ सिया ॥
सुयक्खंधो-१, अज्झयणं-३, उद्देसो-४

- [२३५] जहा मंधादए नाम, थिमियं पियति दगं ।
एवं विन्नवणित्थीसु दोसो तत्थ कओ सिया ? ॥
- [२३६] जहा विहंगमा पिंगा, थिमियं पियति दगं ।
एवं विन्नवणित्थीसु, दोसो तत्थ कओ सिया ? ॥
- [२३७] एवमेगे उ पासत्था मिच्छादिट्ठी अनारिया ।
अज्झोववन्ना कामेहिं, पूयणा इव तरुणए ॥
- [२३८] अनागयमपस्संता पच्चुप्पन्नगवेसगा ।
ते पच्छा परितप्पंति, खीणे आउंमि जोव्वणे ॥
- [२३९] जेहिं काले परिककंतं, न पच्छा परितप्पए ।
ते धीरा बंधणुम्मुक्का, नावकंखंति जीवियं ॥
- [२४०] जहा नई वेयरणी, दुत्तरा इह संमता ।
एवं लोगंसि नारीओ, दुरुत्तरा अमईमया ॥
- [२४१] जेहिं नारीण संजोगा, पूयणा पिट्ठओ कया ।
सव्वमेयं निराकिच्चा, ते ठिया सुसमाहीए ॥
- [२४२] एए ओधं तरिस्संति, समुद्धं ववहारिणो ।
जत्थ पाणा विसन्नासी, किच्चंती सयकम्मणा ॥
- [२४३] तं च भिक्खू परिण्णाय सुव्वए समिए चरे ।
मुसावायं विवज्जेज्जा, अदिण्णादाणं च वोसिरे ॥
- [२४४] उड्ढमहे तिरियं वा, जे केई तसथावरा ।
सव्वत्थ विरतिं कुज्जा, संति निव्वाणमाहियं ॥
- [२४५] इमं च धम्ममादाय कासवेण पवेइयं ।
कुज्जा भिक्खू गिलाणस्स, अगिलाए समाहिए ॥
- [२४६] संखाय पेसलं धम्मं, दिट्ठिमं परिनिव्वुडे ।
उवसग्गे नियामित्ता, आमोक्खाए परिव्वएज्जासि ॥ त्ति बेमि ॥

० तइए अज्झयणे चउत्थो उद्देसो सम्मत्तो ०

मुनि दीपरत्नसागरेण संशोधित सम्पादितश्च “तइयं अज्झयणं सम्मत्तं”

० चउत्थं अज्झयणं - इत्थिपरिण्णा ०

० पढमो उद्देसो ०

- [२४७] जे मायरं च पियरं च, विप्पजहाय पुव्वसंजोगं ।
एगे सहिए चरिस्सामि, आरतमेहुणो विवित्तेसी ॥
- [२४८] सुहुमेणं तं परिककम्म, छन्नपएण इत्थीओ मंदा ।
उवायं पि ताओ जाणंति, जह लिस्संति भिक्खुणो एगे ॥

[२४९] पासे भिसं निसीयंति, अभिक्खणं पोसवत्थं परिहिति ।
सुयक्खंधो-१, अज्झयणं-४, उद्देसो-१

- कायं अहे वि दंसंति, बाहु मुद्धट्टु कक्खमनुव्वजे ॥
[२५०] सयणासणेहिं जोग्गेहिं, इत्थीओ एगया निमंतति ।
एयाणि चेव से जाणे, पासाणि विरूवरूवाणि ॥
[२५१] नो तासु चक्खु संधेज्जा, नो वि य साहसं समभिजाणे ।
नो सद्धियं पि विहरेज्जा, एवमप्पा सुरक्खिओ होइ ॥
[२५२] आमंतिय उस्साविया, भिक्खुं आयसा निमंतति ।
एयाणि चेव से जाणे, सद्दाणि विरूवरूवाणि ॥
[२५३] मनबंधणेहिं नेगेहिं, कलुणविनीयमुवगसित्ताणं ।
अदु मंजुलाइं भासंति, आणवयंति भिन्नकहाहिं ॥
[२५४] सीहं जहा व कुणिमेणं, निब्भयमेगचरंति पासेणं ।
एवित्थियाओ बंधंति, संवुडं एगतियमनगारं ॥
[२५५] अह तत्थ पुणो नमयंति, रहकारो व नेमि आनुपुव्वीए ।
बद्धे मिए व पासेणं, फंदंते वि न मुच्चई ताहे ॥
[२५६] अह सेऽणुत्तप्पई पच्छा, भोच्चा पायसं व विसमिस्सं ।
एवं विवेगमादाय, संवासो न कप्पए दविए ॥
[२५७] तम्हा उ वज्जए इत्थी, विसलित्तं व कंटगं नच्चा ।
ओए कुलाणि वसवत्ती, आघाते न से वि निग्गंथे ॥
[२५८] जे एयं उंछं अनुगिद्धा, अन्नयरा हुंति कुसीलाणं ।
सुतवस्सिए वि से भिक्खू, नो विहरे सह नमित्थीसु ॥
[२५९] अवि घूयराहिं सुण्हाहिं, धाईहिं अदुवा दासीहिं ।
महतीहिं वा कुमारीहिं, संथवं से न कुज्जा अनगारे ॥
[२६०] अदु नाइणं व सुहिणं वा, अप्पियं दट्टु एगया होइ ।
गिद्धा सत्ता कामेहिं, रक्खणपोसणे मनुस्सोऽसि ॥
[२६१] समणं पि दट्टुदासीणं, तत्थ वि ताव एगे कुप्पंति ।
अदुवा भोयणेहिं नत्थेहिं, इत्थीदोसं संकिणो होंति ॥
[२६२] कुव्वंति संथवं ताहिं, पब्भट्टा समाहिजोगेहिं ।
तम्हा समणा न समंति, आयहियाए सन्निसेज्जाओ ॥
[२६३] बहवे गिहाइं अवहट्टु, मिस्सीभावं पत्थुया य एगे ।
धुवमग्गमेव पवयंति, वायावीरियं कुसीलाणं ॥
[२६४] सुद्धं रवइ परिसाए, अह रहस्संमि दुक्कडं कुणइ ।
जाणंति य णं तहाविहा, माइल्ले महासडेऽयं ति ॥
[२६५] सयं दुक्कडं न वयइ, आइडो वि पक्त्थइ बाले ।
वेयाणुवीइ मा कासी, चोईज्जंतो गिलाइ से भुज्जो ॥

[२६६] उसिया वि इत्थिपोसेसु, पुरिसा इत्थिवेयखेदन्ना ।
सुयक्खंधो-१, अज्झयणं-४, उद्देशो-१

- पण्णासमणिया वेगे, नारीणं वसं उवकसंति ॥
[२६७] अवि हत्थपायछेयाए, अदुवा वद्धमंसउक्कंते ।
अवि तेयसाभितावणाइं, तच्छिय खारसिंचणाइं च ॥
[२६८] अदु कण्णनासियाछेदं, कंठछेदणं तितिक्खंति ।
इति एत्थ पाव-संतत्ता, न य बिंति पुणो न काहिति ॥
[२६९] सुयमेयमेवमेगसिं, इत्थीवेदे वि हु सुयक्खायं ।
एयं पि ता वइत्ताणं, अदुवा कम्मुणा अवकरेति ॥
[२७०] अन्नं मणेण चिंतेति, वाया अन्नं च कम्मुणा अन्नं ।
तम्हा न सद्धे भिक्खू, बहुमायाओ इत्थिओ नच्चा ॥
[२७१] जुवती समणं बूया, विचित्तऽलंकार वत्थगाणि परिहित्ता ।
विरया चरिस्सऽहं रुक्खं, घम्माइक्ख णे भयंतारो ॥
[२७२] अदु साविया पवाएणं, अहमंसि साहम्मिणी य समणाणं ।
जउकुंभे जहा उवज्जोई, संवासे विऊ विसीदेज्जा ॥
[२७३] जउकुंभे जोइउवगूढे, आसुऽभितत्ते नासमुवयाइ ।
एवित्थियाहिं अनगारा संवासेण नासमुवयंति ॥
[२७४] कुव्वंति पावगं कम्मं, पुट्ठा वेगेवमाहिंसु ।
नोऽहं करेमि पावं ति, अंकेसाइणी ममेस त्ति ॥
[२७५] बालस्स मंदयं बीयं, जं च कडं अवजाणई भुज्जो ।
दुगुणं करेइ से पावं, पूयणकामो विसन्नेसी ॥
[२७६] संलोकणिज्जमनगारं, आयगयं निमंतणेणाहंसु ।
वत्थं वा ताइ ! पायं वा, अन्नं पानगं पडिग्गाहे ॥
[२७७] नीवारमेवं बुज्जेज्जा, नो इच्छे अगारमागंतुं ।
बद्धे विसयपासेहिं, मोहमावज्जइ पुणो मंदे ॥ त्ति बेमि ॥
◦ चउत्थे अज्झयणे पढमो उद्देशो सम्मत्तो ◦

◦ बीओ उद्देशो ◦

- [२७८] ओए सया न रज्जेज्जा, भोगकामी पुणो विरज्जेज्जा ।
भोगे समणाणं सुणेहा, जह भुंजंति भिक्खुणो एगे ॥
[२७९] अह तं तु भेयमावन्नं मुच्छियं भिक्खु काममइवट्टं ।
पलिभिंदियाणं तो पच्छा, पादुद्धु मुद्धि पहणंति ॥
[२८०] जइ केसिया णं मए भिक्खु, नो विहरे सह नमित्थीए ।
केसाऽवि अहं लुंचिस्सं, नन्नत्थ मए चरेज्जासि ॥
[२८१] अह णं से होइ उवलद्धो, तो पेसेंति तहाभूएहिं ।

- [२८२] दारूणि सागपागाए, पज्जोओ वा भविस्सई राओ ।
पायाणि य मे रयावेहि, एहि ता मे पिट्ठ ओम्मद्दे ॥
- [२८३] वत्थाणि य मे पडिलेहेहि, अन्नं पाणमाहराहि त्ति ।
गंधं च रओहरणं च, कासवगं च समनुजाणाहि ॥
- [२८४] अदु अंजणिं अलंकारं, कुक्कययं मे पयच्छाहि ।
लोद्धं च लोद्धकुसुमं च, वेणु पलासियं च गुलियं च ॥
- [२८५] कोट्टं तगरं अगरं च, संपिट्ठं सह उसीरेणं ।
तेल्लं मुहे भिलिंगाए वेणुफलाइं सन्निहाणाए ॥
- [२८६] नंदीचुण्णगाइं पाहराहि, छत्तोवानहं च जाणाहि ।
सत्थं च सूवच्छेयाए, आणीलं च वत्थं रयावेहि ॥
- [२८७] सुफणिं च सागपागाए, आमलगाइं दगाहरणं च ।
तिलगकरणिं अंजनसलागं, धिंसु मे विहुयणं विजाणाहि ॥
- [२८८] संडासगं च फणिहं च, सीहलिपासगं च आणाहि ।
आदंसगं च पयच्छाहि, दंत पक्खालणं पवेसाहि ॥
- [२८९] पूयफलं तंबोलं च, सूई-सुत्तगं च जाणाहि ।
कोसं च मोयमेहाए, सुप्पुक्खलगं च-खारगलणं च ॥
- [२९०] चंदालगं च करगं च, वच्चघरगं च आउसो ! खणाहि ।
सरपाय गं च जायाए, गोरहगं च सामणेराए ॥
- [२९१] घडिगं च सडिडिमयं च, चेलगोलं कुमारभूयाए ।
वासं समभिआवण्णं आवसहं च जाण भत्तं च ॥
- [२९२] आसंदियं च नवसुत्तं, पाउल्लाइं संकमट्टाए ।
अदु पुत्तदोहलट्टाए, आणप्पा हवंति दासा वा ॥
- [२९३] जाए फले समुप्पन्ने, गेण्हसु वा णं अहवा जहाहि ।
अह पुत्तपोसिणो एगे, भारवहा हवंति उट्टा वा ॥
- [२९४] राओ वि उट्टिया संता, दारगं संठवेंति धाई वा ।
सुहिरीमणा वि ते संता, वत्थधुवा हवंति हंसा वा ॥
- [२९५] एवं बहुहिं कयपुव्वं, भोगत्थाए जेऽभियावन्ना ।
दासे मिए व पेस्से वा, पसुभूए व से न वा केई ॥
- [२९६] एवं खु तासु विण्णप्पं, संथवं संवासं च वज्जेज्जा ।
तज्जातिया इमे कामा, वज्जकरा य एव मक्खाए ॥
- [२९७] एवं भयं न सेयाए, इह से अप्पगं निरुंभित्ता ।
नो इत्थिं नो पसुं भिक्खू नो सयं पाणिणा निलिज्जेज्जा ॥
- [२९८] सुविसुद्धलेसे मेहावी, परकिरियं च वज्जए नाणी ।

[२९९] इच्चेवमाहु से वीरे, धुरए धुयमोहे से भिक्खू ।
तम्हा अज्झत्थविसुद्धे, सुविमुक्के आमोक्खाए परिव्वएज्जासि ॥ त्ति बेमि ॥

◦ चउत्थे अज्झयणे बीओ उद्देशो समत्तो ◦

मुनि दीपरत्नसागरेण संशोधितः सम्पादितश्च “चउत्थ अज्झयणं सम्मत्तं”

0 पंचमं अज्झयणं - नरयविमत्ती 0

◦ पढमो उद्देशो ◦

- [३००] पुच्छिस्सहं केवलियं महेसिं!, कहंभितावा नरगा पुरत्था ? ।
अजाणओ मे मुनि ! बूहि जाणं, कहं नु बाला नरगं उव्वेति? ॥
- [३०१] एवं मए पुट्ठे महानुभावे, इणमोऽब्बवी कासवे आसुप्पन्ने ।
पवेयइस्सं दुहमदुग्गं, आदिनियं दुक्कडिणं पुरत्था ॥
- [३०२] जे केइ बाला इह जीवियट्ठी, पावाइं कम्माइं करेति रुद्धा ।
ते घोररूवे तमिसंधयारे, तिव्वाभितावे नरए पडंति ॥
- [३०३] तिव्वं तसे पाणिणो थावरे य, जे हिंसई आयसुहं पडुच्चा ।
जे लूसए होइ अदत्तहारी, न सिक्खई सेयवियस्स किंचि ॥
- [३०४] पागब्भि पाणे बहुणं तिवाईं, अनिक्वते घायमुवेइ बाले ।
निहो निसं गच्छइ अंतकाले, अहोसिरं कट्ठु उवेइ दुग्गं ॥
- [३०५] हण छिंदहं भिंदहं णं दहेह, सद्धे सुणेत्ता परहम्मियाणं ।
ते नारगा ऊ भयभिन्नसण्णा कंखति कं नाम दिसं वयामो? ॥
- [३०६] इंगालरासिं जलियं सजोइं, तत्तोवमं भूमिमनुक्कमंता ।
ते डज्झमाणा कलुणं थणंति, अरहस्सरा तत्थ चिरद्विईया ॥
- [३०७] जइ ते सुया वेयरणी भिदुग्गा निसिओ जहा खुर इव तिक्खसोया ।
तरंति ते वेयरणीं भिदुग्गां उसुचोइया सत्तिसु हम्ममाणा ॥
- [३०८] कीलेहिं विज्झंति असाहुक्कमा, नावं उव्वेते सइविप्पहूणा ।
अन्ने तु सूलाहिं तिसूलियाहिं, दीहाहिं विद्धण अहे करेति ॥
- [३०९] केसिं च बंधित्तु गले सिलाओ, उदगंसि बोलेति महालयंसि ।
कलंबुया वालुय मुम्मुरे य, लोलेति पच्चंति य तत्थ अन्ने ॥
- [३१०] असूरियं नाम महाभितावं, अंधं तमं दुप्पतरं महंतं ।
उड्ढं अहेअं तिरियं दिसासु, समाहिओ जत्थऽगनी झियाई ॥
- [३११] जंसी गुहाए जलणेऽतिउट्ठे अविजाणओ डज्झइ लुत्तपण्णो ।
सया य कलुणं पुण धम्मठाणं, गाढोवनीयं अइदुक्खधम्मं ॥
- [३१२] चत्तारि अगणीओ समारभेत्ता, जहिं कूरकम्माऽभितवेति बालं ।
ते तत्थ चिट्ठंतऽभितप्पमाणा, मच्छा व जीवंतुवजोइपत्ता ॥

[३१३] संतच्छणं नाम महाभितावं, ते नारगा जत्थ असाहुकम्मा ।
सुयक्खंधो-१, अज्झयणं-५, उद्देसो-१

- हत्थेहिं पाएहि य बंधिऊणं, फलगं व तच्छंति कुहाडहत्था ॥
[३१४] रुहिरे पुणो वच्च-समुस्सियंगे, भिन्नुत्तभंगे वरिवत्तयंता ।
पयंति णं नेरइए फुरंते, सजीवमच्छे व अयो-कवल्ले ॥
[३१५] नो चेव ते तत्थ मसीभवन्ति, न मिज्जई तिव्वभिवेयणाए ।
तमानुभागं अनुवेययंता, दुक्खंति दुक्खी इह दुक्कडेणं ॥
[३१६] तहिं च ते लोलणसंपगाढे गाढं सुतत्तं अगणिं वयंति ।
न तत्थ सायं लहती भिदुग्गे, अरहियाभितावा तह वी तवेति ॥
[३१७] से सुच्चई नगरवहे व सद्दे, दुहोवणीयाणि पयाणि तत्थ ।
उदिण्णकम्माण उदिण्णकम्मा, पुणो पुणो ते सरहं दुहेति ॥
[३१८] पाणेहिं णं पाव विओजयंति, तं भे पवक्खामि जहातहेणं ।
दंडेहि तत्था सरयंति बाला, सव्वेहिं दंडेहिं पुराकएहिं ॥
[३१९] ते हम्ममाणा नरगे पडंति, पुण्णे दुरुवस्स महाभितावे ।
ते तत्थ चिडंति दुरुवभक्खी, तुडंति कम्मोवगया किमीहिं ॥
[३२०] सया कसिणं पुण घम्मठाणं, गाढोवनीयं अइदुक्खधम्मं ।
अंदूसु पक्खिप्प विहत्तु देहं, वेहेण सीसं सेऽभितावयंति ॥
[३२१] छिंदंति बालस्स खुरेण नक्कं, ओट्टे वि छिंदंति दुवे वि कण्णे ।
जिब्भं विणिक्कस्स विहत्थिमेत्तं, तिक्खाहिं सूलाहिऽभितावयंति ॥
[३२२] ते तिप्पमाणा तलसंपुडं व्व, राइदियं तत्थ थणंति बाला ।
गलंति ते सोणियपूयमंसं पज्जोइया खारपइद्धियंगा ॥
[३२३] जइ ते सुया लोहियपूयपाई, बालागणी तेयगुणा परेणं ।
कुंभी महंताहियपोरुसीया, समूसिया लोहियपूयपुण्णा ॥
[३२४] पक्खिप्प तासुं पययंति बाले, अट्टस्सरे ते कलुणं रसंते ।
तण्हाइया ते तउतंबतत्तं, पज्जिज्जमाणाऽट्टयरं रसंति ॥
[३२५] अप्पेण अप्पं इह वंचइत्ता, भवाहमे पुव्वसए सहस्से ।
चिडंति तत्था बहुकूरकम्मा, जहाकडे कम्म तहा सि भारे ॥
[३२६] समज्जिणित्ता कलुसं अणज्जा, इट्टेहि कंतेहि य विप्पहूणा ।
ते दुब्धिगंधे कसिणे य फासे, कम्मोवगा कुणिमे आवसंति ॥ - त्ति बेमि

◦ पंचमे अज्झयणे पढमो उद्देसो समत्तो ◦

◦ बीओ उद्देसो ◦

- [३२७] अहावरं सासयदुक्खधम्मं, तं मे पवक्खामि जहातहेणं ।
बाला जहा दुक्कडकम्मकारी, वेयंति कम्माइं पुरेकडाइं ॥
[३२८] हत्थेहिं पाएहि य बंधिऊणं, उदरं विक्कतंति खुरासिएहिं ।

गेण्हित्तु बालस्स विहत्तु देहं, बद्धं थिरं पिट्ठउ उद्धरन्ति ॥
सुयक्खंधो-१, अज्झयणं-५, उद्देशो-२

- [३२९] बाहू पक्कतन्ति य मूलओ से, थूलं वियासं मुहे आडहन्ति ।
रहंसि जुत्तं सरयन्ति बालं, आरुस्स विज्झन्ति तुदेण पिट्ठे ॥
- [३३०] अयं व तत्तं जलियं सजोइ, तओवमं भूमिमनुक्कमन्ता ।
ते डज्झमाणा कलुणं थणन्ति, उसुजोइया तत्तजुगेसु जुत्ता ॥
- [३३१] बाला बला भूमिमनुक्कमन्ता, पविज्जलं लोहपहं व तत्तं ।
जंसीऽभिदुग्गंसि पवज्जमाणा, पेसे व दंडेहि पुरा करेति ॥
- [३३२] ते संपगाढंसि पवज्जमाणा, सिलाहि हम्मन्ति निपातिनीहिं ।
संतावणी नाम चिरद्विईया, संतप्पई जत्थ असाहुकम्मा ॥
- [३३३] कंदूसु पक्खिप्प पयन्ति बालं, तओ वि दड्ढा पुण उप्पतन्ति ।
ते उड्ढकाएहिं पक्खज्जमाणा, अवरेहिं खज्जन्ति सणप्फएहिं ॥
- [३३४] समूसियं नाम विधूमठाणं, जं सोयतत्ता कलुणं थणन्ति ।
अहोसिरं कट्ठु विगत्तिऊणं, अयं व सत्थेहि समूसवेति ॥
- [३३५] समूसिया तत्थ विसूणियंगा, पक्खीहिं खज्जन्ति अओमुहेहिं ।
संजीवणी नाम चिरद्विईया, जंसी पया हम्मइ पावचेया ॥
- [३३६] तिक्खाहिं सूलाहिं ऽभितावयन्ति, वसोगयं सावययं व लद्धं ।
ते सूलविद्धा कलुणं थणन्ति, एगंतदुक्खं दुहओ गिलाणा ॥
- [३३७] सया जलं नाम निहं महंतं, जंसी जलंतो अगनी अकट्ठो ।
चिद्धन्ति बद्धा बहुकूरकम्मा, अरहस्सरा केइ चिरद्विईया ॥
- [३३८] चिया महंतीउ समारभित्ता, छुब्भन्ति ते तं कलुणं रसंतं ।
आवट्ठई तत्थ असाहुकम्मा सप्पी जहा पडियं जोइमज्झे ॥
- [३३९] सया कसिणं पुण घम्मठाणं, गाढोवनीयं अइदुक्खधम्मं ।
हत्थेहिं पाएहि य बंधिऊणं, सत्तुं व दंडेहि समारभन्ति ॥
- [३४०] भंजन्ति बालस्स वहेण पुट्ठी, सीसं पि भिंदन्ति अयोघनेहिं ।
ते भिन्नदेहा फलगा व तच्छा तत्ताहिं आराहिं नियोजयन्ति ॥
- [३४१] अभिजुंजिया रुद्ध असाहुकम्मा, उसुचोइया हत्थिवहं वहन्ति ।
एगं दुरूहित्तु दुवे ततो वा, आरुस्स विज्झन्ति ककाणओ से ॥
- [३४२] बाला बला भूमिमनुक्कमन्ता पविज्जलं कंटइलं महंतं ।
विवद्धतप्पेहि विसण्णचित्ते, समीरिया कोट्टबलिं करेति ॥
- [३४३] वेयालिए नाम महाभितावे, एगायए पव्वयमंतलिकखे ।
हम्मन्ति तत्था बहुकूरम्मा, परं सहस्साण मुहुत्तगाणं ॥
- [३४४] संवाहिया दुक्कडिणो थणन्ति, अहो य राओ परितप्पमाणा ।
एगंतकूडे नरए महंते, कूडेण तत्था विसमे हया उ ॥
- [३४५] भंजन्ति णं पुव्वमरी सरोसं, समुग्गरे ते मुसले गहेउं ।

ते भिन्नदेहा रुहिरं वमंता, ओमुद्धगा धरणितले पडंति ॥
सुयक्खंधो-१, अज्झयणं-५, उद्देसो-२

- [३४६] अनासिया नाम महासियाला, पागब्भिणो तत्थ सयावकोवा ।
खज्जंति तत्था बहुकूरकम्मा, अदूरगा संकलियाहिं बद्धा ॥
- [३४७] सयाजला नाम नई भिदुग्गा, पविज्जलं लोहविलीणतत्ता ।
जंसी भिदुग्गंसि पवज्जमाणा, एगायताऽनुक्कमणं करेति ॥
- [३४८] एयाइं फासाइं फुसंति बालं, निरंतरं तत्थ चिरद्विइयं ।
न हम्ममाणस्स उ होइ ताणं, एगो सयं पच्चणुहोइ दुक्खं ॥
- [३४९] जं जारिसं पुव्वमकासि कम्मं, तमेव आगच्छइ संपराए ।
एगंतदुक्खं भवमज्जिणित्ता वेदेंति दुक्खी तमनंतदुक्खं ॥
- [३५०] एयाणि सोच्चा नरगाणि धीरे, न हिंसए किंचन सव्वलोए ।
एगंतदिट्ठी अपरिग्गहे उ, बुज्जेज्ज लोगस्स वसं न गच्छे ॥
- [३५१] एवं तिरिक्खे मनुयासुरेसं चउरंतऽनंतं तयणूव्विवागं ।
स सव्वमेयं इइ वेयइत्ता, कंखेज्ज कालं धुयमायरेज्ज ॥ त्ति बेमि
॥

० पंचमे अज्झयणे बीओ उद्देसो समत्तो ०

मुनि दीपरत्नसागरेण संशोधितः सम्पादितश्च “पंचमं अज्झयणं समत्तं”

० छट्ठं अज्झयणं महावीरत्थुई ०

- [३५२] पुच्छिसु णं समणा माहणा य, अगारिणो या परतित्थिया य ।
से केइ नेगंतहियं घम्ममाहु, अनेलिसं साहु समिक्खयाए ॥
- [३५३] कहं च नाणं कह दंसणं से, सीलं कहं नायसुयस्स आसि ? ।
जाणासि णं भिक्खु जहातहेणं, अहासुयं बूहि जहा निसंतं ॥
- [३५४] खेयण्णए से कुसलासुपन्ने अनंतनाणी य अनंतदंसी ।
जसंसिणो चक्खुपहे ठियस्स, जाणाहि धम्मं च धिइं च पेहि ॥
- [३५५] उइं अहेयं तिरियं दिसासु, तसा य जे थावर जे य पाणा ।
से निच्चनिच्चेहिं समिक्ख पण्णे, दीवे व धम्मं समियं उदाहु ॥
- [३५६] से सव्वदंसी अभिभूयनाणी, निरामगंधे धिइमं ठियप्पा ।
अनुत्तरे सव्वजगंसि विज्जं, गंथा अतीते अभए अणाऊ ॥
- [३५७] से भूइपण्णे अनिएयचारी, ओहंतरे धीरे अनंतचक्खू ।
अनुत्तरं तप्पति सूरिए वा, वइरोयणिंदे व तमं पगासे ॥
- [३५८] अनुत्तरं धम्ममिणं जिणाणं, नेता मुनी कासवे आसुपण्णे ।
इंदे व देवाण महानुभावे, सहस्सनेता दिवि णं विसिट्ठे ॥
- [३५९] से पन्नया अक्खयसागरे वा, महोदही वा वि अनंतपारे ।
अनाइले वा अकसाइ मुक्के सक्केव देवाहिवई जुईमं ॥

[३६०] से वीरिएणं पडिपुन्नवीरिए, सुदंसणे वा नगसव्वसेट्ठे ।
सुरालए वा वि मुदागरे से, विरायए नेगगुणोववेए ॥

सुयक्खंधो-१, अज्झयणं-६, उद्देसो-

- [३६१] सयं सहस्साण उ जोयणाणं, तिकंडगे पंडगवेजयंते ।
से जोयणे नवनउति सहस्से, उध्धुस्सितो हेट्ठ सहस्समेगं ॥
- [३६२] पुट्ठे नभे चिट्ठइ भूमिवट्ठिए, जं सूरिया अनुपरिवट्ठयंति ।
से हेमवण्णे बहुनंदने य, जंसी रइं वेययई महिंदा ॥
- [३६३] से पव्वए सद्धमहप्पगासे, विरायती कंचनमट्ठवण्णे ।
अनुत्तरे गिरिसु य पव्वदुग्गे, गिरीवरे से जलिए व भोमे ॥
- [३६४] महीए मज्झंमि ठिए नगिंदे, पन्नायते सूरियसुद्धलेसे ।
एवं सिरीए उ स भूरिवण्णे, मनोरमे जोयति अच्चिमाली ॥
- [३६५] सुदंसणस्सेव जसो गिरिस्स, पवुच्चती महतो पव्वतस्स ।
एतोवमे समणे नायपुत्ते, जाती-जसो-दंसण-नाण-सीले ॥
- [३६६] गिरीवरे वा निसहास्सयताणं, रुयगे व सेट्ठे वलयायताणं ।
ततोवमे से जगभूतिपण्णे, मुणीण मज्झे तमुदाहु पण्णे ॥
- [३६७] अनुत्तरं धम्ममुदीरइत्ता, अनुत्तरं ज्ञाणवरं झियाइ ।
सुसुक्क सुक्कं अपगंडसुक्कं, संखेदुवेगंतवदातसुक्कं ॥
- [३६८] अनुत्तरग्गं परमं महेसी, असेसकम्मं स विसोहइत्ता ।
सिद्धिं गतिं साइमनंत पत्ते, नाणेण सीलेण य दंसणेण ॥
- [३६९] रुक्खेसु नाते जह सामली वा, जंसी रतिं वेययति सुवण्णा ।
वनेसु या नंदनमाहु सेट्ठं, नाणेण सीलेण य भूतिपन्ने ॥
- [३७०] थणितं व सद्दाण अनुत्तरे उ, चंदे व ताराण महानुभावे ।
गंधेसु वा चंदनमाहु सेट्ठं, एवं मुणीणं अपडिण्णमाहु ॥
- [३७१] जहा सयंभू उद्धहीण सेट्ठे, नागेसु वा धरणिंदमाहु सेट्ठे ।
खोओदए वा रस वेजयंते, तहोवहाणे मुनि वेजयंते ॥
- [३७२] हत्थीसु एरावणमाहु नाते, सीहो मिगाणं सलिलाण गंगा ।
पक्खीसु वा गरुले वेणुदेवो, निव्वाणवादीणिह नायपुत्ते ॥
- [३७३] जोहेसु नाए जह वीससेने पुप्फेसु वा जह अरविंदमाहु ।
खत्तीण सेट्ठे जह दंतवक्के ईसीण सेट्ठे तह वद्धमाणे ॥
- [३७४] दाणाण सेट्ठं अभयप्पयाणं, सच्चेसु या अणवज्जं वयंति ।
तवेसु वा उत्तम बंभचेरं, लोगुत्तमे समणे नायपुत्ते ॥
- [३७५] ठितीण सेट्ठा लवसत्तमा वा, सभा सुहम्मा व सभाण सेट्ठा ।
निव्वाणसेट्ठा जह सव्वधम्मा, न नायपुत्ता परमत्थि नाणी ॥
- [३७६] पुट्ठोवमे धुणती विगयगेही, न सण्णिहिं कुव्वइ आसुपण्णे ।
तरिउं समुद्धं व महाभवोघं, अभयंकरे वीर अनंतचक्खू ॥

[३७७] कोहं च माणं च तहेव मायं, लोभं चउत्थं अज्झत्थदोसा ।
एताणि वंत्ता अरहा महेसी, न कुव्वई पाव न कारवेइ ॥

सुयक्खंधो-१, अज्झयणं-६, उद्देसो-

[३७८] किरियाकिरियं वेणइयानुवायं, अन्नाणियाणं पडियच्च ठाणं ।

से सव्ववायं इति वेयइत्ता, उवट्टिए संजम दीहरायं ॥

[३७९] से वारिया इत्थि सराइभत्तं, उवहाणवं दुक्खखयट्टयाए ।

लोगं विदित्ता अपरं परं च, सव्वं पभू वारिय सव्ववाउं ॥

[३८०] सोच्चा य धम्मं अरहंतभासियं, समाहियं अट्टपदोवसुद्धं ।

तं सद्धहाणाय जना अणाऊ, इंदा व देवाहिव आगमिस्सं ॥ - त्ति बेमि

मुनि दीपरत्नसागरेण संशोधिताः सम्पादितश्च “छट्ठं अज्झयणं समत्तं”

0 सत्तमं अज्झयणं- कुसीलपरिभासितं 0

[३८१] पुढवी य आऊ अगनी य वाऊ, तण रुक्ख बीया य तसा य पाणा ।

जे अंडया जे य जराउ पाणा, संसेयया जे रसयाभिहाणा ॥

[३८२] एताइं कायाइं पवेइयाइं, एतेसु जाणे पडिलेह सायं ।

एतेहि कायेण य आयदंडे, पुणो-पुणो विप्परियासुवेति ॥

[३८३] जाईपहं अनुपरियट्टमाणे, तसथावरेहिं विनिघायमेति ।

से जाति-जातिं बहुकूरकम्मे, जं कुव्वती मिज्जति तेण बाले ॥

[३८४] अस्सिं च लोए अदुवा परत्था, सयग्गसो वा तह अन्नहा वा ।

संसारमावन्न परं परं ते, बंधंति वेयंति य दुन्नियाणि ॥

[३८५] जे मायरं च पियरं च हिच्चा, समणव्वए अगनिं समारभिज्जा ।

अहाहु से लोए कुसीलधम्मे, भूयाइ जे हिंसति आतसाते ॥

[३८६] उज्जालओ पाण निवातएज्जा, निव्वावओ अगनि निवायवेज्जा ।

तम्हा उ मेहावि समिक्ख धम्मं, न पंडिते अगनि समारभिज्जा ॥

[३८७] पुढवी वि जीवा आऊ वि जीवा, पाणा य संपातिम संपयंति ।

संसेदया कट्टसमस्सिता य, एते दहे अगनि समारभंते ॥

[३८८] हरियाणि भूयाणि विलंबगाणि, आहार-देहा य पुढो सियाई ।

जे छिंदई आतसुहं पडुच्च, पागब्भि-पाणे बहुणं तिवाती ॥

[३८९] जाइं च वुड्ढिं च विनासयंते, बीयाइं अस्संजय आयदंडे ।

अहाहु से लोए अणज्जधम्मे, बीयाइ जे हिंसइ आयसाते ॥

[३९०] गब्भाइं मिज्जंति बुयाबुयाणा, नरा परे पंचसिहा कुमारा ।

जुवाणगा मज्झिय थेरगा य, चयंति ते आउखए पलीणा ॥

[३९१] संबुज्झहा जंतवो ! माणुसत्तं, दट्टुं भयं बालिसेणं अलंभे ।

एगंतदुक्खे जरिए हु लोए, सकम्मणा विप्परियासुवेति ॥

[३९२] इहेग मूढा पवदंति मोक्खं, आहार संपज्जणवज्जणेणं ।

एगे य सीतोदगसेवणेणं, हुतेण एगे पवदंति मोक्खं ॥
 [३९३] पाओसिणाणाइसु नत्थि मोक्खो, खारस्स लोणस्स अनासएणं ।
 सुयक्खंधो-१, अज्झयणं-७, उद्देशो-

- ते मज्जमंसं लसुणं च भोच्चा अन्नत्थ वासं परिकप्पयंति ॥
 [३९४] उदगेण जे सिद्धिमुदाहरंति, सायं च पातं उदगं फुसंता ।
 उदगस्स फासेण सिया य सिद्धी, सिज्झंसु पाणा बहवे दगंसि ॥
 [३९५] मच्छा य कुम्मा य सिरीसिवा य, मग्गू य उट्ठा दगरक्खसा य ।
 अट्ठाणमेयं कुसला वयंति, उदगेण जे सिद्धिमुदाहरंति ॥
 [३९६] उदगं जइ कम्ममलं हरेज्जा, एवं सुहं इच्छामित्तमेव ।
 अंधं व नेयारमनुस्सरित्ता पाणाणि चेवं विणिहंति मंदा ॥
 [३९७] पावाइं कम्माइं पकुव्वओ हि, सीओदगं तू जइ तं हरेज्जा ।
 सिज्झंसु एगे दगसंततघाती, मुसं वयंते जलसिद्धिमाहु ॥
 [३९८] हुतेण जे सिद्धिमुदाहरंति, सायं च पायं अगनिं फुसंता ।
 एवं सिया सिद्धि हवेज्ज तेसिं, अगनिं फुसंताण कुकंमिणं पि ॥
 [३९९] अपरिक्ख दिट्ठं न हु एव सिद्धी, एहिति ते घातमबुज्झमाणा ।
 भूतेहिं जाणं पडिलेह सातं, विज्जं गहाय तसथावरेहिं ॥
 [४००] थणंति लुप्पंति तसंति कम्मी, पुट्ठो जगा परिसंखाय भिक्खू ।
 तम्हा विऊ विरतो आयगुत्ते, दट्ठुं तसे या पडिसंहरेज्जा ॥
 [४०१] जे धम्मलद्धं विनिहाय भुंजे, वियडेण साहट्ठु य जे सिणाइं ।
 जे धोवती लूसयई व वत्थं, अहाहु से नागणियस्स दूरे ॥
 [४०२] कम्मं परिण्णाय दगंसि धीरे, वियडेण जीवेज्ज य आदिमोक्खं ।
 से बीयकंदाइ अभुंजमाणे, विरेण सिणाणाइसु इत्थियासु ॥
 [४०३] जे मायरं च पियरं च हिच्चा, गारं तहा पुत्तपसुं धनं च ।
 कुलाइं जे धावति साउगाइं, अहाहु से सामणयिस्स दूरे ॥
 [४०४] कुलाइं जे धावति साउगाइं, आघाति धम्मं उदरानुगिद्धे ।
 अहाहु से आयरियाण सतंसे जे लावएज्जा असनस्स हेउं ॥
 [४०५] निक्खम्म दीने परभोयणंमि, मुहमंगलिए उदरानुगिद्धे ।
 नीवारगिद्धे व महावराहे, अदूर एवेहिइ घातमेव ॥
 [४०६] अन्नस्स पाणस्सिहलोइयस्स, अणुप्पियं भासति सेवमाणे ।
 पासत्थयं चेव कुसीलयं च, निस्सारए होइ जहा पुलाए ॥
 [४०७] अण्णायपिडेणऽहियासएज्जा, नो पूयणं तवसा आवहेज्जा ।
 सद्देहिं रूवेहिं असज्जमाणे, सव्वेहिं कामेहिं विनीय गेहिं ॥
 [४०८] सव्वाइं संगाइं अइच्च धीरे, सव्वाइं दुक्खाइं तित्तिक्खमाणे ।
 अखिले अगिद्धे अनिएयचारी, अभयंकरे भिक्खु अनाविलप्पा ॥
 [४०९] भारस्स जाता मुनि भुंजएज्जा, कंखेज्ज पावस्स विवेग भिक्खू ।

दुक्खेण पुट्टे धुयमाइएज्जा, संगामसीसे व परं दमेज्जा ॥

[४१०] अवि हम्ममाणे फलगावतट्ठी, समागमं कंखइ अंतगस्स ।

सुयक्खंधो-१, अज्झयणं-७, उद्देसो-१

निधूय कम्मं न पवंचुवेइ, अक्खक्खए वा सगडं, ति बेमि ॥

मुनि दीपरत्नसागरेण संशोधितः सम्पादितश्च “सत्तमं अज्झयणं समत्तं”

० अट्टमं अज्झयणं-वीरियं ०

- [४११] दुहा वेयं सुयक्खायं, वीरियं ति पवुच्चई ।
किं नु वीरस्स वीरत्तं ? कहां चेयं पवुच्चई ? ॥
- [४१२] कम्ममेगे पवेदेंति, अकम्मं वा वि सुक्वया ।
एतेहिं दोहिं ठाणेहिं, जेहिं दीसंति मच्चिया ॥
- [४१३] पमायं कम्ममाहंसु, अप्पमायं तहाऽवरं ।
तब्भावादेसओ वा वि, बालं पंडियमेव वा ॥
- [४१४] सत्थमेगे तु सिक्खंता, , अतिवाताय पाणिणं ।
एगे मंते अहिज्जंति, पाणभूयविहेडिणो ॥
- [४१५] माइणो कट्टु माया य, कामभोगे समारभे ।
हंता छेत्ता पगब्भित्ता, आय-सायानुगामिणो ॥
- [४१६] मनसा वयसा चेव, कायसा चेव अंतसो ।
आरतो परतो वा वि, दुहा वि य असंजता ॥
- [४१७] वेराइं कुक्वती वेरी, ततो वेरेहिं रज्जती ।
पावोवगा य आरंभा, दुक्खफासा य अंतसो ॥
- [४१८] संपरायं नियच्छंति, अत्तदुक्कडकारिणो ।
रागदोसस्सिया बाला, पावं कुक्वंति ते बहुं ॥
- [४१९] एतं सकम्मविरियं, बालाणं तु पवेइयं ।
एत्तो अकम्मविरियं, पंडियाणं सुणेह मे ॥
- [४२०] दविए बंधणुम्मक्के, सक्वतो छिन्नबंधणे ।
पणोल्ल पावगं कम्मं, सल्लं कंतति अंतसो ॥
- [४२१] नेयाउयं सुयक्खातं, उवादाय समीहते ।
भुज्जो भुज्जो दुहावासं, असुहत्तं तहा तहा ॥
- [४२२] ठाणी विविहठाणाणि, चइस्संति न संसओ ।
अनियते अयं वासे, नायएहिं सुहीहि य ॥
- [४२३] एवमायाय मेहावी, अप्पणो गिद्धिमुद्धरे ।
आरियं उवसंपज्जे, सक्वधम्ममकोवियं ॥
- [४२४] सहसंमइए नच्चा, धम्मसारं सुणेत्तु वा ।
समुवट्ठिए उ अनगारे, पच्चक्खाए य पावए ॥

[४२५] जं किंचुवक्कमं जाणे, आउक्खेमस्स अप्पणो ।
तस्सेव अंतरा खिप्पं, सिक्खं सिक्खेज्ज पंडिए ॥

सुयक्खंधो-१, अज्झयणं-८, उद्देसो-

- [४२६] जहा कुम्मे सअंगाइं, सए देहे समाहरे ।
एवं पावाइं मेधावी, अज्झप्पेण समाहरे ॥
- [४२७] साहरे हत्थपाए य, मणं सत्विंदियाणि य ।
पावगं च परीणामं, भासादोसं च तारिसं ॥
- [४२८] अइ मानं च मायं च, तं परिण्णाय पंडिए ।
सुतं मे इह मेगेषिं, एयं वीरस्स वीरियं ॥
- [प्र०] [उड्ढमहे तिरियं वा जे पाणा तस थावरा
सव्वत्थ विरतिं कुज्जा, संति-निव्वाणमाहितं]
- [४२९] पाणे य नाइवाएज्जा, अदिन्नं पि य नादए ।
सातियं न मुसं बूया, एस धम्मे वुसीमओ ॥
- [४३०] अतिक्कमंति वायाए मनसा वि न पत्थए ।
सव्वओ संवुडे दंते, आयाणं सुसमाहरे ॥
- [४३१] कडं च कज्जमाणं च, आगमेस्सं च पावगं ।
सव्वं तं नानुजाणंति, आयगुत्ता जिइंदिया ॥
- [४३२] जे याऽबुद्धा महाभागा, वीराऽसम्मत्तदंसिणो ।
असुद्धं तेसिं परक्कंतं, सफलं होइ सव्वसो ॥
- [४३३] जे य बुद्धा महाभागा, वीरा सम्मत्तदंसिणो ।
सुद्धं तेसिं परक्कंतं, अफलं होइ सव्वसो ॥
- [४३४] तेसिं पि तवो न सुद्धो, निक्खंता जे महाकुला ।
जन्ने वन्ने वियाणंति, न सिलोगं पवेज्जए ॥
- [४३५] अप्पपिंडासि पाणासि, अप्पं भासेज्ज सुव्वए ।
खंतेऽभिनिव्वुडे दंते, वीतगेहि सया जए ॥
- [४३६] ज्ञाणजोगं समाहट्टु, कायं विउसेज्ज सव्वसो ।
तितिक्खं परमं नच्चा, आमोक्खाए परिव्वएज्जासि ॥ त्ति
बेमि

मुनि दीपरत्नसागरेण संशोधितः सम्पादितश्च “अड्डमं अज्झयणं समत्तं”

० नवमं अज्झयणं-धम्मो ०

- [४३७] कयरे धम्मे अक्खाए, माहणेण मईमता ? ।
अंजुं धम्मं जहातच्चं, जिणाणं तं सुणेह मे ॥
- [४३८] माहणा खत्तिया वेस्सा, चंडाला अदु बोक्कसा ।
एसिया वेसिया सुद्धा, जे य आरंभनिस्सिया ॥

- [४३९] परिग्गहे निविट्ठाणं, वेरं तेषिं पवड्ढई ।
आरंभसंभिया कामा, न ते दुक्खविमोयगा ॥
- [४४०] आघातकिच्चमाहेउं, नाइओ विसएसिणो ।

सुयक्खंधो-१, अज्झयणं-९, उद्देसो-

- अन्ने हरंति तं वित्तं, कम्मि कम्महिं किच्चती ॥
- [४४१] माया पिया ण्हसा भाया, भज्जा पुत्ता य ओरसा ।
नालं ते तव ताणाए, लुप्पंतस्स सकम्मुणा ॥
- [४४२] एयमट्ठं सपेहाए, परमट्ठानुगामियं ।
निम्ममो निरहंकारो, चरे भिक्खू जिणाहियं ॥
- [४४३] चिच्चा वित्तं पुत्ते य, नाइओ य परिग्गहं ।
चिच्चाण अंतगं सोयं, निरवेक्खो परिच्चए ॥
- [४४४] पुढवी आऊ अगनी वाऊ तण रुक्ख सबीयगा ।
अंडया पोय जराऊ, रस संसेय उब्भिया ॥
- [४४५] एतेहिं छहिं काएहिं, तं विज्जं परिजाणिया ।
मनसा कायवक्केणं, नारंभी न परिग्गही ॥
- [४४६] मुसावायं बहिद्धं च उग्गहं च अजाइया ।
सत्थादाणाइं लोगंसि, तं विज्जं परिजाणिया ॥
- [४४७] पलिउंचणं च भयणं च, थंडिल्लुस्सयणाणि य ।
धुणादाणाइं लोगंसि, तं विज्जं परिजाणिया ॥
- [४४८] धोयणं रयणं चेव, बत्थीकम्मं विरेयणं ।
वमणंजण पत्तीमंथं, तं विज्जं परिजाणिया ॥
- [४४९] गंधमल्लं सिणाणं च, दंतपक्खालणं तहा ।
परिग्गहित्थिकम्मं च, तं विज्जं परिजाणिया ॥
- [४५०] उद्देसियं कीयगडं, पामिच्चं चेव आहडं ।
पूतिं अनेसणिज्जं च, तं विज्जं परिजाणिया ॥
- [४५१] आसूणिमक्खिरागं च, गिद्धुवधायकम्मगं ।
उच्छोलणं च कक्कं च, तं विज्जं परिजाणिया ॥
- [४५२] संपसारी कयकिरिए, पसिणायतणाणि य ।
सागारियं च पिंडं च, तं विज्जं परिजाणिया ॥
- [४५३] अट्ठावयं न सिक्खेज्जा, वेधादीयं च नो वए ।
हत्थकम्मं विवायं च, तं विज्जं परिजाणिया ॥
- [४५४] उवाणहाओ य छत्तं च नालियं बालवीयणं ।
परकिरियं अन्नमन्नं च, तं विज्जं परिजाणिया ॥
- [४५५] उच्चारं पासवणं, हरितेसु न करे मुनी ।
वियडेण वावि साहट्टु, नायमेज्जा कयाइ वि ॥

- [४५६] परमत्ते अन्नपानं न भुंजेज्ज कयाइ वि ।
परवत्थं अचेलोऽवि, तं विज्जं परिजाणिया ॥
- [४५७] आसंदी पलियंके य, निसिज्जं च गिहंतरे ।

सुयक्खंधो-१, अज्झयणं-९, उद्देशो-

- संपुच्छणं सरणं वा, तं विज्जं परिजाणिया ॥
- [४५८] जसं कित्ती सिलोगं च, जा य वंदणपूयणा ।
सव्वलोगंसि जे कामा, तं विज्जं परिजाणिया ॥
- [४५९] जेणेहं निव्वहे भिक्खू अन्नपानं तहाविहं ।
अनुप्पदाणमन्नेसिं, तं विज्जं परिजाणिया ॥
- [४६०] एवं उदाहु निग्गंथे, महावीरे महामुनी ।
अनंतनाणदंसी से, धम्मं देसितवं सुत्तं ॥
- [४६१] भासमाणो न भासेज्जा नेव वंफेज्ज मम्मयं ।
माइद्वाणं विवज्जेज्जा, अनुचिंतिय वियागरे ॥
- [४६२] तत्थिमा तइया भासा जं वइत्ताऽनुत्तप्पई ।
जं छन्नं तं न वत्तव्वं, एसा आणा नियंठिया ॥
- [४६३] होलावायं सहीवायं, गोयवायं च नो वए ।
तुमं तुमं ति अमणुन्नं सव्वसो तं न वत्तए ॥
- [४६४] अकुसीले सदा भिक्खू नो य संसग्गियं भए ।
सुहरूवा तत्थुवस्सग्गा, पडिबुज्जेज्ज ते विदू ॥
- [४६५] नन्नत्थ अंतराएणं, परगेहे न निसीयए ।
गाम-कुमारियं किड्डं, नाइवेलं हसे मुनी ॥
- [४६६] अनुस्सुओ उरालेसु, जयमाणो परिव्वए ।
चरियाए अप्पमत्तो, पुट्ठो तत्थऽहियासए ॥
- [४६७] हम्ममाणो न कुप्पेज्जा, वुच्चमाणो न संजले ।
सुमने अहियासेज्जा, न य कोलाहलं करे ॥
- [४६८] लद्धे कामे न पत्थेज्जा, विवेगे एव माहिए ।
आयरियाइं सिक्खेज्जा, बुद्धाणं अंतिए सया ॥
- [४६९] सुस्सूसमाणो उवासेज्जा, सुप्पन्नं सुतवस्सियं ।
वीरा जे अत्तपन्नेसी धितिमंता जिइंदिया ॥
- [४७०] गिहे दीवमपासंता, पुरिसादानिया नरा ।
ते वीरा बंधणुम्मक्का, नावकंखंति जीवियं ॥
- [४७१] अगिद्धे सद्दफासेसु, आरंभेसु अनिस्सिए ।
सव्वं तं समयतीतं, जमेतं लवियं बहु ॥
- [४७२] अइमानं च मायं च, तं परिण्णाय पंडिए ।
गारवाणि य सव्वाणि, निव्वाणं संधए मुनि ॥-

त्ति बेमि
मुनि दीपरत्नसागरेण संशोधितः सम्पादितश्च “नवमं अज्झयणं समत्तं”

० दसमं अज्झयणं-समाही ०

[४७३] आधं मइमं अणुवीइ धम्मं, अंजुं समाहिं तमिणं सुणेह ।

सुयक्खंधो-१, अज्झयणं-१०, उद्देशो-

- अपडिन्ने भिक्खू समाहिपत्ते, अनिदान भूतेसु परिव्वएज्जा ॥
[४७४] उड्ढं अहेयं तिरियं दिसासु, तसा य जे थावर जे य पाणा ।
हत्थेहि पादेहि य संजमित्ता, अदिन्नमन्नेसु य नो गहेज्जा ॥
[४७५] सुयक्खायधम्मं वितिगिच्छतिण्णे, लाढे चरे आयतुले पयासु ।
आयं न कुज्जा इह जीवियट्ठी, चयं न कुज्जा सुतवस्सि भिक्खू ॥
[४७६] सत्विंदियाभिनिव्वुडे पयासु, चरे मुनी सव्वओ विप्पमुक्के ।
पासाहि पाणे य पुढो वि सत्ते, दुक्खेण अट्टे परितप्पमाणे ॥
[४७७] एतेसु बाले य पकुव्वमाणे, आवट्टती कम्मसु पावएसु ।
अतिवाततो कीरति पावकम्मं, निउंजमाणे उ करेइ कम्मं ॥
[४७८] आदीनवित्तीव व करेति पावं, मंता हु एगंतसमाहिमाहु ।
बुद्धे समाहीय रए विवेगे, पाणाइवाया विरते ठितप्पा ॥
[४७९] सव्वं जगं तू समयानुपेही, पियमप्पियं कस्सइ नो करेज्जा ।
उट्टाय दीनो य पुणो विसन्नो संपूयणं चेय सिलोयकामी ॥
[४८०] आहाकडं चेव निकाममीणे निकामचारी य विसन्नमेसी ।
इत्थीसु सत्ते य पुढो य बाले, परिग्गहं चेव पकुव्वमाणे ॥
[४८१] वेरानुगिद्धे निचयं करेति, इतो चुते से दुहमइदुग्गं ।
तम्हा तु मेधावि समिक्ख घम्मं, चरे मुनी सव्वतो विप्पमुक्के ॥
[४८२] आयं न कुज्जा इह जीवितट्ठी, असज्जमाणो य परिव्वएज्जा ।
निसम्मभासी य विनीयगिद्धीं हिंसन्नितं वा न कहं करेज्जा ॥
[४८३] आहाकडं वा न निकामएज्जा, निकामयंते य न संथवेज्जा ।
धुणे उरालं अनुवेहमाणे, चेच्चाण सोयं अनवेक्खमाणो ॥
[४८४] एगत्तमेयं अभिपत्थएज्जा, एवं पमोक्खे न मुसं ति पासं ।
एसप्पमोक्खे अमुसेऽवरे वी, अकोहणे सच्चरणे तवस्सी ॥
[४८५] इत्थीसु या आरय मेहुणे उ, परिग्गहं चेव अकुव्वमाणे ।
उच्चावएसुं विसएसु ताई, निस्संसयं भिक्खु समाहिपत्ते ॥
[४८६] अरतिं रतिं च अभिभूय भिक्खू, तणाइफासं तह सीयफासं ।
उण्हं च दंसं चऽहियासएज्जा, सुब्धिं च दुब्धिं च तित्तिक्खएज्जा ॥
[४८७] गुत्तो वईए य समाहिपत्तो लेसं समाहट्टु परिव्वएज्जा ।
गिहं न छाए न वि छादएज्जा, सम्मिस्सिभावं पजहे पयासु ॥
[४८८] जे केइ लोगंमि उ अकिरियआया अन्नेन पुट्टा धुतमादिसंति ।
आरंभसत्ता गढिया य लोए, धम्मं न जाणंति विमोक्खहेउं ॥

[४८९] पुढो य छंदा इह माणवा उ किरियाकिरियं च पुढो य वादं ।
जातस्स बालस्स पकुच्च देहं, पवड्ढती वेरमसंजयस्स ॥

सुयक्खंधो-१, अज्झयणं-१०, उद्देशो-

- [४९०] आउक्खयं चैव अबुज्झमाणे, ममाइ से साहसकारि मंदे ।
अहो य राओ परितप्पमाणे, अट्टेसु मूढे अजरामरे व्व ॥
- [४९१] जहाहि वित्तं पसवो य सव्वे, जे बंधवा जे य पिया य मित्ता ।
लालप्पई सेऽविय एइ मोहं, अन्ने जना तंसि हरंति वित्तं ॥
- [४९२] सीहं जहा खुड्डमिगा चरंता, दूरे चरंती परिसंकमाणा ।
एवं तु मेहावि समिक्ख घम्मं, दूरेण पावं परिवज्जएज्जा ॥
- [४९३] संबुज्झमाणे उ नरे मतीमं, पावाओ अप्पाण निवट्टएज्जा ।
हिंसप्पसूताणि दुहाणि मत्ता, निव्वाणभूत्ते व परिवएज्जा ॥
- [४९४] मुसं न बूया मुनि अत्तगामी, निव्वाणमेयं कसिणं समाहिं ।
सयं न कुज्जा न य कारवेज्जा, करंतमन्नं पि य नानुजाणे ॥
- [४९५] सुद्धे सिया जाए न दूसएज्जा, अमुच्छिण्ण य अणज्झोववन्ने ।
धितिमं विमुक्के न य पूयणट्ठी, न सिलोयगामी य परिव्वएज्जा ॥
- [४९६] निक्खम्म गेहाओ निरावकंखी, कायं विउस्सेज्ज निदानछिन्ने ।
नो जीवितं नो मरणाभिकंखी, चरेज्ज भिक्खू वलया विमुक्के ॥ - त्ति बेमि
मुनि दीपरत्नसागरेण संशोधितः सम्पादितश्च “दसमं अज्झयणं समत्तं”

० एगारसमं अज्जयणं- मग्गे ०

- [४९७] कयरे मग्गे अक्खाते, माहणेणं मतीमता ? ।
जं मग्गं उज्जु पावित्ता, ओहं तरति दुरुत्तरं ॥
- [४९८] तं मग्गं अनुत्तरं सुद्धं, सव्वदुक्खविमोक्खणं ।
जाणासि णं जहा भिक्खू !, तं नो बूहि महामुनी ॥
- [४९९] जइ नो केई पुच्छेज्जा, देवा अदुव माणुसा ।
तेसिं तु कयरं मग्गं, आइक्खेज्ज ? कहानि णो ॥
- [५००] जइ वो केइ पुच्छेज्जा, देवा अदुव माणुसा ।
तेसिमं पडिसाहेज्जा, मग्गसारं सुणेह मे ॥
- [५०१] अनुपुव्वेण महाघोरं, कासवेण पवेइयं ।
जमादाय इओ पुव्वं, समुद्धं ववहारिणो ॥
- [५०२] अतरिंसु तरंतेगे, तरिस्संति अनागया ।
तं सोच्चा पडिवक्खामि, जंतवो तं सुणेह मे ॥
- [५०३] पुढवीजीवा पुढो सत्ता, आउजीवा तहागुणी ।
वाउजीवा पुढो सत्ता, तणरुक्खा सबीयगा ॥

- [५०४] अहावरे तसा पाणा, एवं छक्काय आहिया ।
इत्ताव एव जीवकाए, नावरे विज्जती काए ॥
- [५०५] सक्वाहिं अनुजुत्तीहिं मइमं पडिलेहिया ।
सुयक्खंधो-१, अज्झयणं-११, उद्देशो-

- सव्वे अकंतदुक्खा य, अतो सव्वे न हिंसया ॥
- [५०६] एयं खु नाणिणो सारं, जं न हिंसति कंचन ।
अहिंसा समयं चेव, एतावंतं विजाणिया ॥
- [५०७] उड्ढं अहे तिरियं च, जे केइ तसथावरा ।
सव्वत्थ विरतिं विज्जा संति निव्वाणमाहियं ॥
- [५०८] पभू दोसे निराकिच्चा, न विरुज्झेज्ज केणई ।
मनसा वयसा चेव, कायसा चेव अंतसो ॥
- [५०९] संवुडे से महापण्णे, धीरे दत्तेसणं चरे ।
एसणासमिणं निच्चं, वज्जयंते अनेसणं ॥
- [५१०] भूयाइं च समारंभ, तमुद्धिस्सा य जं कडं ।
तारिसं तु न गेणहेज्जा, अन्नपाणं सुसंजए ॥
- [५११] पूतिकम्मं न सेवेज्जा, एस धम्मो वुसीमतो ।
जं किंचि अभिकंखेज्जा सव्वसो तं न कप्पते ॥
- [५१२] हणंतं नानुजाणेज्जा, आयगुत्ते जिइंदिए ।
ठाणाइं संति सड्ढीणं, गामेसु नगरेसु वा ॥
- [५१३] तहा गिरं समारब्भ, अत्थि पुण्णंति नो वए ।
अहवा नत्थि पुण्णं ति, एवमेयं महब्भयं ॥
- [५१४] दानड्डया य जे पाणा, हम्मंति तसथावरा ।
तेसिं सारक्खणद्वाए, तम्हा अत्थि त्ति नो वए ॥
- [५१५] जेसिं तं उवकप्पेतिं, अन्नं पानं तहाविहं ।
तेसिं लाभंतरायंति, तम्हा नत्थि त्ति नो वए ॥
- [५१६] जे य दानं पसंसंति, वधमिच्छंति पाणिणं ।
जे य णं पडिसेहंति, वित्तिच्छेदं करंति ते ॥
- [५१७] दुहओ वि ते न भासंति अत्थि वा नत्थि वा पुणो ।
आयं रयस्स हेच्चा णं, निव्वाणं पाउणंति ते ॥
- [५१८] निव्वाणं परमं बुद्धा, नक्खत्ताण व चंदमा ।
तम्हा सया जए दंते, निव्वाणं संधए मुनी ॥
- [५१९] बुज्झमाणाण पाणाणं, किच्चंताणं सकम्मणा ।
आधाति साधु तं दीवं, पतिट्ठेसा पवुच्चइ ॥
- [५२०] आयगुत्ते सया दंते, छिन्नसोए अनासवे ।
जे धम्मं सुद्धमक्खाति, पडिपुण्णमनेलिसं ॥

- [५२१] तमेव अविजाणंता, अबुद्धा बुद्धमाणिणो ।
बुद्धा मो त्ति य मन्नंता, अंते एते समाहिए ॥
- [५२२] ते य बीयोदगं चेव, तमुद्धिस्सा य जं कडं ।
सुयक्खंधो-१, अज्झयणं-११, उद्देशो-

- भोच्चा ज्ञाणं ज्ञियायंति, अखेतण्णा असमाहिया ॥
- [५२३] जहा ढंका य कंका य, कुलला मग्गुका सिही ।
मच्छेसणं ज्ञियायंति, ज्ञाणं ते कलुसाधमं ॥
- [५२४] एवं तु समणा एगे, मिच्छदिट्ठी अनारिया ।
विसएसणं ज्ञियायंति, कंका वा कलुसाधमा ॥
- [५२३] सुद्धं मग्गं विराहित्ता, इहमेगे उ दुम्मती ।
उम्मग्गगया दुक्खं, घातमेसंति तं तथा ॥
- [५२६] जहा आसाविणिं नावं, जाइअंधो दुरूहिया ।
इच्छई पारमागंतुं, अंतरा य विसीदति ॥
- [५२७] एवं तु समणा एगे, मिच्छदिट्ठी अनारिया ।
सोतं कसिणमावन्ना आगंतारो महब्भयं ॥
- [५२८] इमं च धम्ममादाय, कासवेण पवेदितं ।
तरे सोयं महाघोरं, अत्तत्ताए परिक्वए ॥
- [५२९] विरते गामधम्महिं, जे केई जगई जगा ।
तेसिं अत्तुवमायाए, थामं कुक्वं परिक्वए ॥
- [५३०] अतिमानं च मायं च, तं परिण्णाय पंडिए ।
सक्वमेयं निराकिच्चा, निक्वाणं संधए मुनी ॥
- [५३१] संधए साहुधम्मं च, पावधम्मं निराकरे ।
उवधानवीरिए भिक्खू, कोहं मानं न पत्थए ॥
- [५३२] जे य बुद्धा अतिककंता, जे य बुद्धा अनागया ।
संती तेसिं पइट्ठाणं, भूयाणं जगई जहा ॥
- [५३३] अह णं वतमावन्नं फासा उच्चावया फूसे ।
न तेहिं विनिहण्णेज्जा, वातेण व महागिरी ॥
- [५३४] संवुडे से महापण्णे, धीरे दत्तेसणं चरे ।
निक्वुडे कालमाकंखे, एवं केवलिणो मतं ॥ त्ति बेमि

मुनि दीपरत्नसागरेण संशोधितः सम्पादितश्च “एगारसमं अज्झयणं समत्तं”

0 बारसमं अज्झयणं- समोसरणं 0

- [५३५] चत्तारि समोसरणाणिमाणि, पावादुया जाइं पुढो वयंति ।
किरियं अकिरियं विनयंति तइयं, अन्नाणमाहंसु चउत्थमेव ॥
- [५३६] अन्नाणिया ता कुसला वि संता, असंथुया नो वितिगिच्छतिण्णा ।

अकोविया आहु अकोविएहिं, अनानुवीईत्ति मुसं वदंति ॥

[५३७] सच्चं असच्चं इति चिंतयंता, असाहु साहु त्ति उदाहरंता ।

जेमे जना वेणइया अनेगे पुढा वि भावं विणइंसु नाम ॥

सुयक्खंधो-१, अज्झयणं-१२, उद्देशो-

[५३८] अनोवसंखा इति ते उदाहु, अट्टे स ओभासइ अम्ह एवं ।

लवावसंकी य अनागएहिं, नो किरियमाहंसु अकिरियवादी ॥

[५३९] संमिस्सभावं च गिरा गिहीते, से मुम्मई होइ अनानुवाई ।

इमं दुपक्खं इममेगपक्खं, आहंसु छलायतणं च कम्मं ॥

[५४०] ते एवमक्खंति अबुज्झमाणा, विरुवरूवाणि अकिरियवादी ।

जे मायइत्ता बहवे मनूसा, भमंति संसारमणोवदग्गं ॥

[५४१] नाइच्चो उदेइ न अत्थमेइ, न चंदिमा वड्ढति हायती वा ।

सलिला न संदंति न वंति वाया, वंझो नियतो कसिणे हु लोए ॥

[५४२] जहा हि अंधे सह जोइणा वि, रूवाणि नो पस्सइ हीननेत्ते ।

संतं पि ते एवमकिरियवाई किरियं न पस्संति निरुद्धपण्णा ॥

[५४३] संवच्छरं सुविणं लक्खणं च, निमित्तदेहं च उप्पाइयं च ।

अट्ठंगमेयं बहवे अहित्ता, लोगंसि जाणंति अनागताइं ॥

[५४४] केई निमित्ता तहिया भवंति, केसिंचि तं विप्पडिएति नाणं ।

ते विज्जभावं अणहिज्जमाणा, आहंसु विज्जापलिमोक्खमेव ॥

[५४५] ते एवमक्खंति समेच्च लोगं, तहा-तहा समणा माहणा य ।

सयं कडं नऽन्नकडं च दुक्खं, आहंसु विज्जाचरणं पमोक्खं ॥

[५४६] ते चक्खु लोगंसिह नायगा उ, मग्गाणुसासंति हियं पयाणं ।

तहा तहा सासयमाहु लोए, जंसी पया मानव! संपगाढा ॥

[५४७] जे रक्खसा जे जमलोइया वा, जे वा सुरा गंधव्वा य काया ।

आगासगामी य पुढोसिया ते, पुणो पुणो विप्परियासुवेंति ॥

[५४८] जमाहु ओहं सलिलं अपारगं, जाणाहि णं भवगहणं दुमोक्खं ।

जंसी विसण्णा विसयंगणाहिं, दुहओऽवि लोयं अनुसंचरंति ॥

[५४९] न कम्मणा कम्म खवेंति बाला, अकम्मणा कम्म खवेंति धीरा ।

मेधाविणो लोभमयावतीता, संतोसिणो नो पकरेंति पावं ॥

[५५०] ते तीतउप्पन्नमनागयाइं, लोगस्स जाणंति तहागताइं ।

नेतारो अन्नेसिं अनन्ननेया, बुद्धा हु ते अंतकडा भवंति ॥

[५५१] ते नेव कुव्वंति न कारवेंति, भूताभिसंकाए दुगुंछमाणा ।

सदा जता विप्पनमंति धीरा, विण्णत्ति धीरा य हवंति एगे ॥

[५५२] इहरे य पाणे वुड्ढे य पाणे, ते आत्तओ पासइ सव्वलोगे ।

उव्वेहती लोगमिणं महंतं, बुद्धेऽपमत्तेसु परिव्वएज्जा ॥

[५५३] जे आततो परतो वा वि नच्चा, अलमप्पणो होंति अलं परेसिं ।

तं जोड़भूयं च सया वसेज्जा, जे पाउकुज्जा अनुवीड़ धम्मं ॥

[५५४] अत्ताण जो जाणइ जो य लोगं, गइं च जो जाणइ नागइं च ।
जो सासयं जाण असासयं च, जातिं च मरणं च जनोववायं ॥

सुयक्खंधो-१, अज्झयणं-१२, उद्देशो-

[५५५] अहोऽवि सत्ताण विउट्टणं च, नो आसवं जाणति संवरं च ।
दुक्खं च जो जाणइ निज्जरं च, सो भासिउमरिहति किरियवादं ॥

[५५६] सद्देषु रूवेषु असज्जमाणे, रसेसु गंधेषु अदुस्समाणे ।
नो जीवियं नो मरणाभिकंखे, आयाणगुत्ते वलया विमुक्के ॥ त्ति बेमि

मुनि दीपरत्नसागरेण संशोधितः सम्पादितश्च “बारसमं अज्झयणं समत्तं”

० तेरसमं अज्झयणं- आहत्तहीयं ०

[५५७] आहत्तहीयं तु पवेयइस्सं, नाणप्पगारं पुरिसस्स जातं ।
सतो य धम्मं असतो य सीलं, संतिं असंतिं करिस्सामि पाउं ॥

[५५८] अहो य रातो य समुद्धितेहिं, तहागतेहिं पडिलब्भ धम्मं ।
समाहिमाघातमजोसयंता, सत्थारमेवं फरुसं वयंति ॥

[५५९] विसोहियं ते अनुकाहयंते, जे आतभावेण वियागरेज्जा ।
अट्ठाणिए होइ बहुगुणाणं, जे नाणसंकाए मुसं वदेज्जा ॥

[५६०] जे यावि पुट्ठा पलिउंचयंति, आदाणमट्ठं खलु वंचयंति ।
असाहुणो ते इह साहुमाणी, मायणिए एसंति अनंतघातं ॥

[५६१] जे कोहणे होइ जगद्धभासी, विओसितं जे उ उदीएज्जा ।
अंधे व से दंडपहं गहाय, अविओसिते धासति पावकम्मि ॥

[५६२] जे विग्गहिए अन्नायभासी, न से समे होइ अइंइपत्ते ।
ओवायकारी य हिरीमणे य, एगंतदिट्ठी य अमाइरूवे ॥

[५६३] से पेसले सुहुमे पुरिसजाते, जच्चन्निए चेव सुउज्जुयारे ।
बहुं पि अनुसासिए जे तहच्चा, समे हु से होइ अइंइपत्ते ॥

[५६४] जे आवि अप्पं वसुमं ति मत्ता, संखायवायं अपरिक्ख कुज्जा ।
तवेण वाऽहं सहि उत्ति मत्ता अन्नं जनं पस्सति बिंबभूतं ॥

[५६५] एगंतकूडेण तु से पलेइ, न विज्जई मोनपदंसि गोत्ते ।
जे माणणट्ठेण विउक्कसेज्जा, वसुमन्नत्तरेण अबुज्जमाणे ॥

[५६६] जे माहणे खत्तिए जायए वा, तहुग्गपुत्ते तह लेच्छई वा ।
जे पव्वइए परदत्तभोई, गोतेण जे थब्भति मानबद्धे ॥

[५६७] न तस्स जाती व कुलं व ताणं, नन्नत्थ विज्जाचरणं सुचिण्णं ।
निक्खम्म से सेवइऽगारिकम्मं, न से पारए होति विमोयणाए ॥

[५६८] निक्किंचणे भिक्खु सुलूहजीवी, जे गारवं होइ सिलोगगामी ।
आजीवमेयं तु अबुज्जमाणो, पुणो-पुणो विप्परियासुवेति ॥

- [५६९] जे भासवं भिक्खु सुसाहुवादी, पडिहाणवं होइ विसारए य ।
आगाढपण्णे सुवि-भावियप्पा, अन्नं जनं पन्नसा परिहवेज्जा ॥
- [५७०] एवं न से होति समाहिपत्ते, जे पन्नवं भिक्खु विउक्कसेज्जा ।
सुयक्खंधो-१, अज्झयणं-१३, उद्देशो-

- अहवा वि जे लाभमदावलित्ते, अन्नं जनं खिंसति बालपण्णे ॥
- [५७१] पण्णामदं चेव तवोमदं च, निन्नामए गोयमदं च भिक्खू ।
आजीवगं चेव चउत्थमाहु, से पंडिए उत्तमपोग्गले से ॥
- [५७२] एयाइं मदाइं विगिंच धीरा, न तानि सेवंति सुधीरधम्मा ।
ते सव्वगोत्तावगता महेसी, उच्चं अगोत्तं च गतिं वयंति ॥
- [५७३] भिक्खू मुत्तच्चे तह दिट्ठधम्मे, गामं च नगरं च अनुप्पविस्सा ।
से एसणं जाणमनेसणं च, जो अन्नस्स पानस्स य अनानुगिद्धे ॥
- [५७४] अरतिं रतिं च अभिभूय भिक्खू, बहुजने वा तह एगचारी ।
एगंतमोनेन वियागरेज्जा, एगस्स जंतो गतिरागती य ॥
- [५७५] सयं समेच्चा अदुवाऽवि सोच्चा, भासेज्ज धम्मं हिययं पयाणं ।
जे गरहिता सनिदानप्पओगा, न तानि सेवंति सुधीरधम्मा ॥
- [५७६] केसिंचि तक्काए अबुज्झ भावं, खुद्धं पि गच्छेज्ज असद्धाणे ।
आउस्स कालातियारं वघाए, लद्धानुमाने य परेसु अट्टे ॥
- [५७७] कम्मं च छंदं च विगिंच धीरे, विणएज्ज तु सव्वतो आतभावं ।
रूवेहिं लुप्पंति भयावहेहिं, विज्जं गहाया तसथावरेहिं ॥
- [५७८] न पूयणं चेव सिलोयकामी, पियमप्पियं कस्सइ नो करेज्जा ।
सव्वे अणट्टे परिवज्जयंते, अनाउले या अकसाइ भिक्खू ॥
- [५७९] आहत्तहीयं समुपेहमाणे, सव्वेहिं पाणेहिं निहाय दंडं ।
नो जीवियं नो मरणाहिकंखी चरेज्जमेघावि वलया विमुक्के ॥ त्ति बेमि
मुनि दीपरत्नसागरेण संशोधितः सम्पादितश्च “तेरसमं अज्झयणं समत्तं”

० चउद्धसमं अज्झयणं- गंधो ०

- [५८०] गंधं विहाय इह सिक्खमाणो, उट्ठाय सुबंभचेरं वसेज्जा ।
ओवायकारी विनयं सुसिक्खे, जे छेए से विप्पमादं न कुज्जा ॥
- [५८१] जहा दिया-पोतमपत्तजात्तं, सावासगा पवितुं मन्नमाणं ।
तं चाइयं तरुणमपत्तजायं, ढंकादि अव्वत्तगमं हरेज्जा ॥
- [५८२] एवं तु सेहंपि वि अपुट्ठधम्मे, निस्सारियं वुसिमं मन्नमाणा ।
दियस्स छायं व अपत्तजातं, हरिसु णं पावधम्मा अनेगे ॥
- [५८३] ओसाणमिच्छे मनुए समाहिं, अनोसिते नंतकरिंति नच्चा ।
ओभासमाणे दवियस्स वित्तं, न निक्कसे बहिया आसुपण्णे ॥
- [५८४] जे ठाणओ य सयणासणे य परक्कमे यावि सुसाहुजुत्ते ।

समितीसु गुत्तीसु य आयपण्णे, वियागरंते य पुढो वएज्जा ॥
 [५८५] सद्दाणि सोच्चा अदु भेरवाणि, अनासवे तेसु परिव्वएज्जा ।
 निदं च भिक्खू न पमाय कुज्जा, कहं कहं वा वितिगिच्छ तिण्णे ॥
 सुयक्खंधो-१, अज्झयणं-१४, उद्देशो-

- [५८६] डहरेण वुड्ढेण ऽनुसासिते तु, रातिणिएणाऽवि समव्वएणं ।
 सम्मं तयं थिरतो नाभिगच्छे, निज्जंतए वावि अपारए से ॥
- [५८७] विउद्धितेणं समयानुसिद्धे, डहरेण वुड्ढेण उ चोइए य ।
 अब्भुद्धिताए घडदासिए वा, अगारिणं वा समयानुसिद्धे ॥
- [५८८] न तेसु कुज्जे न य पव्वहेज्जा, न यावि किंची फरुसं वदेज्जा ।
 तथा करिस्संति पडिस्सुणेज्जा, सेयं खु मेयं न पमाद कुज्जा ॥
- [५८९] वणंसि मूढस्स जहा अमूढा, मग्गानुसासंति हितं पयाणं ।
 तेणा वि मज्झं इणमेव सेयं, जं मे बुधा सम्मऽनुसासयंति ॥
- [५९०] अहा तेण मूढेण अमूढगस्स, कायव्व पूया सविसेसजुत्ता ।
 एतोवमं तत्थ उदाहु वीरे अनुगम्म अत्थं उवणेइ सम्मं ॥
- [५९१] नेता जहा अंधकारंसि राओ, मग्गं न जाणाति अपस्समाणे ।
 से सुरियस्स अब्भुग्गमेणं, मग्गं वियाणाति पगासितंसि ॥
- [५९२] एवं तु सेहे वि अपुड्ढधम्मे, धम्मं न जाणाति अबुज्झमाणे ।
 से कोविए जिनवयणेण पच्छा, सूरुदए पासइ चक्खुणेव ॥
- [५९३] उड्ढं अहे यं तिरियं दिसासु, तसा य जे थावर जे य पाणा ।
 सया जए तेसु परिव्वएज्जा, मनप्पओसं अविकंपमाणे ॥
- [५९४] कालेण पुच्छे समियं पयासु, आइक्खामणो दवियस्स वित्तं ।
 तं सोयकारी य पुढो पवेसे, संखाइमं केवलियं समाहिं ॥
- [५९५] अस्सिं सुठिच्चा तिविहेण तायी, एएसु या संति निरोधमाहु ।
 ते एवमक्खंति तिलोगदंसी, न भुज्जमेयंति पमायसंगं ॥
- [५९६] निसम्म से भिक्खु समीहियदं पडिभावणं होति विसारदे य ।
 आदानअट्ठी वोदानमोनं, उवेच्च सुद्धेण उवेइ मोक्खं ॥
- [५९७] संखाए धम्मं च वियागरंति, बुद्धा हु ते अंतकरा भवंति ।
 ते पारगा दोण्हवि मोयणाए संसोधियं पण्हमुदाहरंति ॥
- [५९८] नो छादण नोऽवि य लूसएज्जा, मानं न सेवेज्ज पगासणं च ।
 न यावि पण्णे परिहास कुज्जा, न याऽसियावाद वियागरेज्जा ॥
- [५९९] भूयाभिसंकाए दुगुंछमाणे, न निव्वहे मंतपएण गोयं ।
 न किंचिमिच्छे मणुए पयासुं, असाहुधम्माणि न संवएज्जा ॥
- [६००] हासं पि नो संधए पावधम्मे, ओए तहियं फरुसं वियाणे ।
 नो तुच्छए नो य विकत्थएज्जा, अनाइले या अकसाइ भिक्खू ॥
- [६०१] संकेज्ज या ऽसंकितभाव भिक्खू, विभज्जवायं च वियागरेज्जा ।

भासादुयं धम्मसमुद्धितेहिं, वियागरेज्जा समया सुपण्णे ॥

[६०२] अनुगच्छमाणे वितहं विजाणे, तहा तहा साहु अकक्कसेणं ।
न कत्थई भास विहिसएज्जा, निरुद्धगं वावि न दीहएज्जा ॥

सुयक्खंधो-१, अज्झयणं-१४, उद्देशो-

[६०३] समालवेज्जा पडिपुन्नभासी, निसामिया समियाअट्टदंसी ।
आणाए सुद्धं वयणं भिउंजे अभिसंघए पावविवेग भिक्खू ॥

[६०४] अहाबुइयाइं सुसिक्खएज्जा, जइज्जया नाइवेलं वएज्जा ।
से दिट्ठिमं दिट्ठि न लूसएज्जा, से जाणई भासिउं तं समाहिं ॥

[६०५] अलूसए नो पच्छन्नभासी, नो सुत्तमत्थं च करेज्ज ताई ।
सत्थारभत्ती अनुवीचि वायं, सुयं च सम्मं पडिवाययंति ॥

[६०६] से सुद्धसुत्ते उवहाणवं च, धम्मं च जे विंदति तत्थ तत्थ ।
आएज्जवक्के कुसले वियत्ते, स अरिहइ भासिउं तं समाहिं ॥ त्ति बेमि

मुनि दीपरत्नसागरेण संशोधितः सम्पादितश्च “चउद्दसमं अज्झयणं समत्तं”

० पन्नरसमं अज्झयणं-जमईए ०

[६०७] जमतीतं पडुप्पन्नं, आगमिस्सं च नायओ ।

सव्वं मन्नति तं ताई, दंसणावरनंतए ॥

[६०८] अंतए वितिगिच्छाए, से जाणइ अनेलिसं ।

अनेलिसस्स अक्खाया, न से होइ तहिं तहिं ॥

[६०९] तहिं तहिं सुयक्खायं, से य सच्चे सुआहिए ।

सदा सच्चेण संपन्ने, मितिं भूतेसु कप्पए ॥

[६१०] भूतेसु न विरुज्जेज्जा, एस धम्मो वुसीमओ ।

वुसीमं जगं परिण्णाय, अस्सिं जीवियभावना ॥

[६११] भावनाजोगसुद्धप्पा, जले नावा व आहिया ।

नावा व तीरसंपन्ना, सव्वदुक्खा तिउट्ठति ॥

[६१२] तिउट्ठती उ मेहावी, जाणं लोगंसि पावगं ।

तुट्ठंति पावकम्माणि, नवं कम्ममकुव्वओ ॥

[६१३] अकुव्वओ नवं नत्थि, कम्मं नाम विजाणइ ।

नच्चाण से महावीरे, जेण जाई न मिज्जती ॥

[६१४] न मिज्जती महावीरे, जस्स नत्थि पुरेकडं ।

वाऊ व्व जालमच्चेइ पिया लोगंसि इत्थिओ ॥

[६१५] इत्थिओ जे न सेवंति, आदिमोक्खा हु ते जना ।

ते जना बंधणुम्मुकका, नावकंखंति जीवितं ॥

[६१६] जीवितं पिट्ठओ किच्चा, अंतं पावंति कम्मणा ।

कम्मणा संमुहीभूता, जे मग्गमनुसासति ॥

- [६१७] अनुसासनं पुढो पाणी, वसुमं पूयणा सते ।
अनासते जते दंते, दढे आरत मेहुणे ॥
- [६१८] नीवारे व न लीएज्जा छिन्नसोते अनाविले ।

सुयक्खंधो-१, अज्झयणं-१४, उद्देशो-

- अनाइले सदा दंते, संधिं पत्ते अनेलिसं ॥
- [६१९] अनेलिसस्स खेयण्णे, न विरुज्जेज्ज केणइ ।
मनसा वयसा चेव, कायसा चेव चक्खुमं ॥
- [६२०] से हु चक्खू मनुस्साणं जे कंखाए य अंतए ।
अंतेण खुरो वहती, चक्कं अंतेण लोड्ढति ॥
- [६२१] अंताणि धीरा सेवंति, तेण अंतकरा इह ।
इह माणुस्सए ठाणे, धम्ममाराहिउं नरा ॥
- [६२२] निट्ठितट्ठा व देवा वा, उत्तरीए त्ति मे सुतं ।
सुतं च मेतमेगेसिं, अमनुस्सेसु नो तहा ॥
- [६२३] अंतं करेति दुक्खाणं, इहमेगेसिं आहितं ।
आघातं पुण एगेसिं, दुल्लभेऽयं समुस्सए ॥
- [६२४] इतो विद्धंसमाणस्स, पुणो संबोहि दुल्लभा ।
दुल्लभाओ तहच्चाओ, जे धम्मद्वं वियागरे ॥
- [६२५] जे धम्मं सुद्धमक्खंति, पडिपुण्णमनेलिसं ।
अनेलिसस्स जं ठाणं, तस्स जम्मकहा कओ ? ॥
- [६२६] कओ कयाइ मेहावी, उप्पज्जंति तथागता ।
तथागता अप्पडिण्णा, चक्खू लोगस्सऽनुत्तरा ॥
- [६२७] अनुत्तरे य ठाणे से, कासवेण पवेदिते ।
जं किच्चा निव्वुडा एगे, निड्ढं पावेति पंडिया ॥
- [६२८] पंडिए वीरियं लद्धं, निग्घायाय पवत्तगं ।
धुणे पुव्वकडं कम्मं, नवं वाऽवि न कुव्वइ ॥
- [६२९] न कुव्वइ महावीरे, अनुपुव्वकडं रयं ।
रयसा संमुहीभूते, कम्मं हेच्चाण जं मतं ॥
- [६३०] जं मतं सव्वसाहूणं, तं मतं सल्लगततणं ।
साहइत्ताण तं तिण्णा, देवा वा अभविंसु ते ॥
- [६३१] अभविंसु पुरा वीरा, आगमिस्सा वि सुव्वया ।
दुन्निबोहस्स मग्गस्स अंतं पाउकरा तिण्णे ॥ त्ति बेमि

मुनि दीपरत्नसागरेण संशोधितः सम्पादितश्च “पन्नरसमं अज्झयणं समत्तं”

० सोलसमं अज्झयणं- गाहा ०

[६३२] अहाह भगवं- एवं से दंते दविए वोसड्डकाए त्ति वच्चे-माहणे त्ति वा, समणे त्ति वा, भिक्खू त्ति वा, निग्गंथे त्ति वा पडिआए- भंते ! कहां नु दंते दविए वोसड्डकाए त्ति वच्चे माहणे त्ति वा समणे त्ति वा भिक्खू त्ति वा निग्गंथे त्ति वा ? तं नो बूहि महामुनी! इतिविरए सव्वपावक्कमेहिं पेज्ज- दोस - कलह- अब्भक्खाण - पेसुन्न-परपरिवाद अरतिरति मायामोस मिच्छादंसणसल्ले विरते समिए सुयक्खंधो-२, अज्झयणं-१६, उद्देशो-

सहिए सया जए, नो कुज्जे नो माणी माहणे त्ति वच्चे ।

एत्थ वि समणे अनिस्सिए अनिदाने आदानं च अतिवायं च मुसावायं च बहिद्धं च कोहं च मानं च मायं च लोहं च पेज्जं च दोसं च इच्चेव जतो जतो आदानं अप्पणो पद्दोसहेऊ ततो-ततो आदानातो पुव्वं पडिविरते विरए पाणाइवायाओ सिआ दंते दविए वोसड्डकाए समणे त्ति वच्चे ।

एत्थ वि भिक्खू अणुन्नते विनीए नामए दंते दविए वोसड्डकाए संविधुणीय विरूवरूवे परीसहोवसग्गे अज्झप्पजोगसुद्धादाने उवट्टिए ठिअप्पा संखाए परदत्तभोई भिक्खू त्ति वच्चे ।

एत्थ वि निग्गंथे एगे एगविदू बुद्धे संछिन्नसोए सुसंजए सुसमिए सुसामाइए आतप्पवायपत्ते विऊ दुहओ वि सोयपलिच्छिन्ने नो पूयासक्कारलाभट्ठी धम्मट्ठी धम्मविऊ नियागपडिवण्णे समियं चरे दंते दविए वोसड्डकाए निग्गंथे त्ति वच्चे ।

से एवमेव जाणह जंसंहं भयंतारो ॥ - त्ति बेमि

मुनि दीपरत्नसागरेण संशोधितः सम्पादितश्च “सोलसमं अज्झयणं समत्तं”

◦ पढमो सुयक्खंधो समत्तो ◦

बीओ सुयक्खंधो

0 पढमं अज्जयणं- पोंडरीए 0

[६३३] सुयं मे आउसं तेणं भगवया एवमक्खायं- इह खलु पोंडरीए नामज्झयणे, तस्स णं अयमट्ठे पन्नत्ते- से जहानामए पोक्खरणी सिया बहुदउदगा बहुसेया बहुपुक्खला लद्धडा पोंडरीकिणी पासादिया दरिसणीया अभिरूवा पडिरूवा, तीसे णं पोक्खरणीए तत्थ-तत्थ देसे-देसे तहिं-तहिं बहवे पउमवरपोंडरीया बुइया- अनुपुव्वट्टिया ऊसिया रूइला वण्णमंता गंधमंता रसमंता फासमंता पासादिया दरियसणीया अभिरूवा पडिरूवा ।

तीसे णं पोक्खरणीए बहुमज्झदेसभाए एगे महं पउमरपोंडरीए बुइए, अनुपुव्वट्टिए ऊसिए रूइले वण्णमंते गंधमंते रसमंते फासमंते पासादिए [दरिसणीए अभिरूवे] पडिरूवे, सव्वावंति च णं तीसे पोक्खरणीए तत्थ-तत्थ देसे-देसे तहिं-तहिं बहवे पउमवर-पोंडरीया बुइया- अनुपुव्वट्टिया ऊसिया रूइला जाव पडिरूवा, सव्वावंति च णं तीसे णं पोक्खरणीए बहुमज्झदेसभाए एगे महं पउमवरपोंडरीए बुइए-अनुपुव्वट्टिए जाव पडिरूवे ।

[६३४] अह पुरिसे पुरत्थिमाओ दिसाओ आगम्म तं पुक्खरणिं तीसे पुक्खरणीए तीरे ठिच्चा पासति तं महं एगं पउमवरपोंडरीयं अनुपुव्वट्टियं ऊसियं जाव पडिरूवं । तए णं से पुरिसे एवं वयासी-अहमंसि पुरिसे खेत्तण्णे कुसले पंडिते विअत्ते मेघावी अबाले मग्गत्थे मग्गविदू मग्गस्स गति परक्कमण्णू अहमेतं पउमवरपोंडरीयं उन्निक्खिस्सामि त्ति बूया से पुरिसे अभिक्कमे तं पुक्खरणिं, जावं-

जावं च णं अभिक्कमेइ ताव-तावं च णं महंते उदए महंते सेए पहीणे तीरं, अपत्ते पउमवरपोंडरीयं नो हव्वाए नो पाराए अंतरा पोक्खरणीए सेयंसि निसण्णे- पढमे पुरिसजाते ।

[६३५] अहावरे दोच्चे पुरिसजाते- अह पुरिसे दक्खिणाओ दिसाओ आगम्म तं पुक्खरणिं तीसे पुक्खरणीए तीरे ठिच्चा पासति तं महं एगं पउमवरपोंडरीयं, अनुपुव्वद्वियं पासादीयं जाव पडिरूवं, तं च एत्थ एगं पुरिसजायं पासइ पहीणतीरं अपत्तपउमवरपोंडरीयं नो हव्वाए नो पाराए अंतरा पोक्खरणीए सुयक्खंधो-२, अज्झयणं-१, उद्देसो-

सेयंसि निसण्णं, तए णं से पुरिसे तं पुरिसं एवं वयासी-

अहो णं इमे पुरिसे अखेत्तण्णे अकुसले अपंडिए अविअत्ते अमेधावी बाले नो मग्गत्थे नो मग्गविदू नो मग्गस्स गति- नो परक्कमण्णू जण्णं एस पुरिसे, अहं खेत्तण्णे कुसले जाव पउमवरपोंडरीयं उन्निक्खिस्सामि, नो य खलु एतं पउमवरपोंडरीयं एवं उन्निक्खेवियव्वं जहा णं एस पुरिसे मन्ने, अहमंसि पुरिसे खेत्तण्णे कुसले पंडिते विअत्ते मेघावी अबाले मग्गत्थे मग्गविदू मग्गस्स गति- परक्कमण्णू अहमेत पउमवरपोंडरीयं उन्निक्खिस्सामि त्ति कट्टु इति वच्चा से पुरिसे अभिक्कमे तं पोक्खरणिं, जाव-जावं च णं अभिक्कमेइ ताव-तावं च णं महंते उदए महंते सेए पहीणे तीरं अपत्ते पउमवरपोंडरीयं नो हव्वाए नो पाराए अंतरा पोक्खरणीए सेयंसि निसण्णे- दोच्चे पुरिसजाते ।

[६३६] अहावरे तच्चे पुरिसजाते- अह पुरिसे पच्चत्थिमाओ दिसाओ आगम्म तं पोक्खरणिं तीसे पोक्खरणीए तीरे ठिच्चा पासति तं महं एगं पउमवरपोंडरीयं अनुपुव्वद्वियं जाव पडिरूवं, ते तत्थ दोन्नि पुरिसजाते पासति पहीणे तीरं अपत्ते पउमवरपोंडरीयं नो हव्वाए नो पाराए अंतरा पोक्खरणीए सेयंसि निसण्णे ।

तए णं से पुरिसे एवं वयासी- अहो णं इमे पुरिसा अखेत्तण्णा अकुसला अपंडिया अवियत्ता अमेधावी बाला नो मग्गत्था नो मग्गविदू नो मग्गस्स गति- परक्कमण्णू, जण्णं एते पुरिसा एवं मन्ने- अम्हे एतं पउमवरपोंडरीयं उन्निक्खिस्सामो, नो य खलु एतं पउमवरपोंडरीयं एवं उन्निक्खेयव्वं जहा णं एते पुरिसा मन्ने ।

अहमंसि पुरिसे खेतन्ने कुसले पंडिए वियत्ते मेघावी अबाले मग्गमत्थे मग्गविदू मग्गस्स गति- परक्कमण्णू अहमेयं पउमवरपोंडरीयं उन्निक्खिस्सामि त्ति कट्टु इति वुच्चा से पुरिसे अभिक्कमे तं पोक्खरणिं जावं-जावं च णं अभिक्कमेइ तावं-तावं च णं महंते उदए महंते सेए जाव अंतरा पोक्खरिणी सेयंसिनिसण्णे- तच्चे पुरिसजाते ।

[६३७] अहावरे चउत्थे पुरिसजाते- अह पुरिसे उत्तराओ दिसाओ आगम्म तं पोक्खरिणिं तीसे पोक्खरिणीए तीरे ठिच्चा पासति तं महं एगं पउमवरपोंडरीयं अनुपुव्वद्वियं जाव पडिरूवं, ते तत्थ तिन्नि पुरिसजाते पासति पहीणे तीरं अपत्ते जाव सेयंसि निसण्णे ।

तए णं से पुरिसे एवं वयासी- अहो णं इमे पुरिसा अखेत्तण्णा जाव नो मग्गस्स गति परक्कमण्णू जं णं एते पुरिसा एवं मन्ने- अम्हे एतं पउमवरपोंडरीय उन्निक्खिस्सामो नो य खलु एतं पउमवरपोंडरीयं एवं उन्निक्खेयव्वं जहा णं एते पुरिसा मन्ने, अहमंसि पुरिसे खेत्तण्णे जाव मग्गस्स गति परक्कमण्णू, अहमेयं पउमवरपोंडरीयं उन्निक्खिस्सामि त्ति कट्टु इति वुच्चा से पुरिसे अभिक्कमे, तं पोक्खरणिं जावं- जावं च णं अभिक्कमेइ तावं-तावं च णं महंते उदए महंते सेए जाव अंतरा पोक्खरिणी निसण्णे- चउत्थे पुरिसजाते ।

[६३८] अह भिक्खू लूहे तीरड्डी खेयण्णे जाव जाव गति परक्कमण्णू अन्नतरीओ दिसाओ वा अनुदिसाओ वा आगम्म तं पोक्खरणिं तीसे पोक्खरणीए तीरे ठिच्चा पासति तं महं एगं पउमवरपोंडरीयं जाव पडिरूवं, ते तत्थ चत्तारि पुरिसजाते पासति पहीणे तीरं अपत्ते पउमवरपोंडरीयं नो हव्वाए नो पासए अंतरा पोक्खरणीए सेयंसि निसन्ने, तए णं से भिक्खू एवं वयासी-

अहो णं इमे पुरिसा अखेत्तण्णा जाव नो मग्गस्स गति-परक्कमण्णू, जं णं एते पुरिसा एवं सुयक्खंधो-२, अज्झयणं-१, उद्देसो-

मन्ने अम्हे एतं पउमवरपोंडरीयं उन्निक्खिस्सामो, नो य खलु एतं पउमवरपोंडरीयं एवं उन्निक्खेवेयवं जहा णं एते पुरिसा मन्ने, अहमंसि भिक्खू लूहे तीरड्डी खेत्तण्णे जाव मग्गस्स गति परक्कमण्णू, अहमेयं पउमवरपोंडरीयं उन्निक्खिस्सामि त्ति वुच्चा से भिक्खू नो अभिक्कमे तं पोक्खरणिं, तींसे पोक्खरणीए तीरे ठिच्चा सद्धं कुज्जा- उप्पयाहि खलु भो पउमवरपोंडरीया ! उप्पयाहि, अह से उप्पतिते पउमवरपोंडरीए ।

[६३९] किट्टिए नाए समणाउसो ! अट्ठे पुण से जाणितत्त्वे भवति भंते! त्ति निग्गंथा य निग्गंथीओ य समणं भगवं महावीरं वंदंति नमंसंति, वंदित्ता नमंसित्ता एवं वयासी- किट्टिए नाए समणाउसो ! भगवया अट्ठं पुण से न जाणामो समणाउसोत्ति, समणे भगवं महावीरे ते बहवे य निग्गंथे य निग्गंथीओ य आमंतेत्ता एवं वयासी- हंता समणाउसो! आइक्खामि विभयामि किट्टेमि पवेदेमि सअट्ठं सहेउं सनिमित्तं भुज्जो भुज्जो उवदंसेमि ।

[६४०] से बेमि-लोयं च खलु मए अप्पाहट्टु समणाउसो ! सा पोक्खरणी बुइया, कम्मं च खलु मए अप्पाहट्टु समणाउसो ! उदए बुइए, कामभोगे य खलु मए अप्पाहट्टु समणाउसो ! से सेए बुइए जने जानवए च खलु मए अप्पाहट्टु समणाउसो ! ते बहवे पउमवरपोंडरीए बुइया, रायाणं च खलु मए अप्पाहट्टु समणाउसो ! से एगे महं पउमवरपोंडरीए बुइए अन्नउत्थिया य खलु मए अप्पाहट्टु समणाउसो !

ते चत्तारि पुरिसजाया बुइया, धम्मं च खलु मए अप्पाहट्टु समणाउसो ! से भिक्खू बुइए, धम्मतित्थं च खलु मए अप्पाहट्टु समणाउसो ! से तीरे बुइए, धम्मकहं च खलु मए अप्पाहट्टु समणाउसो ! से सद्धे बुइए, निव्वाणं च खलु मए अप्पाहट्टु समणाउसो !, से उप्पाए बुइए, एवमेयं च खलु मए अप्पाहट्टु समणाउसो ! से एवमेयं बुइयं ।

[६४१] इह खलु पाईणं वा पडीणं वा उदीणं वा दाहिणं वा, संतेगइया मनुस्सा भवंति अनुपुच्चेणं लोगं उववन्ना, तं जहा- आरिया वेगे अनारिया वेगे, उच्चागोया वेगे नीयागोया वेगे, कायमंता वेगे रहस्समंता वेगे, सुवण्णा वेगे दुवण्णा वेगे, सुरूवा वेगे दुरूवा वेगे, तेसिं च णं मणुयाणं एगे राया भवति-.....

महाहिमवंत मलय-मंदर-महिंदसारे अच्यंत विसुद्धरायकुलवसंप्पसूते निरंतररायलक्खण-विराइयंगमंगे बहुयण-बहुमानपूइए सव्वगुणसमिद्धे खत्तिए मदिए मुद्धाभिसित्ते माउपिउ सुजाए दयप्पिए सीमंकरे सीमंधरे खेमंकरे खेमंधरे मणुस्सिंदे जनवय पिया जनवय पुरोहिए सेउकरे केउकरे नरपवरे पुरिसपवरे पुरिससीहे पुरिसआसीविसे, पुरिसवर पोंडरीए पुरिसवर गंधहत्थी अड्ढे दित्ते वित्ते विच्छिन्न विउलभवन सयनासन जाण वाहणाइण्णे बहुधन बहुजात रूवरतए आओगपओग संपउत्ते विच्छिण्डिय-पउरभत्तपान बहुदासदासीगोमहिसवेलगप्पभूते पडिपुण्णकोसकोद्वागाराउहागारे बलवं दुब्बलपच्चामित्ते ओहयकंटयं निहयकंटयं मलियकंटयं उद्धियकंटयं अकंटयं ओहयसत्तू निहयसत्तू मलियसत्तू उद्धियसत्तू

निज्जियसत्तू पराइयसत्तू ववगयदुब्भिकखमारिय भयविप्पमुक्कं रायवण्णओ जहा उववाइए जाव पसंतडिंबड-

मरं रज्जं पसाहेमाणे विहरति ।

तस्स णं रण्णो परिसा भवति- उग्गा उग्गपुत्ता, भोगा भोगपुत्ता इक्खागा इक्खागपुत्ता नाया नायपुत्ता कोरव्वा कोरव्वपुत्ता, भट्टा भट्टपुत्ता, माहण माहणपुत्ता लेच्छई लेच्छइपुत्ता पसत्थारो पसत्थपुत्ता सेनावई सेनावइपुत्ता, तेषिं च णं एगइए सड्ढी भवति कामं तं समणा वा माहणा वा संपहारिसुं गमणाए

सुयक्खंधो-२, अज्झयणं-१, उद्देशो-

तत्थ अन्नतरेणं धम्मणेणं पन्नत्तारो वयं इमेणं धम्मणेणं पन्नवइस्सामो, से एवमायाणह भयंतारो जहा मए एस धम्मो सुयक्खाते सुपन्नत्ते भवइ, तं जहा-उड्डं पायतला अहे केसग्गमत्थया तिरियं तयपरियंते जीवे एस आया पज्जवे कसिणे एस जीवे जीवति एस मए नो जीवति, सरीरे धरमाणे धरति विनट्टम्मि य नो धरति, एयंतं जीवियं भवति,

आदहणाए परेहिं निज्जइ, अगनिज्झामिए सरीरे कवोतवण्णाणि अट्ठीणि भवन्ति, आसंदीपंचमा पुरिसा गामं पच्चागच्छंति, एवं असंते असंविज्जमाणे जेसिं तं असंते । असंविगमाणे तेषिं तं सुयक्खायं भवति- अन्नो भवइ जीवो अन्नं सरीरं, तम्हा ते नो एवं विप्पडिवेदंति अयमाउसो ! आया दीहे ति वा हस्से ति वा परिमंडले ति वा वट्टे ति वा तंसे ति वा चउरंसे ति वा आयते ति वा छलंसे ति वा अट्टं से ति वा किण्हे ति वा नीले ति वा लोहिए ति वा हाल्लिद्धे ति वा सुक्किल्ले ति वा सुब्भिगंधे ति वा दुब्भिगंधे ति वा तित्ते ति वा कडुए ति वा कसाए ति वा अंबिले ति वा महुरे ति वा कक्खडे ति वा मउए ति वा गरुए ति वा लहुए ति वा सीए ति वा उसिणे ति वा निद्धे ति वा लुक्खे ति वा, एवं असंते असंविज्जमाणे जेसिं तं सुयक्खायं भवइ- अन्नो जीवो अन्नं सरीरं, तम्हा ते नो एवं उवलभंति, से जहानामए केइ पुरिसे कोसीओ असिं अभिनिव्वट्टित्ताणं उवदंसेज्जा अयमाउसो ! असी अयं कोसी, एवमेव नत्थि केइ पुरिसे अभिनिव्वट्टित्ताणं उवदंसेत्तारो अयमाउसो ! आया इयं सरीरे, से जहानामए केइ पुरिसे मुंजाओ इसियं अभिनिव्वट्टित्ताणं उवदंसेज्जा अयमाउसो ! मुंडे इमा इसिया, एवमेव नत्थि केइ पुरिसे अभिनिव्वट्टित्ता णं उवदंसेत्तारो- अयमाउसो ! आया इयं सरीरं;

से जहानामए केइ पुरिसे मंसाओ अट्ठिं अभिनिव्वट्टित्ताणं उवदंसेज्जा अयमाउसो ! मंसे अयं अट्ठी, एवमेव नत्थि केइ पुरिसे उवदंसेत्तारो- अयमाउसो ! आया इयं सरीरं, से जहानामए केइ पुरिसे करतलाओ आमलकं अभिनिव्वट्टित्ताणं उवदंसेज्जा- अयमाउसो ! करतले अयं आमलए एवमेव नत्थि केइ पुरिसे उवदंसेत्तारो- अयमाउसो ! आया इयं सरीरं से जहानामए केइ पुरिसे दहीओ नवनीयं अभिनिव्वट्टित्ताणं उवदंसेज्जा अयमाउसो! नवनीयं अयं तु दही, एवमेव नत्थि केइ पुरिसे अभिनिव्वट्टित्ताणं उवदंसेत्तारो- अयमाउसो ! आया अयं सरीरे

से जहानामए केइ पुरिसे तिलेहितो तेल्लं अभिनिव्वट्टित्ताणं उवदंसेज्जा अयमाउसो! तेल्लं अयं पिण्णाए, एवमेव नत्थि केइ पुरिसे जाव इयं सरीरं, से जहानामए केइ पुरिसे इक्खूओ खोयरसं अभिनिव्वट्टित्ता णं उवदंसेज्जा अयमाउसो! खोयरसे अयं छोए एवमेव जाव सरीरे, से जहानामए केइ पुरिसे अरणीओ अग्गिं अभिनिव्वट्टित्ता णं उवदंसेज्जा अयमाउसो! अरणी अयं अग्गी एवमेव जाव सरीरं, एवं असंते असंविज्जमाणे जेसिं तं सुयक्खायं भवइ, तं जहा- अन्नो जीवो अन्नं सरीरं, तम्हा तं मिच्छा,

से हंता तं हणह खणह छणह डहह पयह आलुंपह विलुंपह सहसाक्कारेह विपरामुसह एतावताव जीवे नत्थि परलोए, ते नो एवं विप्पडिवेदेतिं तं जहा- किरिया इ वा अकिरिया इ वा सुक्कडे इ वा दुक्कडे इ वा कल्लाणे इ वा पावए इ वा साहू इ वा असाहू इ वा सिद्धी इ वा असिद्धी इ वा निरए इ वा अनिरए इ वा एवं ते विरूवरूवेहिं कम्मसमारंभेहिं विरूवरूवाइं कामभोगाइं समारंभंति भोयणाए, एवं एगे पागब्भिया निक्खम्म मामगं धम्मं पन्नवेतिं तं सद्दहमाणा तं पत्तियमाणा तं रोएमाणा साधु सुयक्खाते समणेति वा माहणेति वा कामं खलु आउसो! तुमं पूययामो, तं जहा-असनेन वा पानेन वा खाइमेण वा साइमेण वा वत्थेण वा पडिग्गहेण वा कंबलेण वा पायपुंछणेण वा तत्थेगे पूयणाए सुयक्खंधो-२, अज्झयणं-१, उद्देसो-

समाउट्टिसु तत्थेगे पूयणाए निकाइंसु,

पुवामेव तेसिं नायं भवइ- समणा भविस्सामो अनगरा अकिंचणा अपुत्ता अपसू परदत्तभोइणो भिक्खुणो पावं कम्मं नो करिस्सामो समुट्ठाए ते अप्पणा अप्पडिविरया भवंति, सयमाइयंति अन्ने वि आइयावेतिं अन्नं पि आइयंतं समणुजाणंति, एवामेव ते इत्थिकामभोगेहिं मुच्छिया गिद्धा गढिया अज्झोववन्ना लुद्धा रागदोसवसट्ठा, ते नो अप्पाणं समुच्छेदेतिं ते नो परं समुच्छेदेतिं ते नो अन्नाइं पाणाइं भूयाइं जीवाइं सत्ताइं समुच्छेदेतिं, पहीणा पुवसंजोगा आरियं मग्गं असंपत्ता- इति ते नो हव्वाए नो पाराए अंतरा कामभोगेहिं विसन्ना इति पढमे पुरिसजाए तज्जीवतस्सरीरिएत्ति आहिए ।

[६४२] अहावरे दोच्चे पुरिसजाए पंचमहब्भूए त्ति आहिज्जइ- इह खलु पाईणं वा पडीणं वा उदीणं वा दाहिणं वा संतेगइया मणुस्सा भवंति अनुपुव्वेणं लोगं उववन्ना, तं जहा- आरिया वेगे अनारिया वेगे एवं जाव दुरूवा वेगे, तेसिं च णं महं एगे राया भवति- महाहिमवंतं० एवं चेव निरवसेसं जाव सेनावइपुत्ता, तेसिं च णं एगइए सड्ढी भवति कामं तं समणा वा माहणा वा संपहारिसुं गमणाए, तत्थ अन्नतरेणं धम्मणेण पन्नत्तारो वयं इमेण धम्मणेणं पन्नवइस्सामो से एवमायाणह भयंतारो ! जहा मे एस धम्मं सुयक्खाते सुपन्नत्ते भवति-

इह खलु पंचमहब्भूया जेहिं नो कज्जइ किरिया इ वा अकिरिया इ वा सुक्कडे इ वा दुक्कडे इ वा कल्लाणे इ वा पावए इ वा साहू इ वा असाहू इ वा सिद्धी इ वा असिद्धी इ वा निरए इ वा अनिरए इ वा अवि अंतसो तणमायमवि तं च पिहुद्देसेणं पुढोभूतसमवायं जाणेज्जा, तं जहा-पुढवी एगे महब्भूते आऊ दुच्चे महब्भूते तेऊ तच्चे महब्भूते वाऊ चउत्थे महब्भूते आगासे पंचमे महब्भूते इच्चेते पंच महब्भूया अनिम्मिया अनिम्माविया अकडा नो कित्तिमा नो कडगा अनादिया अनिधणा अवंझा अपुरोहिता संतता सासया आयछट्ठा, पुण एगे एवमाहु- सतो नत्थि विनासो असतो नत्थि संभवो

एताव ताव जीवकाए, एताव ताव अत्थिकाए, एताव ताव सव्वलोए, एतं मुहं लोगस्स करणयाए, अवि अंतसो तणमायमवि, से किणं किणावेमाणे हणं घायमाणे पयं पयावेमाणे अवि अंतसो पुरिसमवि कीणित्ता धायइत्ता एत्थं पि जाणाहि नत्थित्थ दोसो, ते नो एवं विप्पडिवेदेतिं तं जहा- किरिया इ वा जाव निरए इ वा अनिरए इ वा एवं ते विरूवरूवेहिं कम्मसमारंभेहिं विरूवरूवाइं कामभोगाइं समारंभंति भोयणाए,

एवं ते अनारिया विप्पडिवण्णा मामगं धम्मं पण्णवेतिं तं सद्दहमाणा तं पत्तियमाणा जाव इति ते नो हव्वाए नो पाराए, अंतरा कामभोगेसु विसण्णा, दोच्चे पुरिसजाते पंचमहब्भूतिए त्ति आहिए ।

[६४३] अहावरे तच्चे पुरिसजाते ईसरकारणिए त्ति आहिज्जा- इह खलु पाईणं वा पडीणं वा उदीणं वा दाहिणं वा संतेगइया मणुस्सा भवंति अनुपुव्वेणं लोगं उववन्ना, तं जहा- आरिया वेगे जाव दुरूवा वेगे तेसिं च णं महंते एगे राया भवति- महाहिमवंत जाव सेनावइपुत्ता तेसिं च णं एगइए सइठी भवति, कामं तं समणा वा माहणा वा संपहारिसुं गमणाए जाव जहा मे एस धम्मे सुयक्खाते सुपन्नत्ते भवति ।

इह खलु धम्मा पुरिसादिया पुरिसोत्तरिया पुरिसप्पणीया पुरिससंभूता पुरिसपज्जोतिता पुरिसअभिसमन्नागता पुरिसमेव अभिभूय चिद्धंति, से जहानामए गंडे सिया सरीरे जाए सरीरे संवुड्ढे सरीरे अभिसमन्नागए सरीरमेव अभिभूय चिद्धइ एवमेव धम्मा वि पुरिसादिया जाव पुरिसमेव अभिभूय सुयक्खंधो-२, अज्झयणं-१, उद्देशो-

चिद्धंति । से जहानामए अरई सिया सरीरे जाया सरीरे संवुड्ढा सरीरमेव अभिभूय चिद्धइ एवमेव धम्मावि पुरिसादिया जाव पुरिसमेव अभिभूय चिद्धंति ।

से जहानामए वम्मिए सिया पुढविजाए पुढविसंवुड्ढे पुढविअभिसमन्नागए पुढविमेव अभिभूय चिद्धइ, एवमेव धम्मा वि पुरिसादिया पुरिसमेव अभिभूय चिद्धंति । से जहानामए रुक्खे सिया पुढविजाए पुढविसंवुड्ढे पुढविअभिसमन्नागए पुढविमेव अभिभूय चिद्धइ । एवमेव धम्मा वि पुरिसादिया जाव पुरिसमेव अभिभूय चिद्धंति से जहानामए पुक्खरिणी सिया पुढविजाया जाव पुढविमेव अभिभूय चिद्धइ, एवमेव धम्मा वि पुरिसादिया जाव पुरिसमेव अभिभूय चिद्धंति ।

से जहानामए उदगपुक्खले सिया उदगजाए जाव उदगमेव अभिभूय चिद्धइ, एवमेव धम्मा वि पुरिसादिया जाव पुरिसमेव अभिभूय चिद्धंति । से जहानामए उदगबुब्बुए सिया उदगजाए जाव उदगमेव अभिभूय चिद्धइ, एवमेव धम्मा वि पुरिसादिया पुरिसमेव अभिभूय चिद्धंति । जं पि य इमं समणाणं निग्गंथाणं उद्धिद्धं पणीयं विअंजियं दुवालसंगं गणिपिडगं तं जहा- आयारो सूयगडो ठाणं समवाओ विवाहपन्नत्ती नायाधम्मकहाओ उवासगदसाओ अंतगडदसाओ अनुत्तरोववाइयदसाओ पण्हावागरणं विवागसुयं दिट्ठिवाओ, सव्वमेयं मिच्छा, न एतं तहियं, न एतं आहातहियं, इमं सच्चं इमं तहियं इमं आहातहियं, ते एवं सण्णं कुव्वंति, ते एवं सण्णं संठवेंति, ते एवं सण्णं सोवड्ढवयंति, तमेवं ते तज्जातियं दुक्खं नातिवट्ठंति सउणी पंजरं जहा, ते नो एवं विप्पडिवेदेंति, तं जहा-किरिया इ वा जाव अनिरए इ वा, एवं ते विरूवरूवेहिं कम्मसमारंभेहिं विरूवरूवाइं कामभोगाइं समारंभंति भोयणाए,

एवं ते अनारिया विप्पडिवन्ना एवं सदहमाणा जाव इति ते नो हव्वाए नो पाराए, अंतरा कामभोगेसु विसण्णेत्ति, तच्चे पुरिसजाते ईसरकारणिए त्ति आहिए ।

[६४४] अहावरे चउत्थे पुरिसजाते नियतिवाइए त्ति आहिज्जइ- इह खलु पाईणं वा पडीणं वा उदीणं वा दाहिणं वा संतेगइया मणुस्सा भवंति तहेव जाव सेनावइपुत्ता, तेसिं च णं एगइए सइठी भवति, कामं तं समणा वा माहणा वा संपहारिसुं गमणाए जाव मए एस धम्मे सुयक्खाते सुपण्णत्ते भवति ।

इह खलु दुवे पुरिसा भवंति- एगे पुरिसे किरियमाइक्खइ एगे पुरिसे नोकिरिय माइक्खइ, जे य पुरिसे किरियमाइक्खइ जे य पुरिसे नोकिरियमाइक्खइ दो वि ते पुरिसा तुल्ला एगट्ठा कारणमावन्ना.,

बाले पुण एवं विप्पडिवेदेंति कारणमावण्णे अहमंसि दुक्खामि वा सोयामि वा जूरामि वा तिप्पामि वा पीडामि वा परितप्पामि वा अहमेयमकासि परो वा जं दुक्खइ वा सोयइ वा जूरइ वा तिप्पइ

वा पीडइ वा परितप्पइ वा परो एवमकासि, एवं से बाले सकारणं वा परकारणं वा एवं विप्पडिवेदेंति कारणमावन्ने,...

मेहावी पुन एवं विप्पडिवेदेंति कारणमावन्ने अहमंसि दुक्खामि वा सोयामि वा जूरामि वा तिप्पामि वा पीडामि वा परितप्पामि वा नो अहं एवमकासि, परो वा जं दुक्खइ वा जाव परितप्पइ वा नो परो एवमकासि, एवं से मेहावी सकारणं वा परकारणं वा एवं विप्पडिवेदेंति कारणमावन्ने, से बेमि- पाईणं वा पडीणं वा उदीणं वा दाहिणं वा जे तसथावरा पाणा ते एवं संघायमागच्छंति ते एवं विप्परियायमावज्जंति ते एवं विवेगमागच्छंति ते एवं विहाणमागच्छंति ते एवं संगइयंति उवेहाए, ते नो एवं विप्पडिवेदेंति, तं जहा- किरिया इ वा जाव अनिरए इ वा, एवं ते विरूवरूवेहिं कम्मसमारंभेहिं विरूवरूवाइं कामभोगाइं समारंभंति भोयणाए,...

सुयक्खंधो-२, अज्झयणं-१, उद्देसो-

एवमेव ते अनारिया विप्पडिवन्ना तं सद्वहमाणा जाव इति ते नो हव्वाए नो पाराए अंतरा कामभोगेसु विसण्णा । चउत्थे पुरिसजाए नियइवाइएत्ति आहिए ।

इच्चेते चत्तारि पुरिसजाया नानापन्ना नानाछंदा नानासीला नानादिट्ठी नानारूई नानारंभा नानाअज्झवसाण संजुत्ता पहीणपुव्वसंजोगा आरियं मग्गं असंपत्ता इति ते नो हव्वाए ना पाराए अंतरा कामभोगेसु विसण्णा ।

[६४५] से बेमि-पाईणं वा पडीणं वा उदीणं वा दाहिणं वा संतेगइया मणुस्सा भवंति, तं जहा-आरिया वेगे अनारिया वेगे उच्चागोया वेगे नीयागोया वेगे कायमंता वेगे हस्समंता वेगे सुवण्णा वेगे दुवण्णा वेगे सुरूवा वेगे दुरूवा वेगे, तेसिं च णं जनजानवयाइं परिग्गहियाइं भवंति, तं जहा-अप्पयरा वा भुज्जयरा वा, तहप्पगारेहिं कुलेहिं आगम्म अभिभूय एगे भिक्खायरियाए समुट्ठिया सतो वा वि एगे नायओ य उवगरणं च विप्पजहाय भिक्खायरियाए समुट्ठिया असतो वा वि एगे नायओ य उवगरणं च विप्पजहाय भिक्खायरियाए समुट्ठिया ।

जे ते सतो वा असतो वा नायओ य अनायओ य उवगरणं च विप्पजहाय भिक्खायरियाए समुट्ठिया पुव्वमेव तेहिं नातं भवति- तं जहा इह खलु पुरिसे अन्नमन्नं ममद्वाए एवं विप्पडिवेदेंति, तं जहा- खेतं मे वत्थू मे हिरण्णं मे सुवण्णं मे धनं मे धन्नं मे कंसं मे दूसं मे विपुल-धन-कनग-रयण-मणि-मोत्तिय-संख-सिल-प्पवाल-रत्तरयण-संत-सार-सावतेयं मे सद्दा मे रूवा मे गंधा मे रसा मे फासा मे, एते खलु मे कामभोगा अहमवि एतेसिं,

से मेहावी पुव्वामेव अप्पणो एवं समभिजाणेज्जा तं जहा इह खलु मम अन्नतरे दुक्खे रोगातंके समुप्पज्जेज्जा अनिट्ठे अकंते अप्पिए असुभे अमणुन्ने अमणामे दुक्खे नो सुहे से हंता भयंतारो कामभोगाइं मम अन्नतरं दुक्खं रोगायंके परियाइयह-अनिट्ठं अकंतं अप्पियं असुभं अमणुन्नं अमणामं दुक्खं नो सुहं, तासहं दुक्खामि वा सोयामि वा जूरामि वा तिप्पामि वा पीडामि वा परितप्पामि वा इमाओ मे अन्नतराओ दुक्खाओ रोगातंकाओ पडिमोयह अनिट्ठाओ अकंताओ अप्पियाओ असुभाओ अमणुन्नाओ अमणामाओ दुक्खाओ नो सुहाओ, एवामेव नो लद्धपुव्वं भवति, इह खलु कामभोगा नो ताणाए वा नो सरणाए वा, पुरिसे वा एगया पुव्विं कामभोगे विप्पजहइ, कामभोगा वा एगया पुव्विं पुरिसं विप्पजहंति

अन्ने खलु कामभोगा अन्नो अहमंसि से किमंग पुण वयं अन्नमन्नेहिं कामभोगेहिं मुच्छामो, इति संखाए णं वयं च कामभोगेहि विप्पजहिस्सामो, से मेहावी जाणेज्जा- बहिरगमेयं, इणमेव उवनीयतरागं, तं जहा-

माया मे पिया मे भाया मे भगिनी मे भज्जा मे पुत्ता मे नत्ता मे धूया मे पेसा मे सुण्हा में पिया मे सहा मे सयणसंगंथ-संथुया मे, एते खलु मम नायओ अहमवि एएसिं, एवं से से मेहावी पुव्वामेव अप्पणा एवं समभिजाणेज्जा- इह खलु ममं अन्नयरे दुक्खे रोगातंके समुप्पज्जेज्जा- अनिद्वे जाव दुक्खे नो सुहे, से हंता भयंतारो ! नायओ इमं मम अन्नयरं दुक्खं रोगातंके परियाइयहि- अनिद्वं जाव नो सुहं तासहं दुक्खामि वा सोयामि वा जाव परितप्पामि वा

इमाओ मे अन्नतराओ दुक्खाओ रोगातंकाओ परिमोएह अनिद्वो जाव नो सुहाओ, एवमेवं नो लद्धपुव्वं भवइ, तेसिं वा वि भयंताराणं मम नाययाणं अन्नयरे दुक्खे रोगातंके समुप्पज्जेज्जा अनिद्वे जाव नो सुहे, से हंता अहमेतेसिं भयंताराणं नाययाणं इमं अन्नतरं दुक्खं रोगातंके परियाइयामि- सुयक्खंधो-२, अज्झयणं-१, उद्वेसो-

अनिद्वं जाव नो सुहं मा मे दुक्खंतु वा जाव परितप्पंतु वा, इमाओ णं अन्नयराओ दुक्खाओ रोगातंकाओ परिभोएमि- अनिद्वो जाव नो सुहाओ, एवमेव नो लद्धपुव्वं भवति, अन्नस्स दुक्खं अन्नो नो परियाइयइ अन्नेण कडं अन्नो नो पडिसंवेदेइ पत्तेयं जायइ पत्तेयं मरइ पत्तेयं चयइ पत्तेयं उव्वज्जइ पत्तेयं इंजा पत्तेयं सण्णा पत्तेयं मन्ना पत्तेयं विण्णू पत्तेयं वेदणा,...

इति खलु नातिसंजोगा नो ताणाए वा नो सरणाए वा, पुरिसे वा एगया पुत्विं नाइसंजोगे विप्पजहइ, नाइसंजोगा वा एगया पुत्विं पुरिसं विप्पजहंति, अन्ने खलू नातिसंजोगा अन्नो अहमंसि, से किमंग पुण वयं अन्नमन्नेहिं नाइसंजोगेहिं मुच्छामो ?, इति संखाए णं वयं नातिसंजोगे विप्पजहिस्सामो, से मेहावी जाणेज्जा- बाहिरंगमेयं, इणमेव उवनीयतरागं, तं जहा- हत्था मे पाया मे बाहा मे ऊरू मे उदरं मे सीसं मे सीलं मे आउं मे बलं मे वण्णो मे तया मे छाया मे सोयं मे चक्खु मे घाणं मे जिब्भा मे फासा मे ममाइज्जइ, वयाओ परिजूरइ, तं जहा- आऊओ बलाओ वण्णाओ तयाओ छायाओ सोयाओ चक्खूओ घाणाओ जिब्भाओ फासाओ सुसंधितो संधी विसंधीभवति, वलियतरंगे गाए भवति, किण्हा केसा पलिया भवंति,...

तं जहा जं पि य इमं सरीरगं उरालं आहारोवचियं एयं पि य मे अनुपुव्वेणं विप्पजहियव्वं भविस्सति, एयं संखाए से भिक्खू भिक्खायरियाए समुद्विए दुहओ लोगं जाणेज्जा, तं जहा- जीवा चेव अजीवा चेव तसा चेव थावरा चेव ।

[६४६] इह खलु गारत्था सारंभा सपरिग्गहा संतेगइया समणा माहणा वि सारंभा सपरिग्गहा, जे इमे तसा थावरा पाणा- ते सयं समारंभंति अन्नेण वि समारंभावेति अन्नं पि समारंभंतं समनुजाणंति,

इह खलु गारत्था सारंभा सपरिग्गहा, जे इमे कामभोगा सचित्ता वा अचित्ता वा ते सयं परिगिण्हंति अन्नेण वि परिगिण्हावेति अन्नं पि परिगिण्हंतं समनुजाणंति, इह खलु गारत्था सारंत्ता सपरिग्गहा संतेगइया समणा माहणा वि सारंभा सपरिग्गहा- अहं खलु अनारंभे अपरिग्गहे, जे खलु गारत्था सारंभा सपरिग्गहा संतेगइया समणा माहणा वि सारंभा सपरिग्गहा एतेसिं चेव निस्साए बंधचेरवासं वसिस्सामो, कस्स णं तं हेउं ? जहा पुव्वं तथा अवरं जहा अवरं तथा पुव्वं, अंजू एते अनवरया अनुवट्टिया पुनरवि तारिसगा चेव,...

जे खलु गारत्था सारंभा सपरिग्गहा संतेगइया समणा माहणा वि सारंभा सपरिग्गहा दुहओ पावाइं कुव्वंति इति संखाए दोहि वि अंतेहिं अदिस्समाणो इति भिक्खू रीएज्जा, से बेमि-पाईणं वा पडीमं वा उदीणं वा दाहिणं वा एवं से परिण्णातकम्मं, एवं से ववेयकम्मं एवं से वियंतकारए भवइ त्ति मक्खायं ।

[६४७] तत्थ खलु भगवया छज्जीवनिकाया हेऊ पण्णत्ता तं जहा- पुढवीकाए जाव तसकाए, से जहानामए मम अस्सायं दंडेण वा अट्ठीण वा मुट्ठीण वा लेलुण वा कवालेण वा आउट्टिज्जमाणस्स वा हम्ममाणस्स वा तज्जिज्जमाणस्स वा ताडिज्जमाणस्स वा परिताविज्जमाणस्स वा किलामिज्जमाणस्स वा उद्विज्जमाणस्स वा जाव लोमुक्खणणमायमवि हिंसाकारगं दुक्खं भयं पडिसंवेदेमि, इच्चेवं जाण सव्वे पाणा सव्वे भूया सव्वे जीवा सव्वे सत्ता दंडेण वा जाव कवालेण वा आउट्टिज्जमाणा वा हम्ममाणा वा तज्जिज्जमाणा वा ताडिज्जमाणा वा परिताविज्जमाणा वा किला-सुयक्खंधो-२, अज्झयणं-१, उद्देसो-

मिज्जमाणा वा उद्विज्जमाणा वा जाव लोमुक्खणणमायमवि हिंसाकारगं दुक्खं भयं पडिसंवेदेंति,

एवं नच्चा सव्वे पाणा जाव सव्वे सत्ता न हंतव्वा न अज्जावेयव्वा न परिधेतव्वा न परितावेयव्वा न उद्वेयव्वा, से बेमि जे य अतीता जे य पडुप्पन्ना जे य आगामिस्सा अरिहंता भगवंतो सव्वे ते एवमाइक्खंति एवं भासंति एवं पन्नवेंति एवं परूवेंति सव्वे पाणा जाव सत्ता न हंतव्वा न अज्जावेयव्वा न परिधेतव्वा न परितावेयव्वा न उद्वेयव्वा, एस धम्मं धुवे नितिए सासए समेच्च लोगं खेयण्णेहिं पवेइए, एवं से भिक्खू विरए पाणाइवायाओ जाव विरए परिग्गहाओ नो दंतपक्खालणेणं दंते पक्खालेज्जा नो अंजणं नो वमणं नो विरेयणं नो घूवणे नो तं परियाविएज्जा

से भिक्खू अकिरिए अलूसए अकोहे अमाने अमाए अलोहे उवसंते परिनिव्वुडे नो आसंसं पुरतो करेज्जा- इमेण मे दिट्ठेण वा सुएण वा मएण वा विन्नाएण वा इमेण वा सुचरिय-तव-नियम-बंधेरवासेण इमेण वा जायामायावत्तिएणं धम्मं इतो चुते पेच्चा देवे सिया कामभोगाण वसवत्ती सिद्धे वा अदुक्खमसुहे एत्थ वि सिया, एत्थ वि नो सिया, से भिक्खू सद्देहिं अमुच्छिए रूवेहिं अमुच्छिए गंधेहिं अमुच्छिए रसेहिं अमुच्छिए फासेहिं अमुच्छिए विरए- कोहाओ माणाओ मायाओ लोभाओ पेज्जाओ दोसाओ कलहाओ अब्भक्खाणाओ पेसुण्णाओ परपरिवायाओ अरइरईओ मायामोसाओ मिच्छादंसणसल्लाओ- इति से महतो आदानाओ उवसंते उवट्टिए पडिविरते से भिक्खू-

जे इमे तसथावरा पाणा भवंति- ते नो सयं समारंभइ नो अन्नेहिं समारंभावेइ अन्ने समारंभंते वि न समणुजाणइ- इति से महतो आदानाओ उवसंते उवट्टिए पडिविरते ।

से भिक्खू- जे इमे कामभोगा सचित्ता वा अचित्ता वा- ते नो सयं परिगिण्हइ नो अन्नेणं परिगिण्हावेइ अन्नं परिगिण्हंतंपि न समणुजाणइ- इति से महतो आदानाओ उवसंते उवट्टिए पडिविरते, से भिक्खु- जं पि य इमं संपराइयं कम्मं कज्जइ- नो तं सयं करेइ नो अन्नेणं कारवेइ अन्नं पि करेंतं न समणुजाणइ- इति, से महतो आदानाओ उवसंते उवट्टिए पडिविरते

से भिक्खू जाणेज्जा- असनं वा पानं वा खाइमं वा साइमं वा अस्सिं पडियाए एगं साहम्मियं समुद्धिस्स पाणाइं भूयाइं जीवाइं सत्ताइं समारब्भ समुद्धिस्स कीयं पामिच्चं अच्छेज्जं अनिसइं अभिहडं आहडुद्देसियं तं चेतियं सिया, से भिक्खू अह पुण एवं जाणेज्जा-तं विज्जइ तेसिं परक्कमे जस्सट्ठाए चेतियं सिया तं जहा- अप्पणो पुत्ताणं धूयाणं सुण्हाणं धातीणं नातीणं राईणं दासाणं दासीणं

कम्मकराणं कम्मकरीणं आएसाणं पुढो पहेणाए सामासाए पातरासाए सन्निहि-सन्निचए कज्जति इह एएसिं मानवाणं भोयणाए तं नो सयं भुंजइ नो अन्नेणं भुंजावेइ अन्नं पि भुजंतं न समणुजाणइ- इति से महतो आदानाओ उवसंते उवट्टिए पडिविरते ।

तत्थ भिक्खू परकडं-परनिद्धितं उग्गमुप्पायनेसणासुद्धं सत्थातीतं सत्थपरिणामितं अविहिंसितं एसितं वेसितं सामुदानियं पत्तमसणं कारणट्ठा पमाणजुत्तं अक्खोवज्जण-वणलेवणभूयं संजमजायामायावत्तियं बिलमिव पन्नगभूतेणं अप्पाणेणं आहारं आहारेज्जा- अन्नं अन्नकाले पानं पानकाले वत्थं वत्थकाले लेणं लेणकाले सयनं सयनकाले,

से भिक्खू मायण्णे अन्नयरिं दिसं वा अनुदिसं वा पडिवण्णे धम्मं आइक्खे विभए किट्टे उवट्टिएसु वा अनुवट्टिएसु वा सुस्सूसमाणेसु पवेदए- संतिं विरतिं उवसमं निव्वाणं सोयवियं अज्जवियं मद्दवियं लाघवियं अनतिवातियं सव्वेसिं पाणाणं सव्वेसिं भूयाणं सव्वेसिं जीवाणं सव्वेसिं सत्ताणं अनुवीइ सुयक्खंधो-२, अज्झयणं-१, उट्टेसो-

किट्टए धम्मं । से भिक्खू धम्मं किट्टेमाणे नो अन्नस्स हेउं धम्ममाइक्खेज्जा, नो पानस्स हेउं धम्ममाइक्खेज्जा नो वत्थस्स हेउं धम्मं आइक्खेज्जा, नो लेणस्स हेउं धम्मं आइक्खेज्जा, नो सयणस्स हेउं धम्ममाइक्खेज्जा नो अन्नेसिं विरूवरूवाणं कामभोगाणं हेउं धम्ममाइक्खेज्जा, अगिलाए धम्ममाइक्खेज्जा नन्नत्थ कम्मनिज्जरट्ठयाए धम्ममाइक्खेज्जा ।

इह खलु तस्स भिक्खुस्स अंतिए धम्मं सोच्चा निसम्म सम्मं उट्ठाणेणं उट्ठाय वीरा अस्सिं धम्मं समुट्ठिया, जे तस्स भिक्खुस्स अंतिए धम्मं सोच्चा निसम्म सम्मं उट्ठाणेणं उट्ठाय वीरा अस्सिं धम्मं समुट्ठिया ते एवं सव्वोवगता ते एवं सव्वोवरता ते एवं सव्वोवसंता ते एवं सव्वत्ताए परिनिव्वुड, त्ति बेमि ।

एवं से भिक्खू धम्मट्ठी धम्मविऊ नियागपडिवण्णे से जहेयं बुइयं अदुवा पत्ते पउमवरपोंडरीयं अदुवा अपत्ते पउमवरपोंडरीयं, एवं से भिक्खू परिण्णायकम्मं परिण्णायसंगे परिण्णायगेहवासे उवसंते समिए सहिए सया जए, से एयं- वयणिज्जे तं जहा- समणे ति वा माहणे ति वा खंते ति वा दंते ति वा गुत्ते ति वा मुत्ते ति वा उसी ति वा मुनी ति वा कती ति वा विदू ति वा भिक्खू ति वा लूहे ति वा तीरट्ठी ति वा चरणकरणपारविउ । त्ति बेमि ।

मुनि दीपरत्नसागरेण संशोधितः सम्पादितश्च “पढमं अज्झयणं समत्तं”

◦ बीअं अज्झयणं- किरियाठाणे ◦

[६४८] सुयं मे आउसं तेणं भगवया एवमख्यायं- इह खलु किरियाठाणे नामज्झयणे पन्नत्ते, तस्स णं अयमट्ठे, इह खलु संजूहेणं दुवे ठाणा एवमाहिज्जंति, तं जहा- धम्मं चए अधम्मं चए, उवसंते चए अनुवसंते चए ।

तत्थ णं जे से पढमठाणस्स अधम्मपक्खस्स विभंगे तस्स णं अयमट्ठे पन्नत्ते, इह खलु पाईणं वा पडीणं वा उदीणं वा दाहिणं वा संतेगइया मणुस्सा भवंति, तं जहा आरिया वेगे अनारिया वेगे उच्चागोया वेगे नीयागोया वेगे कायमंता वेगे हस्समंता वेगे सुवण्णा वेगे दुवण्णा वेगे सुरूवा वेगे दुरूवा वेगे, तेसिं च णं इमं एयारूवं दंडसमादानं संपेहाए, तं जहा- नेरइएसु वा तिरिक्खजोणिएसु वा माणुसेसु वा देवेसु वा, जे यावन्ने तहप्पगारा पाणा विण्णू वेयणं वेयंति...

तेसिं पि य णं इमाइं तेरस किरियाठाणाइं भवंतीतिमक्खायं, तं जहा- अट्टादंडे अनट्टादंडे हिंसादंडे अकम्हादंडे दिट्ठिविपरियासियादंडे मोसवत्तिए अदिन्नादानवत्तिए अज्झत्थिए मानवत्तिए मित्तदोसवत्तिए मायावत्तिए लोभवत्तिए इरियावहिए ।

[६४९] पढमे दंडसमादाणे अट्टादंडवत्तिए त्ति आहिज्जइ, से जहानामए केइ पुरिसे आयहेउं वा नाइहेउं वा अगारहेउं वा परिवारहेउं वा मित्तहेउं वा नागहेउं वा भूयहेउं वा जक्खहेउं वा तं दंडं तसथावरेहिं पाणेहिं सयमेव निसिरति अन्नेण वि निसिरावेति अन्नं पि निसिरंतं समनुजाणति, एवं खलु तस्स तप्पत्तियं सावज्जं ति आहिज्जइ, पढमे दंडसमादाने अट्टादंडवत्तिए त्ति आहिए ।

[६५०] अहावरे दोच्चे दंडसमादाने अनट्टादंडवत्तिए त्ति आहिज्जइ, से जहानामए केइ पुरिसे जे इमे तसा पाणा भवंति ते नो अच्चाए नो अजिनाए नो मंसाए नो सोणियाए नो हिययाए नो पित्ताए नो वसाए नो पिच्छाए नो पुच्छाए नो बालाए नो सिंगाए नो विसाणाए नो दंताए नो दाढाए नो ण्हाए. नो सुयक्खंधो-२, अज्झयणं-२, उद्देसो-

ण्हारुणिए नो अट्ठीए नो अट्ठिमिंजाए नो हिंसिसु मे त्ति नो हिंसंति मे त्ति नो हिंसिस्संति मे त्ति नो पुत्तपोसणयाए नो पसुपोसणयाए नो अगारपरिवूहणयाए नो समणमाहणवत्तणाहेउं नो तस्स सरीरगस्स किंचि विपरियाइत्ता भवति, से हंता छेत्ता भेत्ता लुंपइत्ता विलुंपइत्ता उद्वइत्ता उज्झिउं बाले वेरस्स आभागी भवति- अनट्टादंडे ।

से जहानामए केइ पुरिसे जे इमे थावरा पाणा भवंति, तं जहा-इक्कडा इ वा कट्ठिणा इ वा जंतुगा इ वा परगा इ वा मोक्खा इ वा तणा इ वा कुसा इ वा कुच्छगा इ वा पव्वगा इ वा पलाला इ वा ते नो पुत्तपोसणाए नो पसुपोसणाए नो अगारपरिवूहणयाए नो समणमाहणपोसणयाए नो तस्स सरीरगस्स किंचि विपरियाइत्ता भवंति, से हंता छेत्ता भेत्ता लुंपइत्ता विलुंपइत्ता उद्वइत्ता उज्झिउं बाले वेरस्स आभागी भवइ- अनट्टादंडे ।

से जहानामए केइ पुरिसे कच्छंसि वा दहंसि वा उदगंसि वा दवियंसि वा वलयंसि वा नूमंसि वा गहणंसि वा गहणविदुग्गंसि वा वनंसि वा वनविदुग्गंसि वा पव्वयंसि वा पव्वयविदुग्गंसि वा तणाइं ऊसविय- ऊसविय सयमेव अगनिकायं निसिरति अन्नेण वि अगनिकायं निसिरावेति अन्नं पि अगनिकायं निसिरंतं समनुजाणति- अनट्टादंडे, एवं खलु तस्स तप्पत्तियं सावज्जंति आहिज्जइ, दोच्चे दंडसमादाने अनट्टादंडवत्तिए त्ति आहिए ।

[६५१] अहावरे तच्चे दंडसमादाने हिंसादंडवत्तिए त्ति आहिज्जइ, से जहानामए केइ पुरिसे ममं वा ममिं वा अन्नं वा अन्निं वा हिंसिसु वा हिंसंति वा हिंसिस्संति वा तं दंडं तसथावरेहिं पाणेहिं सयमेव निसिरइ अन्नेण वि निसिरावेइ अन्नं पि निसिरंतं समणुजाणइ हिंसादंडे, एवं खलु तस्स तप्पत्तियं सावज्जं ति आहज्जइ, तच्चे दंडसमादाणे हिंसादंडवत्तिए त्ति आहिए ।

[६५२] अहावरे चउत्थे दंडसमादाने अकम्हादंडवत्तिए त्ति आहिज्जइ, से जहानामए केइ पुरिसे कच्छंसि वा जाव पव्वयविदुग्गंसि वा मियवत्तिए मियसंकप्पे मियपणिहाणे मियवहाए गंता एते मिय त्ति काउं अन्नयरस्स मियस्स वहाए उसुं आयामेत्ता णं निसिरेज्जा, से मियं वहिस्सामि त्ति कट्ठु तित्तिरं वा वट्ठगं वा चडगं वा लावगं वा कवोयगं वा कविं वा कविजलं वा विंधित्ता भवति- इह खलु से अन्नस्स अट्टाए अन्नं फुसइ- अकस्मादंडे ।

से जहानामए केइ पुरिसे सालीणि वा वीहीणि वा कोदवाणि वा कंगूणि वा परगाणि वा रालाणि वा निलिज्जमाणे अन्नयरस्स तणस्स वहाए सत्थं निसिरेज्जा, से सामगं तणगं कुमुदगं वीहीउसियं कलेसुयं तणं छिंदिस्सामि त्ति कट्टु सालिं वा वीहिं वा कोदवं वा कंगुं वा परगं वा रालयं वा छिदिंत्ता भवति- इति खलु से अन्नस्स अट्टाए अन्नं फुसति- अकम्हादंडे, एवं खलु तस्स तप्पत्तियं सावज्जं ति आहिज्जइ, चउत्थे दंडसमादाने अकम्हादंडवत्तिए आहिए ।

[६५३] अहावरे पंचमे दंडसमादाने दिट्ठिविपरियासियादंडवत्तिए त्ति आहिज्जइ, से जहानामए केइ पुरिसे माईहिं वा पिईहिं वा भाईहिं वा भगिनीहिं वा भज्जाहिं वा पुत्तेहिं वा धूयाहिं वा सुण्हाहिं वा सद्धिं संवसमाणे मित्तं अमित्तमिति मन्नमाणे मित्ते हयपुव्वे भवइ दिट्ठिविपरियासियादंडे,

से जहानामए केइ पुरिसे गामघायंसि वा नगरघायंसि वा खेडघायंसि कब्बडघायंसि वा दोणमुहघायंसि वा पट्टणघायंसि वा आसमघायंसि वा सन्निवेसघायंसि वा निगमघायंसि वा रायहाणिघायंसि वा अतेणं तेणमिति मन्नमाणे अतेणे हयपुव्वे भवइ- दिट्ठिविपरियासियादंडे, एवं खलु तस्सतप्प-सुयक्खंधो-२, अज्झायणं-२, उद्देशो-

त्तियं सावज्जं ति आहिज्जइ, पंचमे दंडसमादाने दिट्ठिविपरियासियादंडवत्तिए त्ति आहिए ।

[६५४] अहावरे छट्ठे किरियट्ठाणे मोसवत्तिए त्ति आहिज्जइ, से जहानामए केइ पुरिसे आयहेउं वा नाइहेउं वा अगारहेउं वा परिवारहेउं सयमेव मुसं वयति अन्नेण वि मुसं वाएइ, मुसं वयंतं पि अन्नं समनुजाणति, एवं खलु तस्स तप्पत्तियं सावज्जं ति आहिज्जइ, छट्ठे किरियट्ठाणे मोसवत्तिए त्ति आहिए ।

[६५५] अहावरे सत्तमे किरियट्ठाणे अदिन्नादानवत्तिए त्ति आहिज्जइ, से जहानामए केई पुरिसे आयहेउं वा जाव परिवारहेउं वा सयमेव अदिन्नं आदियति अन्नेण वि अदिन्नं आदियावेति अदिन्नं आदियंतं पि अन्नं समनुजाणइ, एवं खलु तस्स तप्पत्तियं सावज्जं ति आहिज्जइ, सत्तमे किरियट्ठाणे अदिन्नादानवत्तिए त्ति आहिए ।

[६५६] अहावरे अट्ठमे किरियट्ठाणे अज्झत्थवत्तिए त्ति आहिज्जइ, से जहानामए केइ पुरिसे- नत्थि णं केइ किंचि विसंवादेइ- सयमेव हीने दीने दुट्ठे दुम्मणे ओहयमन-संकप्पे चिंतासोगसागर संपविट्ठे करतलपल्हत्थुमुहे अट्टज्झाणोवगए भूमिगयदिट्ठिए झियाति, तस्स णं अज्झत्थिया असंसइया चत्तारि ठाणा एवमाहिज्जंति तं जहा- कोहे माने माया लोहे, अज्झत्थमेव कोह-मान-माया-लोहे, एवं खलु तस्स तप्पत्तियं सावज्जं ति आहिज्जइ, अट्ठमे किरियट्ठाणे अज्झत्थवत्तिए त्ति आहिए ।

[६५७] अहावरे नवमे किरियट्ठाणे मानवत्तिए त्ति आहिज्जइ- से जहानामए केइ पुरिसे जाइमदेण वा कुलमदेण वा बलमदेण वा रूवमदेण वा तवमदेण वा सुयमदेण वा लाभमदेण वा इस्सरियमदेण वा पण्णामदेण वा अन्नयरेण वा मदट्ठाणेणं मत्ते समाणे परं हीलेति निंदेति खिंसति गरिहति परिभवति अवमन्नेति, इत्तरिए अयं, अहमंसि पुण विसिद्धजाइ कुल बलाइ गुणोववेए-

एवं अप्पाणं समुक्कसे, देहच्चुए कम्मबिइए अवसे पयाति, तं जहा- गब्भाओ गब्भं जम्माओ जम्मं माराओ मारं नरगाओ नरगं चंडे थद्धे चवले माणी यावि भवइ, एवं खलु तस्स तप्पत्तियं सावज्जं ति आहिज्जइ, नवमे किरियट्ठाणे मानवत्तिए त्ति आहिए ।

[६५८] अहावरे दसमे किरियद्वाणे मित्तदोसवत्तिए त्ति आहिज्जइ- से जहानामए केइ पुरिसे माईहिं वा पिईहिं वा भाईहिं वा भइनीहिं वा भज्जाहि वा घूयाहिं वा पुत्तेहिं वा सुण्हाहिं वा सद्धिं संवसमाणे तेसिं अन्नयरंसि अहालहुगंसि अवराहंसि सयमेव गरुयं दडं निव्वत्तेतिं, तं जहा-

सीओदगवियडंसि वा कायं उच्छोलेत्ता भवइ, उसिणोदगवियडेण वा कायं ओसिंचित्ता भवइ, अगनिकायेणं कायं उवडहित्ता भवइ, जोत्तेण वा वेत्तेण वा नेत्तेण वा तयाइ वा कसेण वा छियाए वा लयाए वा अन्नयरेण वा दवरएण पासाइं उद्दालित्ता भवति, दंडेण वा अट्टीण वा मुट्टीण वा लेलुण वा कवालेण वा कायं आउट्टित्ता भवति, तहप्पगारे पुरिसजाते संवसमाणे दुम्मणा भवंति, पवसमाणे सुमणा भवंति,...

तहप्पगारे पुरिसजाते दंडपासी दंडगरुए दंडपुरक्खडे अहिते इमंसि लोगंसि अहिते परंसि लोगंसि संजलणे कोहणे पिडिमंसि यावि भवइ, एवं खलु तस्स तप्पत्तियं सावज्जं ति आहिज्जति दसमे किरियद्वाणे मित्तदोसवत्तिए त्ति आहिए ।

[६५९] अहावरे एक्कारसमे किरियद्वाणे मायावत्तिए त्ति आहिज्जइ, जे इमे भवंति गूढायारा तमोकसिया उल्लूगपत्तलहूया पव्वयगुरुया ते आयरिया वि संता अनारियाओ भासाओ पउंजंति, अन्नहा संतं अप्पाणं अन्नहा मन्नंति, अन्नं पुट्ठा अन्नं वागरेंतिं, अन्नं आइक्खियव्वं अन्नं आइक्खंति,...

सुयक्खंधो-२, अज्झयणं-२, उद्देसो-

से जहानामए केइ पुरिसे अंतोसल्ले तं सल्लं नो सयं नीहरति नो अन्नेण नीहरावेति नो पडिविद्धंसेति, एवमेव निण्हवेति, अविउट्टमाणे अंतो-अंतो रियति, एवमेव माई मायं कट्टु नो आलोएइ नो पडिक्कमेइ नो निंदइ नो गरहइ नो विउट्टइ नो विसोहेइ नो अकरणाए अब्भुट्टेइ नो अहारिहं तवोकम्मं पायच्छित्तं पडिवज्जइ,

माई अस्सिं लोए पच्चायाति माई परंसि लोए पच्चायाति निंदइ गरहइ पसंसति निच्चरति न नियट्टति निसिरियं दंडं छाएइ, माई असमाहडसुहलेस्से यावि भवइ, एवं खलु तस्स तप्पत्तियं सावज्जं ति आहिज्जइ, एक्कारसमे किरियद्वाणे मायावत्तिए त्ति आहिए ।

[६६०] अहावरे बारसमे किरियद्वाणे लोभवत्तिए त्ति आहिज्जइ- जे इमे भवंति, तं जहा आरण्णिया आवसाहिया गामंतिया कण्हुईरहस्सिया नो बहुसंजया नो बहुपडिविरया सव्वपाणभूयजीवसत्तेहिं ते अप्पणो सच्चामोसाइं एवं विउंजंति- अहं न हंतव्वो अन्ने हंतव्वा अहं न अज्जावेयव्वो अन्ने अज्जावेयव्वा अहं न परिघेतव्वो अन्ने परिघेतव्वा अहं न परितावेयव्वो अन्ने परितावेयव्वा अहं न उद्वेयव्वो अन्ने उद्वेयव्वा,...

एवामेव ते इत्थिकामेहिं मुच्छया गिद्धा गट्ठिया अज्झोववण्णा जाव वासाइं चउपंचभाइं छद्दसमाइं अप्पयरो वा भुज्जयरो वा भुंजितु भोगभोगाइं कालमासे कालं किच्चा अन्नयरेसु आसुरिएसु किब्बिसिएसु ठाणेसु उववत्तारो भवंति, तओ विप्पमुच्चमाणा भुज्जो एलमूयत्ताए तमूयत्ताए जाइमूयत्ताए पच्चायंति,...

एवं खलु तस्स तप्पत्तियं सावज्जं ति आहिज्जइ, दुवालसमे किरियद्वाणे लोभवत्तिए त्ति आहिए । इच्चेताइं दुवालस किरियद्वाणाइं दविएणं समणेण वा माहणेण वा सम्मं सुपरिजाणियव्वाइं भवंति ।

[६६१] अहावरे तेरसमे किरियद्वाणे इरियावहिए त्ति आहिज्जाइ- इह खलु अत्तत्ताए संवुडस्स अनगारस्स इरियासमियस्स भासासमियस्स एसणासमियस्स आयणभंडमत्तनिकखेणासमियस्स उच्चार-पासवण-खेल-सिंधाण-जल्ल -पारिद्वावणियासमियस्स मनसमियस्स वइसमियस्स कायसमियस्स मन- गुत्तस्स वइगुत्तस्स कायगुत्तस्स गुत्तिंदियस्स गुतबंभयारिस्स आउत्तं गच्छमाणस्स आउत्तं चिद्धमाणस्स आउत्तं निसीयमाणस्स आउत्तं तुयट्टमाणस्स आउत्तं भुंजमाणस्स आउत्तं भासमाणस्स आउत्तं वत्थं पडिग्गहं कंबलं पायपुंछणं गिण्हमाणस्स वा निक्खिण्णमाणस्स वा जाव चक्खुपम्हनिवायमवि अत्थि विमाया सुहमा किरिया इरियावहिया नाम कज्जइ-

सा पढमसमए बद्धपुट्टा बित्तियसमए वेइया तत्तियसमए, निज्जिण्णा सा बद्धपुट्टा उदीरिया वेइया निज्जिण्णा सेयकाले अकम्मे याऽवि भवइ, एवं खलु तस्स तप्पत्तियं सावज्जंति आहिज्जइ, तेरसमे किरियद्वाणे इरियावहिए त्ति आहिज्जइ ।

से बेमि-जे य अईया जे य पडुप्पन्ना जे य आगमेस्सा अरहंता भगवंता सव्वे ते एयाइं चेव तेरस किरियद्वाणाइं भासिंसु वा भासेंति वा भासिस्संति वा, पन्नवेसु वा पन्नवेति वा पन्नवेस्संति वा, एवं चेव तेरसमं किरियद्वाणं सेविंसु वा सेवंति वा सेविस्संति वा ।

[६६२] अदुत्तरं च णं पुरिस-विजय-विभंगमाइक्खिस्सामि- इह खलु नानापण्णाणं नानाछंदाणं नानासीलाणं नानादिट्ठीणं नानारुईणं नानारंभाणं नानाज्झवसाणसंजुत्ताणं नानाविहपावसुयज्झयणं भवइ,

सुयक्खंधो-२, अज्झयणं-२, उद्देसो-

तं जहा- भोमं उप्पायं सुविणं अंतलिकखं अंगं सरं लक्खणं वंजणं इत्थिलक्खणं पुरिस-लक्खणं हयलक्खणं गयलक्खणं गोणलक्खणं मैठलक्खणं कुक्कुडलक्खणं तित्तिरलक्खणं वट्टगलक्खणं लावगलक्खणं चक्कलक्खणं छत्तलक्खणं चम्मलक्खणं दंडलक्खणं असिलक्खणं मणिलक्खणं कागणि-लक्खणं सुभगाकरं दुब्भगाकरं गब्भकरं मोहणकरं आहव्वणिं पागसासणिं दव्वहोमं खत्तियविज्जं चंदचरियं सूरचरियं सुक्कचरियं बहस्सइचरियं उक्कापायं दिसादाहं मियचक्कं वायसपरिमंडलं पंसुवुट्ठिं केसवुट्ठिं मंसवुट्ठिं रुहिरवुट्ठिं वेयालिं अद्धवेयालिं ओसोवणिं तालुग्घाडणिं सोवाणिं सावरिं दामिलिं कालिं गोरिं गंधारिं ओवतणिं उप्पतणिं जंभणिं थंभणिं लेसणिं आमयकरणिं विसल्लकरणिं पक्कमणिं अंतद्वाणिं आयमिणीं,...

एवमाइयाओ विज्जाओ अन्नस्स हेउं पउंजंति पानस्स हेउं पउंजंति वत्थस्स हेउं पउंजंति लेणस्स हेउं पउंजंति, सयणस्स हेउं पउंजंति अन्नेसिं वा विरूवरूपाणं कामभोगाणं हेउं पउंजंति, तेरिच्छं ते विज्जं सेवंति, ते अनारिया विप्पडिवन्ना कालमासे कालं किच्चा अन्नयरेसु आसुरिएसु किब्बिसिएसु ठाणेसु उववत्तारो भवंति, ततो वि विप्पमुच्चमाणा भुज्जो एलमूयत्ताए तमंधयाए पच्चायंति ।

[६६३] से एगइओ आयहेउं वा नायहेउं वा सयनहेउं वा, अगारहेउं वा परिवारहेउं वा नायगं वा सहवासियं वा निस्साए अदुवा अनुगामिए अदुवा उवचरे अदुवा पडिपहिए अदुवा संधिच्छेयए अदुवा गंढिच्छेयए अदुवा ओरब्भिए अदुवा सोयरिए अदुवा वागुरिए अदुवा साउणिए अदुवा मच्छिए अदुवा गोधायए अदुवा गोवालए अदुवा सोवणिए अदुवा सोवणियंतिए...

से एगइओ अनुगामियभावं पडिसंधाय तमेव हंता छेत्ता भेत्ता लुंपइत्ता विलुंपइत्ता उद्वइत्ता आहारं आहारेति, इति से महया पावेहिं कम्महिं अत्ताणं उवक्खाइत्ता भवति, से एगइओ उवचरगभावं पडिसंधाय तमेव उवचरियं हंता छेत्ता भेत्ता लुंपइत्ता विलुंपइत्ता उद्वइत्ता आहारं आहारेइ, इति से महया पावेहिं कम्महिं अत्ताणे उवक्खाइत्ता भवति

से एगइओ पाडिपहियभावं पडिसंधाय तमेव पाडिपहे ठिच्चा हंता छेत्ता भेत्ता लुंपइत्ता विलुंपइत्ता उद्वइत्ता आहारं आहारेइ, इति से महया पावेहिं कम्महिं अत्ताणं उवक्खाइत्ता भवति, से एगइओ संधिच्छेदगभावं पडिसंधाय तमेव संधिं छेत्ता भेत्ता जाव-इति से महया पावेहिं कम्महिं अत्ताणं उवक्खाइत्ता भवति

से एगइओ गंठिच्छेदगभावं पडिसंधाय तमेव गंठिं छेत्ता भेत्ता जाव इति से महया पावेहिं कम्महिं अत्ताणं उवक्खाइत्ता भवति, से एगइओ ओरब्भियभावं पडिसंधाय उरब्भं वा अन्नतरं वा तसं पाणं हंता जाव अत्ताणं उवक्खाइत्ता भवति, एसो अभिलावो सव्वत्थ ।

से एगइओ सोयरियभावं पडिसंधाय महिसं वा अन्नयरं वा तसं पाणं जाव उवक्खाइत्ता भवति, से एगइओ वागुरियभावं पडिसंधाय मियं वा अन्नयरं वा तसं पाणं हंता जाव उवक्खाइत्ता भवति, से एगइओ साउणियभावं पडिसंधाय सउणिं वा अन्नयरं वा तसं पाणं हंता जाव उवक्खाइत्ता भवति

से एगइओ मच्छियभावं पडिसंधाय मच्छं वा अन्नयरं वा तसं पाणं हंता जाव अत्ताणं उवक्खाइत्ता भवति, से एगइओ गोघायगभावं पडिसंधाय गोणं वा अन्नयरं वा तसं पाणं हंता उवक्खाइत्ता भवति, से एगइओ गोवालभावं पडिसंधाय तमेव गोवालं वा परिजविय परिजविय हंता जाव उवक्खाइत्ता

सुयक्खंधो-२, अज्झयणं-२, उद्देशो-

भवइ ।

से एगइओ सोवणियभावं पडिसंधाय तमेव सुणगं वा अन्नयरं वा तसं पाणं हंता जाव उवक्खाइत्ता भवइ, से एगइओ सोवणियंतियभावं पडिसंधाय तमेव मणुस्सं वा अन्नयरं वा तसं पाणं हंता जाव आहारं आहारेइ, इति से महया पावेहिं कम्महिं अत्ताणं उवक्खाइत्ता भवति ।

[६६४] से एगइओ परिसामज्झओ उद्देता अहमेयं हणामि त्ति कट्टु तित्तिरं वा वट्टुगं वा चडगं वा लावगं वा कवोयगं वा कविंजलं वा अन्नयरं वा तसं पाणं हंता जाव उवक्खाइत्ता भवति ।

से एगइओ केणइ आदानेनं विरुद्धे समाणे अदुवा खलदानेनं अदुवा सुराथालएणं गाहावईण वा गाहावइपुत्ताण वा सयमेव अगनिकाएणं सस्साइं झामेइ अन्नेण वि अगनिकाएणं सस्साइं झामावेइ अगनिकाएणं सस्साइं झामेतं पि अन्नं समणुजाणइ-इति से महया पावकम्महिं अत्ताणं उवक्खाइत्ता भवति ।

से एगइओ केणइ आदानेनं विरुद्धे समाणे अदुवा खलदानेनं अदुवा सुराथालएणं गाहावईणं वा गाहावइपुत्ताण वा उट्टाण वा गोणाण वा घोडगाण वा गद्धभाण वा सयमेव धूराओ कप्पेइ अन्नेण वि कप्पावेइ कप्पंतं वि अन्नं समणुजाणइ, इति से महया पावकम्महिं अत्ताणं उवक्खाइत्ता भवति ।

से एगइओ केणइ आदानेनं विरुद्धे समाणे अदुवा खलदानेनं अदुवा सुराथालएणं गाहावईण वा गाहावइपुत्ताण वा उट्टसालाओ वा गोणसालाओ वा घोडगसालाओ वा गद्धभसालाओ वा कंटकबोदियाए

पडिपेहिता सयमेव अगनिकाएणं झामेइ अन्नेण वि झामावेइ झामंतं पि अन्नं समणुजाणइ, इति से महया भवति ।

से एगइओ केणइ आदानेनं विरुद्धे समाणे अदुवा खलदानेनं अदुवा सुराथालएणं गाहावईण वा गाहावइपुत्ताणं कुंडलं वा मणिं वा मोत्तियं वा सयमेव अवहरइ अन्नेण वि अवहरावेइ अवहरंतं पि अन्नं समणुजाणइ, इति से महया जाव भवति ।

से एगइओ केणइ वि आदानेनं विरुद्धे समाणे अदुवा खलदानेनं अदुवा सुराथालएणं समणाणं वा माहणाणं वा दंडगं वा छत्तगं वा भंडगं वा मत्तगं वा लद्धिगं वा भिसिगं वा चेलगं वा चिलिमिलिगं वा चम्मगं वा चम्मछेयणं वा चम्मकोसियं वा सयमेव अवइरइ जाव समणुजाणइ, इति से महया जाव उवक्खाइत्ता भवति

से एगइओ नो वितिगिंछइ, तं गाहावईण वा गाहावइपुत्ताण वा सयमेव अगनिकाएणं ओसहीओ झामेइ जाव झामंतं पि अन्नं समणुजाणइ, इति से महया जाव उवक्खाइत्ता भवति ।

से एगइओ नो वितिगिंछइ- तं जहा गाहावईण वा गाहावइपुत्ताण वा उट्ठाण वा गोणाण वा घोडगाण वा गद्दभाण वा सयमेव घूराओ कप्पेइ अन्नेण वि कप्पावेइ अन्नं पि कप्पंतं समणुजाणइ- इति से महया पावकम्महिं अत्ताणं उवक्खाइत्ता भवति,

से एगइओ नो वितिगिंछइ- तं जहा- गाहावईण वा गाहावइपुत्ताण वा उट्टसालाओ वा जाव गद्दभसालाओ वा कंटकबौदियाए पडिपेहिता सयमेव अगनिकाएणं झामेइ जाव समणुजाणइ,

से एगइओ नो वितिगिंछइ- तं जहा-गाहावईण वा गाहावइपुत्ताण वा कुंडलं वा मणिं वा मोत्तियं वा सयमेव अवहरइ जाव समणुजाणइ, से एगइओ नो वितिगिंछइ-तं जहा-समणाण वा माहणाण वा छत्तगं वा दंडगं वा जाव चम्मछेयणं वा सयमेव अवहरइ जाव समणुजाणइ, इति से महया जाव सुयक्खंधो-२, अज्झयणं-२, उट्टेसो-

उवक्खाइत्ता भवति ।

से एगइओ समणं वा माहणं वा दिस्सा नानाविहेहिं पावेहिं कम्महिं अत्ताणं उवक्खाइत्ता भवइ, अदुवा णं अच्छराए आफालित्ता भवइ, अदुवा णं फरुसं वदित्ता भवइ, कालेण वि से अनुपविट्ठस्स असनं वा पानं वा खाइमं वा साइमं वा नो दवावेत्ता भवति ।

जे इमे भवंति- वोण्णमंता भारक्कंता अलसगा वसलगा किवणगा समणगा पव्वयंति ते इणमेव जीवितं धिज्जीवियं संपडिबूहेति, नाइ ते पारलोइयस्स अट्टाए किंचि वि सिलिस्संति, ते दुक्खंति ते सोयंति ते जूरंति ते तिप्पंति ते पिट्ठंति ते परितप्पंति ते दुक्खण-जूरण-सोयण-तिप्पण-पिट्ठण-परितप्पण-वह-बंधन-परिकिलेसाओ अपडिविरता भवंति, ते महता आरंभेण ते महता समारंभेण ते महता आरंभसमारंभेण विरूवरूवेहिं पावकम्म-किच्चेहिं उरालाइं माणुस्सगाइं भोगभोगाइं भुजित्तारो भवंति,

तं जहा- अन्नं अन्नकाले पानं पानकाले वत्थं वत्थकाले लेणं लेणकाले सयनं सयनकाले सपुव्वावरं च णं ण्हाए कयबलिकम्मे कय-कोउय-मंगल-पायच्छित्ते सिरसा ण्हाए कंठेमालकडे आविद्ध मणि-सुवण्णे कप्पियमालामउली पडिबद्धसरीरे वग्घारिय-सोणिसुत्तग मल्लदाम-कलावे अहतवत्थ-परिहिए चंदनोक्खित्तगाय-सरीरे महइमहालियाए कूडागारसालाए महइमहालयंसि सीहासनंसि इत्थी गुम्मसंपरिवुडे सव्वराइएणं जोइणा झियायमाणेणं महयास्सहय -नट्ट-गीय-वाइय- तंती-तल-ताल- तुडिय-घन-मुइंग-पडुप्पवाइय-रवेणं उरालाइं मानुस्सागाइं भोगभोगाइं भुजमाणे विहरइ,

तस्स णं एगमवि आणवेमाणस्स जाव चत्तारि पंच जना अवुत्ता चेव अब्भुट्ठेति, भणह देवानुप्पिया ! किं करेमो ? किं आहरेमो ? किं उवनेमो ? किं उवद्वावेमो ? किं मे हियइच्छियं ? किं भे आसगस्स सयइ ? तमेव पासित्ता अनारिया एवं वयंति देवे खलु अयं पुरिसे, देवसिणाए खलु अयं पुरिसे, देवजीवणिज्जे खलु अयं पुरिसे, अन्ने वि य णं उवजीवंति, तमेव पासित्ता आरिया वयंति-अभिककंतकूरकम्ममे खलु अयं पुरिसे अइधून्ने अइयायरक्खे दाहिणगामिए नेरइए कण्हपक्खिए आगमिस्साणं दुल्लबोहियाए यावि भविस्सइ,...

इच्चेतस्स ठाणस्स उट्ठिता वेगे अभिगिज्झंति अनुट्ठित्ता वेगे अभिगिज्झंति अभिज्झंजाउरा अभिगिज्झंति एस ठाणे अनारिए अकेवले अप्पडिपुण्णे अनेयाउए असंसुद्धे असल्लगत्तणे असिद्धिमग्गे अमुत्तिमग्गे अनिच्चाणमग्गे अनिज्जाणमग्गे असव्वदुक्खपहीणमग्गे एगंतमिच्छे असाहू एस खलु पढमस्स ठाणस्स अधम्मपक्खस्स विभंगे एवमाहिए ।

[६६५] अहावरे दोच्चस्स ठाणस्स धम्मपक्खस्स विभंगे एवमाहिज्जइ, इह खलु पाईणं वा पडीणं वा उदीणं वा दाहिणं वा संतेगइया मणुस्सा भवंति तं जहाः-

आरिया वेगे अनारिया वेगे उच्चागोया वेगे नीयागोया वेगे कायमंता वेगे हस्समंता वेगे सुवण्णा वेगे दुवण्णा वेगे सुरूवा वेगे दुरूवा वेगे, तेसिं च णं खेत्तवत्थूणि परिग्गहियाइं भवंति एसो आलावगो जहा पौंडरीए तहा नेतव्वो, तेणेव अभिलावेण जाव सव्वोवसंता सव्वत्ताए परिनिव्वुडे त्ति बेमि

|

एस ठाणे आरिए केवले जाव सव्व-दुक्खप्पहीणमग्गे एगंतसम्ममे साहू, दोच्चस्स ठाणस्स धम्मपक्खस्स विभंगे एवमाहिए ।

[६६६] अहावरे तच्चस्स ठाणस्स मीसगस्स विभंगे एवमाहिज्जइ, जे इमे भवंति आरणिण्या सुयक्खंधो-२, अज्झयणं-२, उट्ठेसो-

आवसहिया गामनियंतिया कण्हइरहस्सिया जाव ते तओ विप्पमुच्चमाणा भुज्जो एलमूयत्ताए तमूत्ताए पच्चायंति,

एस ठाणे अनारिए अकेवले असव्वदुक्खप्पहीणमग्गे एगंतमिच्छे असाहू, एस खलु तच्चस्स ठाणस्स मिस्सगस्स विभंगे एवमाहिए ।

[६६७] अहावरे पढमस्स ठाणस्स अधम्मपक्खस्स विभंगे एवमाहिज्जइ - इह खलु पाईणं वा पडीणं वा उदीणं वा दाहिणं वा संतेगइया मनुस्सा भवंति गिहत्था महिच्छा महारंभा महापरिग्गहा अधम्मिया अधम्माणुया अधम्मिद्वा अधम्मक्खाई अधम्मपायजीविणो अधम्मपलोइणो अधम्मपलज्जणा अधम्मसीलसमुदाचारा अधम्मणेण चेव वित्तिं कप्पेमाणा विहरंति,

हण छिंद भिंद विगत्तगा लोहियपाणी चंडा रुद्धा खुद्धा साहस्सिया उक्कंचन-वंचन-माया-नियडि-कूड-कवड-साइ-संपओगबहुला दुस्सीला दुव्वया दुप्पडियानंदा असाहू सव्वाओ पाणाइवायाओ अप्पडिविरया जावज्जीवाए सव्वाओ कोहाओ जाव मिच्छादंसणसल्लाओ अप्पडिविरया, जावज्जीवाए, सव्वाओ प्हाणुम्मदण- वण्णग- गंध-विलेवण- सद्ध-फरिस-रस-रूव-गंध- मल्लालंकाराओ अप्पडिविरया, जावज्जीवाए सव्वाओ सगड-रह-जाण- जुग्ग-गिल्लि-थिल्लि-सिया-संदमाणिया-सयणासण - वाहण -भोग - भोयण-पवित्थरविहीओ अप्पडिविरया जावज्जीवाए सव्वाओ कय-विककय-मासद्धमास-रूवग-संववहाराओ

अप्पडिविरया जावज्जीवाए सव्वाओ हिरण्ण सुवण्ण- घन धन्न मणि मोत्तिय संख सिल-प्पवालाओ अप्पडिविरया जावज्जीवाए सव्वाओ कूडतुल-कूडमाणाओ अप्पडिविरया जावज्जीवाए ।

सव्वाओ आरंभसमारंभाओ अप्पडिविरया जावज्जीवाए सव्वाओ करण-कारावणाओ अप्पडिविरया जावज्जीवाए सव्वाओ पयण-पयावणाओ अप्पडिविरया जावज्जीवाए सव्वाओ कुट्टण-पिट्टण-तज्जण-ताडन-वह-बंधपरिकिलेसाओ अप्पडिविरया जावज्जीवाए, जे यावण्णे तहप्पगारा सावज्जा अबोहिया कम्मंता परपाणपरियावणकराजे अनारिएहिं कज्जंति ततो अप्पडिविरया जावज्जीवाए ।

से जहानामए केइ पुरिसे कलम- मसूर- तिल- मुग्ग- मास- निप्पाव-कुलत्थ- आलिसंदग- परिमंथग मादिएहिं अयते कूरे मिच्छादंडं पउंजति, एवमेव तहप्पगारे पुरिसजाए तित्तिर-वट्टग-लावग- कवोय-कविंजल-मिय -महिस -वराह -गाह -गोह-कुम्म-सिरीसिवामादिएहिं अयंते कूरे मिच्छादंडं पउंजति, जा वि य से बाहिरिया परिसा भवइ, तं जहा- दासे इ वा पेसे इ वा भयए इ वा भाइल्ले इ वा कम्मकरए इ वा भोगपुरिसे इ वा तेसिं पि य णं अन्नयरंसि अहालहुगंसि अवराहंसि सयमेव गरुयं दंडं निव्वत्तेइ, तं जहा-इमं दंडेह इमं मुंडेह इमं तज्जेह इमं तालेह इमं अदुयबंधनं करेह इमं नियलबंधनं करेह इमं हइडिबंधनं करेह इमं चारगबंधनं करेह इमं नियल-जुयल-संकोडिय-मोडियं करेह इमं हत्थच्छिन्नयं करेह इमं पायच्छिन्नयं करेह, इमं कण्णच्छिन्नयं करेह इमं नक्कच्छिन्नयं करेह इमं ओट्टच्छिन्नयं करेह इमं सीसच्छिन्नयं करेह इमं मुहच्छिण्णयं करेह इमं वेयवहितं करेह इमं अंगवहितं करेह इमं पक्खाफोडियप करेह इमं नयनुप्पाडियं करेह इमं दंसणुप्पाडियं करेह इमं वसणुप्पाडियं करेह इमं जिब्भुप्पाडियं करेह इमं ओलंबियं करेह इमं घसियं करेह इमं घोलियं करेह इमं सूलाइयं करेह इमं सूलाभिन्नयं करेह इमं खारवत्तियं करेह इमं वज्झपत्तियं करेह इमं सीहपुच्छियगं करेह इमं वसहपुच्छियगं करेह इमं कडिगिदइढयं करेह इमं कागणिमंसखावियगं करेह इमं भत्तपाणनिरुद्धगं करेह इमं जावज्जीवं वहबंधणं करेह इमं अन्नतरेणं असुभेणं-कुमारेणं मारेह, जावि य से अब्भितरिया परिसा भवइ तं जहा:-
सुयक्खंधो-२, अज्झयणं-२, उट्टेसो-

माया इ वा पिया इ वा भाया इ वा भगिनी इ वा भज्जा इ वा पुत्ता इ वा धूया इ वा सुण्हा इ वा, तेसिं पि य णं अन्नयरंसि अहालहुगंसि अवराहंसि सयमेव गरुयं दंडं निव्वत्तेति तं जहा- सीओदगवियडंसि उच्छोलेत्ता भवइ जहा मित्तदोसवत्तिए जाव अहिते परंसि लोगंसि, ते दुक्खंति सोयंति जूरंति तिप्पंति पिट्टंति परितप्पंति ते दुक्खण-सोयण-जूरण-तिप्पण-पिट्टण-परितप्पण-वह-बंधन-परिकिलेसाओ अप्पडिविरया भवंति,

एवमेव ते इत्थिकामेहिं मुच्छिया गिद्धा गढिया अज्झोववन्ना जाव वासाइं चउपंचमाइं छद्द समाइं वा अप्पयरो वा भुज्जयरो वा कालं भुंजितुं भोगभोगाइं पविसुइत्ता वेरायतणाइं संचिणित्ता बहूइं पावाइं कम्माइं, उस्सण्णाइं संभारकडेण कम्मणा- से जहानामए अयगोले इ वा सेलगोले इ वा उदगंसि पक्खित्ते समाणे उदग-तलमइवइत्ता अहे धरणितलपइट्टाणे भवति, एवामेव तहप्पगारे पुरिसजाते वज्जबहुले घूयबहुले पंकबहुले वेरबहुले अप्पत्तियबहुले दंभबहुले नियडिबहुले साइबहुले अयसबहुले उस्सन्न तसपाणघाती कालमासे कालं किच्चा धरणितलमइवइत्ता अहे नरगतलपइट्टाणे भवति ।

[६६८] ते णं नरगा अंतो वट्टा बाहिं चउरंसा अहे खुरप्पसंठाणंसंठिया निच्चंधगारतमसा ववगय-गह-चंद-सूर-नक्खत्त-जोइसप्पहा मेद-वसा-मंस-रुहिर-पूय-पडल-चिक्खल्ललित्ताणुलेवणतला असुई

वीसा परमदुब्धिगंधा कण्हा अगनिवण्णाभा कक्खड-फासा दुरहियासा असुभा नरगा असुभा नरएसु वेयणाओ,...

नो चेव णं नरएसु नेरइया निद्दायंति वा पयलायंति वा सुइं वा रइं वा धिइं वा मइं वा उवलभंते, ते णं तत्थ उज्जलं विउलं पगाढं कडुयं कक्कसं चंडं दुक्खं दुग्गं तिव्वं दुरहियासं नेरइय-वेयणं पच्चणुभवमाणा विहरंति ।

[६६९] से जहानामए रुक्खे सिया पव्वयग्गे जाए मूले छिन्ने अग्गे गरुए जओ निन्नं जओ विसमं जओ दुग्गं तओ पवडति एवामेव तहप्पगारे पुरिसजाते गब्भाओ गब्भं जम्माओ जम्मं माराओ मारं नरगाओ नरगं दुक्खाओ दुक्खं दाहिणं गामिए नेरइए कण्हपक्खिए आगमिस्साणं दुल्लभबोहिए यावि भवइ, एस ठाणे अनारिए अकेवले जाव असव्वदुक्खप्पहीणमग्गे एगंतमिच्छे असाहू, पढमस्स ठाणस्स अधम्मपक्खस्स विभंगे एवमाहिए ।

[६७०] अहावरे दोच्चस्स ठाणस्स धम्मपक्खस्स विभंगे एवमाहिज्जइ-इह खलु पाईणं वा पडीणं वा उदीणं वा दाहिणं वा संतेगइया मणुस्सा भवंति, तं जहा- अनारंभा अपरिग्गहा धम्मिया धम्माणुगा धम्मिद्वा जाव धम्मणेण चेव वित्तिं कप्पेमाणा विहरंति, सुसीला सुव्वया सुप्पडियानंदा सुसाहू सव्वाओ पाणाइवायाओ पडिविरया जावज्जीवाए जाव जे यावन्ने तहप्पगारा सावज्जा अबोहिया कम्मंता परपाणपरियावणकरा कज्जंति तओ विपडिविरया जावज्जीवाए

से जहानामए अनगारा भगवंतो इरियासमिया भासासमिया एसणासमिया आयाण-भंड-मत्त-निक्खेवणासमिया-उच्चार-पासवण-खेल-सिंघाण-जल्ल पारिद्वावणियासमिया मनसमिया वइसमिया कायसमिया मनगुत्ता वयगुत्ता कायगुत्ता गुत्ता गुत्तिंदिया गुत्तबंभयारी अकोहा अमाना अमाया अलोभा संता पसंता उवसंता परिनिव्वुडा अनासवा अग्गंथा छिन्नसोया निरुवलेवा कंसपाई व मुक्कतोया संखो इव निरंजना जीव इव अप्पडिहयगई गगनतलं इव निरालंबणा वायुरिव अप्पडिबद्धा सारदसलिलं व सुद्धहियया

सुयक्खंधो-२, अज्झयणं-२, उद्देसो-

पुक्खरपत्तं व निरुवलेवा कुम्मो इव गुत्तिंदिया विहग इव विप्पमुक्का खग्गविसाणं व एगजाया भारुंडपक्खी व अप्पमत्ता कुंजरो इव सौंडीरा वसभो इव जायथामा सीहो इव दुद्धरिसा मंदरो इव अप्पकंपा सागरो इव गंभीरा चंदो इव सोमलेसा सुरो इव दित्ततेया जच्चकनगं व जायरूवा वसुंधरा इव सव्वफासविसहा सुहुयहुयासणो विव तेयसा जलंता,...

नत्थि णं तेसिं भगवंताणं कत्थ वि पडिबंधे भवइ, से पडिबंधे चउव्विहे पण्णत्ते, तं जहा- अंडए इ वा पोयए इ वा उग्गहे इ वा पग्गहे इ वा जं णं जं णं दिसं इच्छतिं तं णं- तं णं दिसं अप्पडिबद्धा सुईभूया लहुभूया अप्पग्गंथा संजेमेणं तवसा अप्पाणं भावेमाणा विहरंति,...

तेसिं णं भगवंताणं इमा एयारूवा जायामायावित्ती होत्था, तं जहा- चउत्थे भत्ते छट्ठे भत्ते अट्ठमे भत्ते दसमे भत्ते दुवालसमे भत्ते चउदसमे भत्ते अद्धमासिए भत्ते मासिए भत्ते दोमासिए तिमासिए चउम्मासिए पंचमासिए छम्मासिए अदुत्तरं च णं उक्खित्तचरगा निक्खित्तचरगा उक्खित्तनिक्खित्तचरगा अंतचरगा पंतचरगा लूहचरगा समुदानचरगा संसड्ढचरगा असंसड्ढचरगा तज्जात संसड्ढचरगा दिड्ढलाभिया अदिड्ढलाभिया पुड्ढलाभिया अपुड्ढलाभिया भिक्खलाभिया अभिक्खलाभिया अण्णातचरगा उवनिहिया संखादत्तिया परिमिय-पिंडवाइया सुद्धेसणिया अंताहारा पंताहारा अरसाहारा

विरसाहारा लूहाहारा तुच्छाहारा अंतजीवी पंतजीवी आयंबिलिया पुरिमड्डिया निव्विगइया अमज्जमंसासिणो नो नियामरसभोई ठाणाइया पडिमाठाणाइया उक्कुडुआसनिया नेसज्जिया वीरासनिया दंडायतिया लंगडसाइणो अवाउडा अगत्तया अकंडया अनिडुहा धुतकेसमंसुरोमनहा सव्वगायपडिकम्मविप्पमुक्का चिडंति ।

ते णं एतेणं विहारेणं विहरमाणा बहूइं वासाइं सामण्णपरियागं पाउणंति पाउणित्ता बहु बहु आबाहंसि उप्पन्नंसि वा अनुप्पन्नंसि वा बहूइं भत्ताइं पच्चक्खंति पच्चक्खित्ता बहूइं भत्ताइं अनसनाए छेदंति छेदित्ता जस्सद्वाए कीरइ नग्गभावे मुंडभावे अन्हाणभावे अदंतवणगे अछत्तए अनावाहणए भूमिसेज्जा फलगसेज्जा कट्टसेज्जा केसलोए बंभचेरवासे परघरपवेसे लद्धावलद्धे मानावमाननाओ हीलनाओ निंदनाओ खिंसणाओ गरहणाओ तज्जणाओ तालणाओ उच्चावया गामकंडगा बावीसं परीसहोवसग्गा अहियासिज्जंति तमद्वं आराहंति तमद्वं आराहेत्ता चरमेहिं उस्ससनिस्सासेहिं अनंतं अनुत्तरं निव्वाघायं निरावरणं कसिणं पडिपुणं केवलवरणाणदंसणं समुप्पाडंति समुप्पाडित्ता तओ पच्छा सिज्जंति बुज्जंति मुच्चंति परिनिव्वायंति सव्वदुक्खाणं अंतं करंति,

एगच्चाए पुण एगे भयंतारो भवंति, अवरे पुण पुव्वकम्मावसेसेणं कालमासे कालं किच्चा अन्नयरेसु देवलोएसु देवत्ताए उववत्तारो भवंति, तं जहा- महइडिएसु महज्जुइएसु महापरक्कमेसु महाजसेसु महब्बलेसु महानुभावेसु महासोक्खेसु, ते णं तत्थ देवा भवंति महइडिया महज्जुइया जाव महासोक्खा हार-विराइय-वच्छा कडग-तुडिय-थंभिय-भुया अंगय-कुंडल-मद्वगंडयल-कण्ण-पीढधारी विचित्तहत्थाभरणा विचित्तमाला-मउलिमउडा कल्लाणग-पवर-वत्थपरिहिया कल्लाणग-पवरमल्लानुलेवणधरा भासुरबोदी पलंबवणमालधरा दिव्वेणं रूवेणं दिव्वेणं वण्णेणं दिव्वेणं गंधेणं दिव्वेणं फासेणं दिव्वेणं संधाएणं दिव्वेणं संठाणेण दिव्वाए इड्डीए दिव्वाए जुत्तीए दिव्वाए पभाए दिव्वाए छायाए दिव्वाए अच्चीए दिव्वेणं तेएणं दिव्वाए लेसाए दस दिसाओ उज्जोवेमाणा पभासेमाणा गइकल्लाणा ठिइकल्लाणा आगमेसिभइया यावि भवंति एस ठाणे आरिए जाव सव्वदुक्खप्पहीणमग्गे एगंतसम्मं साहू, दोच्चस्स ठाणस्स धम्मपक्खस्स विभंगे एवमाहिए ।

सुयक्खंधो-२, अज्झयणं-२, उद्देसो-

[६७९] अहावरे तच्चस्स ठाणस्स मीसगस्स विभंगे एवमाहिज्जइ- इह खलु पाईणं वा पडीणं वा उदीणं वा दाहिणं वा संतेगइया मनुस्सा भवंति तं जहा- अप्पिच्छा अप्पारंभा अप्पपरिग्गहा धम्मिया धम्मानुया धम्मणेण चव वित्तिं कप्पेमाणा विहरंति सुसीला सुव्वया सुप्पडियानंदा सुसाहू एगच्चाओ पाणाइवायाओ पडिविरया जावज्जीवाए एगच्चाओ अप्पडिविरया जाव जे यावण्णे तहप्पगारा सावज्जा अबोहिया कम्मंता परपाणपरितावणकरा कज्जंति तओ वि एगच्चाओ पडिविरया जावज्जीवाए एगच्चाओ अप्पडिविरया,...

से जहानामए समणोवासगा भवंति- अभिगयजीवाजीवा उवलद्ध-पुन्न-पावा-आसव-संवर-वेयण-निज्जर-किरिय अहिगरण-बंधमोक्ख कुसला असहेज्जा देवासुर-नाग-सुवण्ण-जक्ख-रक्खस-किन्नर-किंपुरिस-गरुल-गंधव्व-महोरगाइएहिं देवगणेहिं निग्गंथाओ पावयणाओ अनतिककमणिज्जा इणमेव निग्गंथिए पावयणे निस्संकिया निक्कंखिया निव्वतिगिच्छा लद्धद्वा गहियद्वा पुच्छियद्वा विनिच्छियद्वा अभिगयद्वा अट्ठिमिंज-पेम्मानुरागरत्ता अयमाउसो ! निग्गंथे-पावयणे अद्वं अयं परमटद्वं सेसे अणद्वे, ऊसियफलिहा अवंगुयदुवारा अचियत्तंतेउर परघरदारप्पवेसा चाउद्वसद्वमुद्विद्वपुण्णिमासिणीसु पडिपुणं पोसहं

सम्मं अनुपालेमाणा समणे निग्गंथे फासुएसणिज्जेणं असन-पान-खाइम-साइमेणं वत्थं-पडिग्गह-कंबल-पाय-पुंछणेणं ओसह-भेसज्जेणं पीढ-फलग-सेज्जासंथारणं पडिलाभेमाणा बहुहिं सीलव्वय-गुण-वेरमण-पच्चक्खाण-पोसहोववासेहिं अहापरिग्गहिएहिं तवो-कम्महिं अप्पाणं भावेमाणा विहरंति ।

ते णं एयारूवेणं विहारेणं विहरमाणा बहूइं वासाइ समणोवासगपरियागं पाउणंति पाउणित्ता आबाहंसि उप्पन्नंसि वा अनुप्पन्नंसि वा बहूइं भत्ताइं पच्चक्खायंति पच्चक्खाएत्ता बहूइं भत्ताइं अनसणाए छेदंति छेदित्ता आलोइय पडिक्कंता समाहिपत्ता कालमासे कालं किच्चा अन्नयरेसु देवलोएसु देवत्ताए उववत्तारो भवंति तं जहा-

महइडिएसु महज्जुइएसु जाव महासोकखेसु सेसं तहेव जाव एस ठाणे आयरिए जाव एगंतसम्मं साहू, तच्चस्स ठाणस्स मीसगस्स विभंगे एवमाहिए । अविरइं पडुच्च बाले आहिज्जइ, विरइं पडुच्च पंडिए आहिज्जइ, विरयाविरइं पडुच्च बालपंडिए आहिज्जइ, तत्थ णं जा सा सव्वओ अविरइं एसद्वाणे आरंभद्वाणे अनारिए जाव असव्वदुक्खप्पहीणमग्गे एगंतमिच्छे असाहू, तत्थ णं जा सा विरइं एस द्वाणे अनारंभद्वाणे आरिए जाव सव्वदुक्खप्पहीणमग्गे एगंतस्समे साहू, तत्थ णं जा सा सव्वओ विरयाविरइं एस ठाणे आरंभणोआरंभद्वाणे एस द्वाणे आरिए जाव सव्वदुक्खप्पहीणमग्गे एगंतसम्मं साहू ।

[६७२] एवामेव समनुगम्ममाणा इमेहिं चेव दोहिं ठाणेहिं समोयरंति, तं जहा- धम्मं चेव अधम्मं चेव, उवसंते चेव अनुवसंते चेव, तत्थ णं जे से पढमद्वाणस्स अधम्मपक्खस्स विभंगे एवमाहिए तत्थ णं इमाइं तिन्नि तेवद्वाइं पावादुयसयाइं भवंतीति मक्खायाइं जहा- किरियावाईणं अकिरियावाईणं अन्नाणियवाईणं वेणइयवाईणं, तेऽवि निव्वाणमाहंसु तेऽवि पलिमोक्खमाहंसु तेऽवि लवंति सावगा ! तेऽवि लवंति सावइत्तारो ।

[६७३] ते सव्वे पावादुया आइगरा धम्माणं नानापण्णा नानाछंदा नानासीला नानादिट्ठी नानारूई नानारंभा नानाज्झवसाणसंजुत्ता एगं महं मंडलिबंधं किच्चा सव्वे एगओ चिट्ठंति । पुरिसे य सागणियाणं इंगालाणं पाइं बहुपडिपुण्णं अओमएणं संडासएणं गहाय ते सव्वे पावादुए आइगरे धम्माणं सुयक्खंधो-२, अज्झयणं-२, उद्देसो-

नानापण्णे नानाज्झवसाणसंजुत्ते ! एवं वयासी- हंभो पावादुया! आइगरा धम्माणं नानापण्णा जाव नानाज्झवसाणसंजुत्ता! इमं ताव तुब्भे सागणियाणं इंगालाणं पाइं बहुपडिपुण्णं गहाय मुहुतगं- मुहुत्तगं पाणिणा घरेह, नो बहु संडासगं संसारियं कुज्जा नो बहु अग्गिथंभणियं कुज्जा नो बहु साहम्मियवेयावडियं कुज्जा नो बहु परमधम्मियवेयावडियं कुज्जा उज्जुया नियागपडिवन्ना अमायं कुव्वमाणा पाणिं पसारेहि, इति वुच्चा से पुरिसे तेसिं पावादुयाण तं सागणियाणं इंगालाणं पाइं बहुपडिपुण्णं अओमएणं संडासएणं गहाय पाणिंसु निसिरति,

तए णं ते पावादुया आइगरा धम्माणं नानापण्णा जाव नानाज्झवसाणसंजुत्ता पाणिं पडिसाहरंति, तए णं से पुरिसे ते सव्वे पावादुए आइगरे धम्माणं नानापण्णे जाव नानाज्झवसाणसंजुत्ता ! एवं वयासी- हंभो पावादुया! आइगरा धम्माणं नानापण्णा जाव नाणाज्झवसाणसंजुत्ता ! कम्हा णं तुब्भे पाणिं पडिसाहरह ? पाणीं नो डज्जेज्जा, दड्ढे किं भविस्सइ ? दुक्खं, दुक्खंति मन्नमाणा पडिसाहरह ? एस तुला एस पमाणे एस समोसरणे पत्तेयं तुला पत्तेयं पमाणे पत्तेयं समोसरणे, तत्थ णं जे ते समणा माहणा एवमाइक्खंति जाव एवं परूवेति-

सव्वे पाणा जाव सव्वे सत्ता हंतव्वा अज्जावेयव्वा परिधेतव्वा परितावेयव्वा किलामेयव्वा उद्वेयव्वा, ते आगंतु छेयाए ते आगंतु भेयाए ते आगंतु जाइ-जरा-मरण-जोणि जम्मण-संसार-पुनब्भव-गब्भवास-भवपवंच-कलंकलीभागिणो भविस्संति, ते बहूणं दंडणाणं बहूणं मुंडणाणं बहूणं तज्जणाणं बहूणं तालणाणं बहूणं अंदुबंधणाणं बहूणं घोलणाणं बहूणं माइमरणाणं बहूणं पिइमरणाणं बहूणं भाइमरणाणं बहूणं भगिनीमरणाणं बहूणं भज्जापुत्त-धूत-सुण्हा-मरणाणं बहूणं दारिद्धाणं दोहग्गाणं बहूणं अप्पियसंवासाणं बहूणं पियविप्पओगाणं बहूणं दुक्ख-दोमणस्साणं आभागिणो भविस्संति अनादियं च णं अणवयग्गं दीहमद्धं चाउरंत-संसार-कंतारं भुज्जो-भुज्जो अनुपरियट्ठिस्संति, ते नो सिज्झिस्संति नो बुज्झिस्संति जाव नो सव्वदुक्खाणमंतं करिस्संति, एस तुला एस पमाणे एस समोसरणे पत्तेयं तुला पत्तेयं पमाणे पत्तेयं समोसरणे,...

तत्थ णं जे ते समणमाहणा एवमाइक्खंति जाव परुवेत्ति- सव्वे पाणा सव्वे भूया सव्वे जीवा सव्वे सत्ता न हंतव्वा न अज्जावेयव्वा न परिधेतव्वा न परितावेयव्वा न किलामेयव्वा न उद्वेयव्वा ते नो आगंतु छेयाए ते नो आगंतु भेयाए ते नो आगंतु जाइ-जरा-मरण-जोणि-जम्मण-संसार-पुनब्भव-गब्भवास-भवपवंच-कलंकलीभागिणो भविस्संति, ते नो बहूणं दंडणाणं नो बहूणं मुंडणाणं जाव नो बहूणं दुक्ख-दोमणस्साणं नो भागिणो भविस्संति, अनाइयं च णं अनवयग्गं दीहमद्धं चाउरंत-संसार-कंतारं भुज्जो-भुज्जो नो अनुपरियट्ठिस्संति ते सिज्झिस्संति जाव सव्वदुक्खाणं अंतं करिस्संति ।

[६७४] इच्चेतेहिं बारसहिं किरियाठाणेहिं वट्टमाणा जीवा नो सिज्झिंसु नो बुज्झिंसु नो मुच्चिंसु नो परिनिव्वाइंसु नो सव्वदुक्खाणं अंतं करेसुं वा नो करेत्ति वा नो करिस्संति वा, एयंसि चेव तेरसमे किरियाठाणे वट्टमाणा जीवा सिज्झिंसु बुज्झिंसु मुच्चिंसु परिनिव्वाइंसु सव्वदुक्खाणं अंतं करेसुं वा करेत्ति वा करिस्संति वा । एवं से भिक्खू आयट्ठी आयहिए आयगुत्ते आयजोगी आयपरक्कमे आयरक्खिए आयानुकंपए आयनिप्फेडए आयाणमेव पडिसाहरेज्जासि । त्ति बेमि

मुनि दीपरत्नसागरेण संशोधितः सम्पादितश्च “बीअं अज्झयणं समत्तं”

सुयक्खंधो-२, अज्झयणं-३, उद्देशो-

० तइयं अज्झयणं- आहारपरिण्णा ०

[६७५] सुयं मे आउसं! तेणं भगवया एवमक्खायं- इह खलु आहारपरिण्णा नामज्झयणे, तस्स णं अयमट्ठे, इह खलु पाईणं वा पडीणं वा उदीणं वा दाहिणं वा सव्वओ सव्वावंति च णं लोगंसि चत्तारि बीयकाया एवमाहिज्जंति, तं जहाः-

अग्गबीया मूलबीया पोरबीया खंधबीया, तेसिं च णं अहाबीएणं अहावगासेणं इहेगइया सत्ता पुढविजोणिया पुठविसंभवा पुढविवुक्कमा तज्जोणिया तस्संभवा तदुवक्कमा कम्मोवगा कम्मनियाणेणं तत्थवुक्कमा नानाविह-जोणियासु पुढवीसु रूक्खत्ताए विउट्ठंति,...

ते जीवा तासिं नानाविहजोणियाणं पुढवीणं सिनेहमाहारंति, ते जीवा आहारंति पुढविसरीरं आउसरीरं तेउसरीरं वाउसरीरं वणस्सइसरीरं, नानाविहाणं तसथावराणं पाणाणं सरीरं अचित्तं कुव्वंति परिविद्धत्थं तं सरीरं पुव्वाहारियं तयाहारियं विपरिणयं सारुवियकडं संतं,

अवरे वि य णं तेसिं पुढविजोणियाणं रुक्खाणं सरीरा नानावण्णा नानागंधा नानारसा नाना फासा नाना-संठाणसंठिया नानाविहसरीरपोग्गलविउच्चिया ते जीवा कम्मोववण्णगा भवंति त्ति मक्खायं

[६७६] अहावरं पुरक्खायं- इहेगइया सत्ता रुक्खजोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोवगा कम्मनियाणेणं तत्थवुक्कमा पुढविजोणिएहिं रुक्खेहिं रुक्खत्ताए विउट्ठंति, ते जीवा तेसिं पुढविजोणियाणं रुक्खाणं सिनेहमाहारंति, ते जीवा आहारंति पुढविसरीरं आउसरीरं तेउसरीरं वाउसरीरं वणस्सइसरीरं परिविद्धत्थं तं सरीरं पुच्चाहारियं तयाहारियं विपरिणयं सारुविकडं संतं,

अवरे वि य णं तेसिं रुक्खजोणियाणं रुक्खाणं सरीरा नानावण्णा नानागंधा नानारसा नानाफासा नानासंठाणसंठिया नानाविहसरीरपोग्गलविउच्चिया ते जीवा कम्मोववन्नगा भवंति त्ति मक्खायं

[६७७] अहावर पुरक्खायं- इहेगइया सत्ता रुक्खजोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोवगा कम्मनियाणेणं तत्थवुक्कमा रुक्खजोणिएसु रुक्खत्ताए विउट्ठंति, ते जीवा तेसिं रुक्खजोणियाणं रुक्खाणं सिनेहमाहारंति,

ते जीवा आहारंति पुढविसरीरं आउसरीरं तेउसरीरं वाउसरीरं वणस्सइसरीरं तसथावराणं पाणाणं सरीरं अचित्तं कुच्चंति परिविद्धत्थं तं सरीरं पुच्चाहारियं तयाहारियं विपरिणामियं सारुविकडं संतं,

अवरे वि य णं तेसिं रुक्खजोणियाण रुक्खाणं सरीरा नानावण्णा नानागंधा नानारसा नानाफासा नानासंठाण-संठिया नानाविह-सरीरपोग्गलविउच्चिया ते जीवा कम्मोववन्नगा भवंति त्ति मक्खायं ।

[६७८] अहावरं पुरक्खायं- इहेगइया सत्ता रुक्खजोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोवगा कम्मनियाणेणं तत्थवुक्कमा रुक्खजोणिएसु रुक्खेसु मूलत्ताए कंदत्ताए खंधत्ताए तयत्ताए सालत्ताए पवालत्ताए पत्तत्ताए पुप्फत्ताए फलत्ताए बीयत्ताए विउट्ठंति, ते जीवा तेसिं रुक्खजोणियाणं रुक्खाणं सिनेहमाहारंति ।

ते जीवा आहारंति पुढविसरीरं आउसरीरं तेउसरीरं वाउसरीरं वणस्सइसरीरं नानाविहाणं तसथावराणं पाणाणं सरीरं अचित्तं कुच्चंति परिविद्धत्थं तं सरीरं जाव सारुविकडं संतं ।

सुयक्खंधो-२, अज्झायणं-३, उट्ठेसो-

अवरे वि य णं तेसिं रुक्खजोणियाणं मूलाणं कंदाणं खंधाणं तयाणं सालाणं पवालाणं जाव बीयाणं सरीरा नानावण्णा नानागंधा जाव नानाविहसरीरपोग्गलविउच्चिया ते जीवा कम्मोववन्नगा भवंति त्ति मक्खायं ।

[६७९] अहावरं पुरक्खायं-इहेगइया सत्ता रुक्खजोणिया रुक्खसंभवा रुक्खवुक्कमा तज्जोणिया तस्संभवा तदुवक्कमा कम्मोववन्नगा कम्मनियाणेणं तत्थवुक्कमा रुक्खजोणिएहिं रुक्खेहिं अज्झारोहत्ताए विउट्ठंति, ते जीवा तेसिं रुक्खजोणियाणं रुक्खाणं सिनेहमाहारंति-

ते जीवा आहारंति पुढविसरीरं जाव सारुविकडं संतं, अवरे वि य णं तेसिं रुक्ख-जोणियाणं अज्झारोहाणं सरीरा नानावण्णा जाव मक्खायं ।

[६८०] अहावरं पुरक्खायं- इहेगइया सत्ता अज्झारोहजोणिया अज्झारोहसंभवा जाव कम्मनियाणेणं तत्थवुक्कमा रुक्खजोणिएसु अज्झारोहेसु अज्झारोहत्ताए विउट्ठंति, ते जीवा तेसिं रुक्खजोणियाणं अज्झारोहाणं सिनेहमाहारंति-

ते जीवा आहारैति पुढविसरीरं जाव सारुविकडं संतं, अवरे वि य णं तेसिं अज्झारोहजोणियाणं अज्झारोहाणं सरीरा नानावण्णा जाव त्ति मक्खायं ।

[६८१] अहावरं पुरक्खायं - इहेगतिया सत्ता अज्झारोहजोणिया अज्झारोहसंभवा जाव कम्मनियाणेणं तत्थवुक्कमा अज्झारोहजोणिएसु अज्झारोहेसु अज्झारोहत्ताए विउट्ठंति, ते जीवा तेसिं अज्झारोह-जोणियाणं अज्झारोहाणं सिनेहमाहारैति-

ते जीवा आहारैति पुढविसरीरं आउसरीरं जाव सारुविकडं संतं, अवरेऽवि य णं तेसिं अज्झारोहजोणियाणं अज्झारोहाणं सरीरा नानावण्णा जाव मक्खायं ।

[६८२] अहावरं पुरक्खायं-इहेगइया सत्ता अज्झारोहजोणिया अज्झारोहसंभवा जाव कम्मनियाणेणं तत्थवुक्कमा अज्झारोहजोणिएसु अज्झारोहेसु मूलत्ताए जाव बीयत्ताए विउट्ठंति,

ते जीवा तेसिं अज्झारोहजोणियाणं अज्झारोहाणं सिनेहमाहारैति जाव अवरेऽवि य णं तेसिं अज्झारोहजोणियाणं मूलाणं जाव बीयाणं सरीरा नानावण्णा जाव मक्खायं ।

[६८३] अहावरं पुरक्खायं- इहेगइया सत्ता पुढविजोणिया पुढविसंभवा पुढविवक्कमा जाव नानाविहजोणियासु पुढवीसु तणत्ताए विउट्ठंति, ते जीवा तेसिं नानाविहजोणियाणं पुढवीणं सिनेहमाहारैति जाव ते जीवा कम्मोववन्नगा भवंति त्ति मक्खायं ।

[६८४] एवं पुढविजोणिएसु तणेसु तणत्ताए विउट्ठंति, जाव मक्खायं ।

[६८५] एवं तणजोणिएसु तणेसु तणत्ताए विउट्ठंति, तणजोणियं तणसरीरं च आहारैति जाव एवमक्खायं ।

एवं ओसहीणवि चत्तारि आलावगा ।

एवं हरियाणवि चत्तारि आलावगा ।

[६८६] अहावरं पुरक्खायं- इहेगइया सत्ता पुढविजोणिया पुढविसंभवा जाव कम्मनियाणेणं तत्थवुक्कमा नानाविहजोणियासु पुढवीसु आयत्ताए वायत्ताए कायत्ताए कुहणत्ताए कुंदकत्ताए उव्वेहनियत्ताए

निव्वेहनियत्ताए सच्छत्ताए छत्तगत्ताए वासानियत्ताए कूरत्ताए विउट्ठंति, ते जीवा तासिं नानाविहजोणियाणं पुढवीणं सिनेहमाहारैति-
सुयक्खंधो-२, अज्झायणं-३, उद्देसो-

ते जीवा आहारैति पुढविसरीरं जाव संतं, अवरेऽवि य णं तेसिं पुढविजोणियाणं आयत्ताणं जाव कूराणं सरीरा नानावण्णा जाव मक्खायं, एक्को चेव आलावगो जहा पुढविजोणियाणं रुक्खाणं चत्तारि गमा, अज्झारुहाण वि तहेव, तणाणं ओसहीणं हरियाणं चत्तारि आलावगा, भाणियव्वा एक्केक्के।

अहावरे पुरक्खायं इहेगतिया सत्ता उदगजोणिया उदगसंभवा जाव कम्मनियाणेणं तत्थवुक्कमा नानाविहजोणिएसु उदएसु उदगत्ताए अवगत्ताए पनगत्ताए सेवालत्ताए कलंबुगत्ताए हडताए कसेरुगत्ताए कच्छभाणियत्ताए उप्पलत्ताए पउमत्ताए कुमुयत्ताए नलिनत्ताए सुभगत्ताए सोगंधियत्ताए पौंडरीयमहापौंडरीयत्ताए सयपत्तताए सहस्सपत्तताए एवं कल्हारकोंकणयत्ताए अरविंदत्ताए नामरसत्ताए भिसभिसमुणालपुक्खलत्ताए पुक्खलच्छिमगत्ताए विउट्ठंति,

ते जीवा तेसिं नानाविहजोगियाणं उदगाणं सिनेहमाहारंति, ते जीवा आहारंति पुढवीसरीरं जाव संतं, अवरेऽवि य णं तेसिं उदग जोगियाणं उदगाणं जाव पुक्खलच्छिभगाणं सरीरा नानावण्णा जाव मक्खायं, एगो चव आलावगो । सेसा तिन्नी नत्थि ।

अहावरं पुरक्खायं- इहेगइया सत्ता उदगजोगिया उदगसंभवा जाव कम्मनियाणेणं तत्थ- वुक्कमा नानाविहजोगिएसु उदएसु रुक्खत्ताए विउट्ठंति, ते जीवा तेसिं नानाविहजोगियाणं उदगाणं सिनेहमाहारंति- ते जीवा आहारंति पुढविसरीरं जाव संतं, अवरेऽवि य णं तेसिं उदगजोगियाणं रुक्खाणं सरीरा नानावण्णा जाव मक्खायं ।

[६८७] अहावरं पुरक्खायं इहेगतिया सत्ता तेसिं चव पुढवीजोगिएहिं रुक्खेहिं रुक्खजोगिएहिं रुक्खेहिं रुक्खजोगिएहिं मूलेहिं जाव बीएहिं रुक्खजोगिएहिं अज्झारोहेहिं अज्झारोहजोगणइएहिं अज्झारुहेहिं अज्झारोहजोगिएहिं मूलेहिं जाव बीएहिं, पुढवीजोगिएहिं तणेहिं तणजोगिएहिं मूलेहिं जाव बीएहिं, पुढवी जोगिएहिं तणेहिं तणजोगिएहिं मूलेहिं जाव बीएहिं एवं ओसहीहिवि तिन्नि आलावगा । एवं हरिएहिवि तिन्नि आलावगा ।

पुढवीजोगिएहि वि आएहिं काएहिं जाव कूरेहिं उदगजोगिएहिं रुक्खेहिं रुक्खजोगणइएहिं रुक्खेहिं रुक्खजोगिएहिं मूलेहिं जाव बीएहिं एवं अज्झारुहेहिवि तिन्नि तणेहिंपि तिन्नि आलावगा, ओसहीहिंपि तिन्नि, हरिएहिंपि तिन्नि, उदगजोगिएहिं उदएहिं अवएहिं जाव पुक्खलच्छिभएहिं तसपाणत्ताए विउट्ठंति।

ते जीवा तेसिं पुढवीजोगियाणं उदगजोगियाणं रुक्खजोगियाणं अज्झारोहजोगियाणं तणजोगियाणं ओसहीजोगियाणं हरियजोगियाणं रुक्खाणं अज्झारुहाणं तणाणं ओसहीणं हरियाणं मूलाणं जाव बीयाणं आयाणं कायाणं जाव कुरवाणं उदगाणं अवगाणं जाव पुक्खलच्छिभगाणं सिनेहमाहारंति ।

ते जीवा आहारंति पुढवीसरीरं जाव संतं, अवरेऽवि य णं तेसिं रुक्खजोगियाणं अज्झारोहजोगियाणं तणजोगियाणं ओसहियजोगियाणं हरियजोगियाणं मूलजोगियाणं कंदजोगियाणं जाव बीयजोगियाणं आयजोगियाणं कायजोगियाणं जाव कूरजोगियाणं उदगजोगियाणं अवगजोगियाणं जाव पुक्खलच्छिभजोगियाणं तसपाणाणं सरीरा नानावण्णा जाव मक्खायं ।

[६८८] अहावरं पुरक्खायं नानाविहाणं मनुस्साणं तं जहा- कम्मभूमगाणं अकम्मभूमगाणं अंतरदीवगाणं आरियाणं मिलक्खूणं तेसिं च णं अहाबीएणं अहावगासेणं इत्थीए पुरिसस्स य कम्मकडाए

सुयक्खंधो-२, अज्झयणं-३, उद्देसो-

जोगिए एत्थ णं मेहुणवत्तियाए नामं संजोगे समुप्पज्जइ ते दुहओ वि सिनेहं संचिणंति, तत्थ णं जीवा इत्थित्ताए पुरिसत्ताए नपुंसगत्ताए विउट्ठंति,

ते जीवा माउओयं पिउसुक्कं तदुभय-संसट्ठं कलुसं किब्बिसं तप्पढमयाए आहारमाहारंति, तओ पच्छा जं से माया नानाविहाओ रसविहीओ आहारमाहारंति तओ एगदेसेणं ओयमाहारंति आनुपुव्वेणं वुड्ढा पलिपागमणुपवण्णा तओ कायाओ अभिनिवट्टमाणा इत्थिं वेगया जनयंति पुरिसं वेगया जनयंति नपुंसगं वेगया जनयंति

ते जीवा डहरा समाणा माउक्खीरं सप्पिं आहारंति आनुपुव्वेणं वुड्ढा ओयणं कुम्मासं तसथावरे य पाणे, ते जीवा आहारंति पुढविसरीरं जाव सारुविकडं संतं, अवरेऽवि य णं तेसिं नानाविहाणं

मनुस्सागाणं कम्मभूमगाणं अकम्मभूमगाणं अंतरद्दीवगाणं आरियाणं मिलक्खूणं सरीरा नानावण्णा जाव भवन्ति त्ति मक्खायं ।

[६८९] अहावरं पुरक्खायं नानाविहाणं जलचराणं पंचिदिय तिरिक्खजोणियाणं तं जहा- मच्छाणं जाव सुंसुमाराणं तेसिं च णं अहाबीएणं अहावगासेणं इत्थीए पुरिसस्स य कम्म कडाए तहेव जाव एगदेसेणं ओयमाहारैति आनुपुव्वेणं वुड्ढा पलिपागमनुपवण्णा तओ कायाओ अभिनिवट्टमाणा अंडं वेगया जनयन्ति पोयं वेगया जनयन्ति, से अंडे उब्भिज्जमाणे इत्थिं वेगया जनयन्ति पुरिसं वेगया जनयन्ति नपुंसगं वेगया जनयन्ति, ते जीवा डहरा समाणा आउसिणेहमाहारैति अनुपुव्वेणं वुड्ढा वणस्सइकायं तसथावरे य पाणे, ते जीवा आहारैति पुढविसरीरं जाव संतं, अवरेऽवि य णं तेसिं नानाविहाणं जलचरपंचिदिय- तिरिक्खजोणियाणं मच्छाणं जाव सुंसुमाराणं सरीरा नानावण्णा जाव मक्खायं

अहावरं पुरक्खायं- नानाविहाणं चउप्पयथलयर पंचिदिय तिरिक्खजोणियाणं, तं जहा- एगखुराणं दुखुराणं गंडीपदाणं सणप्फयाणं, तेसिं च णं अहाबीएणं अहावगासेणं इत्थीए पुरिसस्स य कम्म जाव मेहुणवत्तिए नामं संजोगे समुप्पज्जइ, ते दुहओ वि सिनेहं संचिणंति, तत्थ णं जीवा इत्थित्ताए पुरिसत्ताए नपुंसगत्ताए जाव विउट्टंति ते जीवा माओउयं पिउसुक्कं एवं जहा मणुस्साणं इत्थिं वेगया जनयन्ति पुरिसं वेगया जनयन्ति नपुंसगं वेगया जनयन्ति, ते जीवा डहरा समाणा माउक्खीरं सप्पिं आहारैति आनुपुव्वेणं वुड्ढा वणस्सइकायं तसथावरे य पाणे, ते जीवा आहारैति पुढविसरीरं जाव संतं, अवरे वि य णं तेसिं नानाविहाणं चउप्पयथलचर पंचिदियतिरिक्खजोणियाणं एगखुराणं दुखुराणं गंडीपदाणं सणप्फयाणं सरीरा नानावण्णा जाव मक्खायं ।

अहावरं पुरक्खायं नानाविहाणं उरपरिसप्प थलयर पंचिदियतिरिक्खजोणियाणं, तं जहा अहीणं अयगराणं आसालियाणं महोरगाणं, तेसिं च णं अहाबीएणं अहावगासेणं इत्थीए पुरिसस्स जाव एत्थ णं मेहुणवत्तियाए० एवं तं चेव, नाणत्तं अंडं वेगया जनयन्ति पोयं वेगया जनयन्ति, से अंडे उब्भिज्जमाणे इत्थिं वेगया जनयन्ति पुरिसं वेगया जनयन्ति नपुंसगं वेगया जनयन्ति, ते जीवा डहरा समाणा वाउकायमाहारैति आनुपुव्वेणं वुड्ढा वणस्सइकायं तसथावरे य पाणे, ते जीवा आहारैति पुढविसरीरं जाव संतं, अवरे वि य णं तेसिं नानाविहाणं उरपरिसप्प थलचर पंचिदियतिरिक्खजोणियाणं अहीणं जाव महोरगाणं सरीरा नानावण्णा नानागंधा जाव मक्खायं ।

अहावरं पुरक्खायं नानाविहाणं भुयपरिसप्प थलचरपंचिदिय तिरिक्खजोणियाणं तं जहा गोहाणं नउलाणं सीहाणं सरडाणं सल्लाणं सरवाणं खराणं घरकोइलियाणं विस्संभराणं मूसगाणं मंगुसाणं सुयक्खंधो-२, अज्झयणं-३, उट्टेसो-

पयलाइयाणं बिरालियाणं जोहाणं चाउप्पाइयाणं, तेसिं च णं अहाबीएणं अहावगासेणं इत्थीए पुरिसस्स य जहा उरपरिसप्पाणं तथा भाणियव्वं, जाव सारूविकडं संतं, अवरेऽवि य णं तेसिं नानाविहाणं भुयपरिसप्प थलचर पंचिदिय तिरिक्खजोणियाणं तं जहा- गोहाणं जाव मक्खायं ।

अहावरं पुरक्खायं नानाविहाणं खहचर पंचिदिय तिरिक्खजोणियाणं तं जहा- चम्मपक्खीणं लोमपक्खीणं समुग्गपक्खीणं विततपक्खीणं तेसिं च णं अहाबीएणं अहावगासेणं इत्थीए जहा उरपरिसप्पाणं, नाणत्तं ते जीवा डहरा समाणा माउगात्तसिणेहमाहारैति आनुपुव्वेणं वुड्ढा वणस्सतिकायं तसथावरे य पाणे, ते जीवा आहारैति पुढविसरीरं जाव संतं, अवरेऽवि य णं तेसिं नानाविहाणं खहचर पंचिदिय तिरिक्खजोणियाणं चम्मपक्खीणं जाव मक्खायं ।

[६९०] अहावरं पुरक्खायं- इहेगइया सत्ता नानाविहजोणिया नानाविहसंभवा नानाविहवुक्कमा तज्जोणिया तस्संभवा तदुवक्कमा कम्मोवगा कम्मनियाणेणं तत्थवुक्कमा नानाविहाणं तसथावराणं पोग्गलाणं सरीरेसु वा सचित्तेसु वा अचित्तेसु वा अनुसूयत्ताए विउट्ठंति,

ते जीवा तेसिं नानाविहाणं तसथावराणं पाणाणं सिनेहमाहारंति, ते जीवा आहारंति पुढविसरीरं जाव संतं, अवेरेऽ वि य णं तेसिं तसथावरजोणियाणं अनुसूयगाणं सरीरा नानावण्णा जाव मक्खायं । एवं दुरूवसंभवत्ताए । एवं खुरदुगत्ताए ।

[६९१] अहावरं पुरक्खायं- इहेगइया सत्ता नानाविहजोणिया जाव कम्मनियाणेणं तत्थवुक्कमा नानाविहाणं तसथावराणं पाणाणं सरीरेसु सचित्तेसु वा अचित्तेसु वा तं सरीरगं वायसंसिद्धं वा वायसंगहियं वा वायपरिग्गहियं उड्ढंवाएसु उड्ढंभागी भवइ अहोवाएसु अहेभागी भवइ तिरियवाएसु तिरियभागी भवइ, तं जहाः-

ओसा हिमए महिया करए हरतणुए सुद्धोदए, ते जीवा तेसिं नानाविहाणं तसथावराणं पाणाणं सिनेहमाहारंति, ते जीवा आहारंति पुढविसरीरं जाव संतं, अवेरेऽवि य णं तेसिं तसथावरजोणियाणं ओसाणं जाव सुद्धोदगाणं सरीरा नानावण्णा जाव मक्खायं ।

अहावरं पुरक्खायं- इहेगइया सत्ता उदगजोणिया उदगसंभवा जाव कम्मनियाणेणं तत्थवुक्कमा तसथावरजोणिएसु उदएसु उदगत्ताए विउट्ठंति, ते जीवा तेसिं तसथावरजोणियाणं उदगाणं सिनेहमाहारंति, ते जीवा आहारंति पुढविसरीरं जाव संतं, अवेरेऽवि य णं तेसिं उदगजोणियाणं उदगाणं सरीरा नानावण्णा जाव मक्खायं ।

अहावरं पुरक्खायं- इहेगइया सत्ता उदगजोणिया जाव कम्मनियाणेणं तत्थवुक्कमा उदगजोणिएसु उदएसु तसपाणत्ताए विउट्ठंति, ते जीवा तेसिं उदगजोणियाणं उदगाणं सिनेहमाहारंति, ते जीवा आहारंति पुढविसरीरं जाव संतं, अवेरेऽवि य णं तेसिं उदगजोणियाणं तसपाणाणं सरीरा नानावण्णा जाव मक्खायं ।

अहावरं पुरक्खायं इहेगइया सत्ता नानाविहजोणिया जाव कम्मनियाणेणं तत्थवुक्कमा नानाविहाणं तसथावराणं पाणाणं सरीरेसु सचित्तेसु वा अचित्तेसु वा अगनिकायत्ताए विउट्ठंति, ते जीवा तेसिं नाना विहाणं तसथावराणं पाणाणं सिनेहमाहारंति, ते जीवा आहारंति पुढविसरीर जाव संतं अवेरेऽविय णं तेसिं उदगजोणियाणं तसपाणाणं सरीरा नानावण्णा जाव मक्खायं ।

[६९२] अहावरं पुरक्खायं-इहेगइया सत्ता नानाविहजोणिया जाव कम्मनियाणेणं तत्थवुक्कमा सुयक्खंधो-२, अज्झयणं-३, उट्ठेसो-

नानाविहाणं तसथावराणं पाणाणं सरीरेसु सचित्तेसु वा अचित्तेसु वा अगनिकायत्ताए विउट्ठंति, ते जीवा तेसिं नानाविहाणं तसथावराणं पाणाणं सिनेहमाहारंति, ते जीवा आहारंति पुढविसरीरं जाव संतं, अवेरेऽवि य णं तेसिं तसथावरजोणियाणं अगणीणं सरीरा नानावण्णा जाव मक्खायं, सेसा तिन्नि आलावगा जहा उदगाणं ।

अहावरं पुरक्खायं इहेगतिया सत्ता नानाविहजोणियाणं जाव कम्मनियाणेणं तत्थवुक्कमा नानाविहाणं तसथावराणं पाणाणं सरीरेसु सचित्तेसु वा अचित्तेसु वा वाउक्कायत्ताए विउट्ठंति, जहा अगणीणं तथा भाणियच्चा चत्तारि गमा ।

[६९३] अहावरं पुरक्खायं इहेगतिया सत्ता नानाविहजोणिया जाव कम्मनियणेणं तत्थवुक्कमा नानाविहाणं तसथावराणं पाणाणं सरीरेसु सचित्तेसु वा अचित्तेसु वा पुढवीत्ताए सक्करत्ताए वालुयत्ताए, इमाओ गाहाओ अनुगंतच्चाओ ।

[६९४] पुढवी य सक्करा वालुया य, उवले सिला य लोणूसे ।

अय तउय तंब सीसग रूप्प सुवण्णे य वइरे य ॥

[६९५] हरियाले हिंगुलुंए मनोसिला सासगंजनपवाले ।

अब्भपडलब्भवालुय, बायरकाए मणिविहाणा ॥

[६९६] गोमेज्जए य रुयए, अंके फलिहे य लोहियक्खे य ।

मरगय मसारगल्ले, भुयमोयग इदंणीले य ॥

[६९७] चंदन गेरुय हंसगब्भ पुलए सोगंधिए य बोद्धच्चे ।

चंदप्पभ वेरुलिए, जलकंते सूरकंते य ॥

[६९८] एयाओ एएसु भणियच्चाओ गाहाओ जाव सूरकंतत्ताए विउट्टंति ते जीवा तेसिं नानाविहाणं तसथावराणं पाणाणं सिनेहमाहारंति, ते जीवा आहारंति पुढविसरीरं जाव संतं, अवरेऽ वि य णं तेसिं तसथावरजोणियाणं पुढवीणं जाव सूरकंताणं सरीरा नानावण्णा जाव मक्खायं, सेसा तिन्नि आलावगा जहा उदगाणं ।

[६९९] अहावरं पुरक्खायं-सच्चे पाणा सच्चे भूया सच्चे जीवा सच्चे सत्ता नानाविहजोणिया नानाविहसंभवा नानाविहवुक्कमा सरीरजोणिया सरीरसंभवा सरीरवुक्कमा सरीराहारा कम्मोवगा कम्मनियाणा कम्मगइया कम्मठिइया कम्मणा चेव विप्परियासमुवेति । से एवमायाणह से एवमायाणित्ता आहारगुत्ते समिए सहिए सया जए त्ति बेमि ।

मुनि दीपरत्नसागरेण संशोधितः सम्पादितश्च “तइयं अज्झयणं समत्तं”

0 चउत्थं अज्झयणं- पच्चक्खाणकिरिया 0

[७००] सुयं मे आउसं! तेणं भगवया एवमक्खायं- इह खलु पच्चक्खाणकिरियानामज्झयणे तस्स णं अयमद्दे- आया अपच्चक्खाणी यावि भवइ आया अकिरियाकुसले यावि भवइ आया मिच्छासंठिए यावि भवइ आया एगंतदंडे यावि भवइ आया एगंतबाले यावि भवइ आया एगंतसुत्ते यावि भवइ आया अवियार-मन-वयण-कायवक्के यावि भवइ, आया अप्पडिहयपच्चक्खाय-पावक्कमे यावि भवइ, एस खलु भगवया अक्खाए असंजए अविरए अप्पडिहयपच्चक्खाय-पावक्कमे सकिरिए सुयक्खंधो-२, अज्झयणं-४, उद्देसो-

असुंवरडे एगंतदंडे एगंतबाले एगंतसुत्ते, से बाले अवियार-मन-वयण-काय-वक्के सुविणमवि न पस्सइ, पावे य से कम्मे कज्जइ ।

[७०१] तत्थ चोयए पन्नवगं एवं वयासी- असंतएणं मणेणं पावएणं असंतियाए वईए पावियाए असंतएणं काएणं पावएणं अहणंतस्स अमणक्खस्स अवियार-मन-वयण-काय-वक्कस्स सुविणमवि अपस्सओ पावे कम्मे नो कज्जइ कस्स णं तं हेउं ?

चोयए एवं ब्रवीति- अन्नयरेणं मणेणं पावएणं मनवत्तिए पावे कम्मे कज्जइ, अन्नयरीए वईए पावियाए वइवत्तिए पावे कम्मे कज्जइ, अन्नयरेणं काएणं पावएणं कायवत्तिए पावे कम्मे कज्जइ,

हणंतस्स समनक्खस्स सवियार-मन-वयण-काय-वक्कस्स सुविणमवि पासओ एवंगुणजातीयस्स पावे कम्मे कज्जइ ।

पुनरवि चोयए एवं ब्रवीति- तत्थ णं जे ते एवमाहंसु- असंतएणं मणेणं पावएणं असंतियाए वईए पावियाए असंतएणं काएणं पावएणं अहणंतस्स अमनक्खस्स अवियार-मनवयण-काय-वक्कस्स सुविणमवि अपस्सओ पावे कम्मे कज्जइ, तत्थ णं जे ते एवमाहंसु मिच्छं ते एवमाहंसु

तत्थ पन्नवए चोयग एवं वयासी- तं सम्मं जं मए पुवं वुत्तं, असंतएणं मणेणं पावएणं असंतियाए वईए पावियाए असंतएणं काएणं पावएणं अहणंतस्स अमनक्खस्स अवियार मन-वयण-काय-वक्कस्स सुविणमवि अपस्सओ पावे कम्मे कज्जइ, तं सम्मं, कस्स णं तं हेउं ?

आचार्य आह- तत्थ खलु भगवया छज्जीवणिकाया हेऊ पन्नत्ता, तं जहा-पुढविकाइया जाव तसकाइया, इच्चेतेहिं छहिं जीवणिकाएहिं आया अप्पडिहयपच्चक्खाय-पावकम्मे निच्चं पसढ-विओवात-चित्त-दंडे, तं जहा पाणाइवाए जाव परिग्गहे कोहे जाव मिच्छादंसणसल्ले,

आचार्य आह- तत्थ खलु भगवया वहए दिट्ठंते पन्नत्ते से जहानामए वहए सिया गाहावइस्स वा गाहावइपुत्तस्स वा रण्णो वा रायपुरिस्स वा खणं निद्दाय पविसिस्सामि खणं लद्घूण वहिस्सामित्ति पहारेमाणे से किं नु हु नाम से वहए तस्स वा गाहावइस्स गाहावइपुत्तस्स वा रण्णो वा रायपुरिस्स वा खणं निद्दाय पविसिस्सामि खणं लद्घूणं वहिस्सामित्ति पहारेमाणे दिया वा राओ वा सुत्ते वा जागरमाणे वा अमित्तभूए मिच्छासंठिए निच्चं पसढ-विओवायचित्तदंडे भवइ, ? एवं वियागरेमाणे समियाए वियागरे ? चोयए- हंता भवइ ।

आचार्य आह- जहा से वहए तस्स गाहावइस्स वा गाहावइपुत्तस्स वा रण्णो वा रायपुरिस्स वा खणं निद्दाय पविसिस्सामि खणं लद्घूणं वहिस्सामित्ति पहारेमाणे दिया वा राओ वा सुत्ते वा जागरमाणे वा अमित्तभूए मिच्छासंठिए निच्चं पसढ-विओवाय-चित्तदंडे० एवामेव बाले वि सव्वेसिं पाणाणं जाव सव्वेसिं सत्ताणं दिया वा राओ वा सुत्ते वा जागरमाणे वा अमित्तभूए मिच्छासंठिए निच्चं पसढ-विओवाय-चित्तदंडे, तं जहा-पाणाइवाए जाव मिच्छादंसणसल्ले,

एवं खलु भगवया अक्खाए असंजए अविरए अप्पडिहय पच्चक्खाय पावकम्मे सकिरिए असुंवडे एगंतदंडे एगंतबाले एगंतसुत्ते यावि भवइ, से बाले अवियार मन-वयण-काय- वक्के सुविणमणि न पस्सइ पावे य से कम्मे कज्जइ ।

जहा से वहए तस्स वा गाहावइस्स जाव तस्स वा रायपुरिस्स पत्तेयं-पत्तेयं चित्तं समादाए दिया वा राओ वा सुत्ते वा जागरमाणे वा अमित्तभूए मिच्छासंठिए निच्चं पसढविओवाय चित्तदंडे भवइ

सुयक्खंधो-२, अज्झयणं-४, उद्देसो-

एवमेव बाले सव्वेसिं पाणाणं जाव सव्वेसिं सत्ताणं पत्तेयं-पत्तेयं चित्तं समादाए दिया वा राओ वा सुत्ते वा जागरमाणो वा अमित्तभूए मिच्छासंठिए निच्चं पसढ-विओवाय-चित्तदंडे भवइ ।

[७०२] नो इण्ठे सम्भे- इह खलु बहवे पाणा० जे इमेणं सरीरसमुस्सएणं नो दिट्ठा वा सुया वा नाभिमया वा विण्णाया वा जेसिं नो पत्तेयं-पत्तेयं चित्तं समादाय दिया वा राओ वा सुत्ते वा जागरमाणे वा अमित्तभूए मिच्छासंठिए निच्चं पसढ-विओवाय- चित्तदंडे तं जहा- पाणाइवाए जाव मिच्छादंसणसल्ले ।

[७०३] आचार्य आह-तत्थ खलु भगवया दुवे दिट्ठता पन्नत्ता तं जहा- सन्निदिट्ठंते य असन्निदिट्ठंते य, से किं तं सन्निदिट्ठंते ? जे इमे सन्निपंचिदिया पज्जत्तगा एतेसिं णं छज्जीवनिकाए पडुच्चं, तं जहा पुढवीकायं जाव तसकायं, से एगइओ पुढविकाएणं किच्चं करेइ वि कारवेइ वि तस्स णं एवं भवइ-

एवं खलु अहं पुढविकाएणं किच्चं करेमि वि कारवेमि वि, नो चेव णं से एवं भवइ- इमेण वा इमेण वा से एतेणं पुढविकाएणं किच्चं करेइ वि कारवेइ वि से य तओ पुढविकायाओ असंजय-अविरय-अप्पडिहय पच्चक्खाय-पावक्कमे यावि भवइ,

एवं जाव तसकाएत्ति भाणियव्वं ।

से एगइओ छज्जीवनिकाएहिं किच्चं करेइ वि कारवेइ वि, तस्स णं एवं भवइ एवं खलु छज्जीवनिकाएहिं किच्चं करेमि वि, कारवेमि वि नो चेव णं से एवं भवइ- इमेहिं वा, इमेहिं वा से य तेहिं छहिं जीविकाएहिं किच्चं करेइ वि कारवेइ वि, से य तेहिं छहिं जीविकाएहिं असंजय-अविरय-अप्पडिहय पच्चक्खाय-पावक्कमे तं जहा- पाणाइवाए जाव मिच्छादंसणसल्ले,

एस खलु भगवया अक्खाए अस्संजए अविरए अप्पडिहय-पच्चक्खाए-पावक्कमे सुविणमणि न पस्सइ पावे य से कम्ममे कज्जइ से तं सन्नि दिट्ठंते ।

से किं तं असन्निदिट्ठंते ? जे इमे असण्णिणो पाणा तं जहा- पुढविकाइया जाव वणस्सइकाइया छद्वा वेगइया तसा पाणा, जेसिं नो तक्काइ वा सण्णा इ वा पण्णा इ वा मणे इ वा वई इ वा सयं वा करणाए अन्नेहिं वा कारवेत्तए करंतं वा समणुजाणित्तए, तेऽवि णं बाला सव्वेसिं पाणाणं जाव सव्वेसिं सत्ताणं दिया वा राओ वा सुत्ते वा जागरमाणा अमित्तभूया मिच्छासंठिया निच्चं पसढ-विओवाय चित्तदंडा तं जहा पाणाइवाए जाव मिच्छादंसणसल्ले, इच्चेवं जाव नो चेव मनो नो चेव वई पाणाणं [भूयाणं जीवाणं] सत्ताणं दुक्खणयाए सोयणयाए जूरणयाए तिप्पणयाए पिट्ठणयाए परितप्पणयाए ते दुक्खण-सोयण जाव परितप्पण-वह-बंध-परिकिलेसाओ अप्पडिविरया भवंति ।

इति खलु ते असण्णिणोऽवि सत्ता अहोनिंसिं पाणाइवाए उवक्खाइज्जंति जाव अहोनिंसिं परिग्गहे उवक्खाइज्जंति जाव मिच्छादंसणसल्ले उवक्खाइज्जंति, सव्वजोणिया वि खलु सत्ता-सन्निणो हुच्चा असन्निणो होंति असन्निणो हुच्चा सन्निणो होंति होच्चा सन्नी, अदुवा असण्णी तत्थ से अविचिता अविघूणिता असंमुच्छित्ता अननुतावित्ता असन्निकायाओ वा सन्निकाय संकमंति सन्निकायाओ वा असन्नीकायं संकमंति सन्निकायाओ वा सन्निकायं संकमंति असन्निकायाओ वा असन्निकायं संकमंति,

जे एए सन्नी वा असण्णी वा सव्वे ते मिच्छायारा निच्चं पसढ-विओवाय चित्तदंडा तं जहा-

सुयक्खंधो-२, अज्झयणं-४, उद्देसो-

पाणाइवाए जाव मिच्छदंसणसल्ले, एवं खलु भगवया अक्खाए असंजए अविरए अप्पडिहय-पच्चक्खाय-पावक्कमे सकिरिए असंवुडे एगंतदंडे एगंतबाले एगंतसुत्ते से बाले अवियार मन वयण काय- वक्के सुविणमवि न पासइ पावे य से कम्ममे कज्जइ ।

[७०४] चोयगः- ते किं कुव्वं कि कारवं कहां संजय-विरय-पडिहय-पच्चक्खाय-पावक्कमे भवइ ? आचार्य आह- तत्थ खलु भगवया छज्जीवनिकायाहेऊ पण्णत्ता, तं जहा- पुढवीकाइया जाव तसकाइया,...

से जहानामए मम अस्सातं दंडेण वा अट्टीण वा मुट्टीण वा लेलुणा वा कवालेण वा आतोडिज्जमाणस्स वा जाव उवद्धविज्जमाणस्स वा जाव लोमुक्खणणमायमवि हिंसाकारगं दुक्खं भयं पडिसंवेदेमि ।

इच्चेवं जाण सव्वे पाणा जाव सव्वे सत्ता दंडेण वा जाव कवालेण वा आतोडिज्जमाणा वा हम्ममाणा वा तज्जिज्जमाणा वा तालिज्जमाणा वा जाव उवद्धविज्जमाणा वा जाव लोमुक्खणणमायमवि हिंसाकारगं दुक्खं भयं पडिसंवेदेतिं,

एवं नच्चा सव्वे पाणा जाव सव्वे सत्ता न हंतव्वा न उद्धवेयव्वा, एस धम्मं धुवे निइए सासए समेच्च लोगं खेत्तण्णेहिं पवेइए, एवं से भिक्खू विरए पाणाइवायाओ जाव मिच्छादंसणसल्लाओ, से भिक्खू नो दंतपक्खालणेणं दंते पक्खालेज्जा नो अंजनं नो वमनं नो घूवणेत्तं पिआइए, से भिक्खू अकिरिए अलूसए अकोहे [अमाने अमाए] अलोभे उवसंते परिनिव्वुडे एस खलु भगवया अक्खाए संजय-विरय-पडिहय-पच्चक्खाय-पावकम्मं अकिरिए संवुडे एगंतपंडिए यावि भवइ - त्ति बेमि ।

मुनि दीपरत्नसागरेण संशोधितः सम्पादितश्च ““चउत्थं अज्झयणं समत्तं”

0 पंचमं अज्झयणं- आयारसुयं 0

- [७०५] आदाय बंभचेरं च आसुपण्णे इमं वइं ।
अस्सिं धम्मं अनायारं नायरेज्ज कयाइ वि ॥
- [७०६] अनादीयं परिण्णाय अनवदग्गं ति वा पुणो ।
सासयमसासए वा, इइ दिट्ठिं न धारए ॥
- [७०७] एएहिं दोहिं ठाणेहिं, ववहारो न विज्जई ।
एएहिं दोहिं ठाणेहिं, अनायारं तु जाणए ॥
- [७०८] समुच्छिज्जिहिंति सत्थारो, सव्वे पाणा अनेलिसा ।
गंठिगा वा भविस्संति, सासयं ति व नो वए ॥
- [७०९] एएहिं दोहिं ठाणेहिं, ववहारो न विज्जई ।
एएहिं दोहिं ठाणेहिं, अनायारं तु जाणए ॥
- [७१०] जे केइ खुइडगा पाणा, अदुवा संति महालया ।
सरिसं तेहिं वेरं ति, असरिसं ति य नो वए ॥
- [७११] एएहिं दोहिं ठाणेहिं ववहारो न विज्जई ।

सुयक्खंधो-२, अज्झयणं-५, उद्देसो-

- एएहिं दोहिं ठाणेहिं अनायारं तु जाणए ॥
- [७१२] अहाकम्माणि भुंजंति, अन्नमन्ने सकम्मुणा ।
उवलित्ते त्ति जाणिज्जा, अनुवलित्ते त्ति वा पुणो ॥
- [७१३] एएहिं दोहिं ठाणेहिं, ववहारो न विज्जई ।
एएहिं दोहिं ठाणेहिं, अनायारं तु जाणए ॥
- [७१४] जं इदं ओरालमाहारं, कम्मगं च तमेव य ।

- सव्वत्थ वीरियं अत्थि, नत्थि सव्वत्थ वीरियं ॥
 [७१५] एएहिं दोहिं ठाणेहिं, ववहारो न विज्जई ।
 एएहिं दोहिं ठाणेहिं अनायारं तु जाणए ॥
 [७१६] नत्थि लोए अलोए वा, नेवं सण्णं निवेसए ।
 अत्थि लोए अलोए वा, एवं सण्णं निवेसए ॥
 [७१७] नत्थि जीवा अजीवा वा, नेवं सण्णं निवेसए ।
 अत्थि जीवा अजीवा वा, एवं सण्णं निवेसए ॥
 [७१८] नत्थि धम्मे अधम्मे वा, नेवं सण्णं निवेसए ।
 अत्थि धम्मे अधम्मे वा, एवं सण्णं निवेसए ॥
 [७१९] नत्थि बंधे व मोक्खे वा, नेवं सण्णं निवेसए ।
 अत्थि बंधे व मोक्खे वा, एवं सण्णं निवेसए ॥
 [७२०] नत्थि पुण्णे व पावे वा, नेवं सण्णं निवेसए ।
 अत्थि पुण्णे व पावे वा, एवं सण्णं निवेसए ॥
 [७२१] नत्थि आसवे संवरे वा, नेवं सण्णं निवेसए ।
 अत्थि आसवे संवरे वा, एवं सण्णं निवेसए ॥
 [७२२] नत्थि वेयणा निज्जरा वा, नेवं सण्णं निवेसए ।
 अत्थि वेयणा निज्जरा वा, एवं सण्णं निवेसए ॥
 [७२३] नत्थि किरिया अकिरिया वा, नेवं सण्णं निवेसए ।
 अत्थि किरिया अकिरिया वा, एवं सण्णं निवेसए ॥
 [७२४] नत्थि कोहे व माने वा, नेवं सण्णं निवेसए ।
 अत्थि कोहे व माने वा, एवं सण्णं निवेसए ॥
 [७२५] नत्थि माया व लोभे वा, नेवं सण्णं निवेसए ।
 अत्थि माया व लोभे वा, एवं सण्णं निवेसए ॥
 [७२६] नत्थि पेज्जे व दोसे वा, नेवं सण्णं निवेसए ।
 अत्थि पेज्जे व दोसे वा एवं सण्णं निवेसए ॥
 [७२७] नत्थि चाउरंते संसारे, नेवं सण्णं निवेसए ।
 अत्थि चाउरंते संसारे, एवं सण्णं निवेसए ॥
 [७२८] नत्थि देवो व देवी वा, नेवं सण्णं निवेसए ।

सुयक्खंधो-२, अज्झयणं-५, उद्देसो-

- अत्थि देवो व देवी वा, एवं सण्णं निवेसए ॥
 [७२९] नत्थि सिद्धी असिद्धी वा, नेवं सण्णं निवेसए ।
 अत्थि सिद्धी असिद्धी वा, एवं सण्णं निवेसए ॥
 [७३०] नत्थि सिद्धी नियं ठाणं, नेवं सण्णं निवेसए ।
 अत्थि सिद्धी नियं ठाणं, एवं सण्णं निवेसए ॥
 [७३१] नत्थि साहू असाहू वा, नेवं सण्णं निवेसए ।

- अत्थि साहू असाहू वा, एवं सण्णं निवेसए ॥
 [७३२] नत्थि कल्लाणे पावे वा, नेवं सण्णं निवेसए ।
 अत्थि कल्लाणे पावे वा, एवं सण्णं निवेसए ॥
 [७३३] कल्लाणे पावए वा वि, ववहारो न विज्जइ ।
 जं वेरं तं न जाणंति, समणा बाल पंडिया ॥
 [७३४] असेसं अक्खयं वावि सव्वं दुक्खे ति वा पुणो ।
 वज्झा पाणा अवज्झ त्ति, इति वायं न नीसिरे ॥
 [७३५] दीसंति समियायारा, भिक्खुणो साहुजीविणो ।
 एए मिच्छोवजीवंत्ति, इति दिट्ठिं न धारए ॥
 [७३६] दक्खिणाए पडिलंभो, अत्थि वा नत्थि वा पुणो ।
 न वियागरेज्ज मेहावी, संतिमग्गं च बूहए ॥
 [७३७] इच्चेएहिं ठाणेहिं, जिने दिट्ठेहिं संजए ।
 धारयंते उ अप्पाणं आमोक्खए परिव्वएज्जासि । त्ति बेमि ॥

मुनि दीपरत्नसागरेणं संशोधितः सम्पादितश्च “पंचमं अज्झयणं समत्तं”

० छट्ठं अज्झयणं- अद्दइज्जं ०

- [७३८] पुराकडं अद्द ! इमं सुणेह, एगंतचारी समणे पुरासी ।
 से भिक्खूणो उवनेत्ता अनेगे, आइक्खतिण्हं पुढो वित्थरेणं ॥
 [७३९] साऽजीविया पढ्वियाऽथिरेणं, सभागओ गणओ भिक्खुमज्झो ।
 आइक्खमाणो बहुजन्नमत्थं, न संधयाई अवरेण पुव्वं ॥
 [७४०] एगंतमेव अदुवा वि इण्हिं, दोऽवण्णमन्नं न समेति जम्हा ।
 पुव्विं च इण्हिं च अनागयं च, एगंतमेव पडिसंधयाइ ॥
 [७४१] समेच्च लोगं तसथावराणं, खेमंकरे समणे माहणे वा ।
 आइक्खमाणो वि सहस्समज्झो, एगंतयं सारयई तहच्चे ॥
 [७४२] धम्मं कहंतस्स उ नत्थि दोसो, खंतस्स दंतस्स जिइंदियस्स ।
 भासाय दोसे य विवज्जगस्स, गुणे य भासाय निसेवगस्स ॥
 [७४३] महव्वए पंच अणुव्वए य, तहेव पंचासव संवरे य ।
 विरइं इहस्सामणियंमि पण्णे, लवावसक्की समणे त्ति बेमि ॥

सुयक्खंधो-२, अज्झयणं-६, उद्देसो-

- [७४४] सीओदगं सेवउ बीयकायं, आहायकम्मं तह इत्थियाओ ।
 एगंतचारिस्सिह अम्ह धम्मे, तवस्सिणो नाभिसमेइ पावं ॥
 [७४५] सीओदगं वा तह बीयकायं, आहायकम्मं तह इत्थियाओ ।
 एयाइं जाणं पडिसेवमाणा, अगारिणो अस्समणा भवंति ॥
 [७४६] सिया य बीयोदग इत्थियाओ, पडिसेवमाणा समणा भवंतु ।
 अगारिणोऽवि समणा भवंतु, सेवंति उ तेऽवि तहप्पगारं ॥

- [७४७] जे यावि बीओदगभोइ भिक्खू, भिक्खं विहं जायइ जीवयट्ठी ।
ते नाइसंजोगमविप्पहाय, काओवगा नंतकरा भवंति ॥
- [७४८] इमं वयं तु तुम पाउकुव्वं, पावाइणो गरहसि सव्व एव ।
पावाइणो पुढो किट्ठयंता, सयं सयं दिट्ठि करैति पाउं ॥
- [७४९] ते अन्नमन्नस्स उ गरहमाणा, अक्खंति भो समणा माहणा य ।
सतो य अत्थी असतो य नत्थी, गरहामो दिट्ठीं न गरहामो किंचि ॥
- [७५०] न किंचि रूवेणऽभिधारयामो, सदिट्ठिमग्गं तु करेमो पाउं ।
मग्गे इमे किट्ठिए आरिएहिं, अनुत्तरे सप्पुरिसेहिं अंजू ॥
- [७५१] उड्ढं अहे य तिरियं दिसासु, तसा य जे थावर जे य पाणा ।
भूयाभिसंकाए दुगुंछमाणे, नो गरहइ बुसिमं किंचि लोए ॥
- [७५२] आगंतगारे आरामगारे, समणे उ भीते न उवेइ वासं ।
दुक्खा हु संती बहवे मणुस्सा, ऊनातिरित्ता य लवालवा य ॥
- [७५३] मेहाविणो सिक्खियं बुद्धिमंता, सुत्तेहिं अत्थेहि य निच्छयण्णू ।
पुच्छंसु मा णे अनगार अन्ने इति संकमाणो न उवेइ तत्थ ॥
- [७५४] नो कामकिच्चा न य बालकिच्चा, रायाभियोगेण कुओ भएण ? ।
वियागरेज्जा पसिणं न वा वि, सकामकिच्चेणिह आरियाणं ॥
- [७५५] गंता च तत्था अदुवा अगंता, वियागरेज्जा समियाऽऽसुपण्णे ।
अनारिया दंसणओ परित्ता, इति संकमाणो न उवेइ तत्थ ॥
- [७५६] पण्णं जहा वणिए उदयट्ठी, आयस्स हेउं पगरेइ संगं ।
तओवमे समणे नायपुत्ते, इच्चेव मे होइ मई वियक्का ॥
- [७५७] नवं न कुज्जा विहुणे पुराणं, चिच्चाऽमइं ताइ य साह एवं ।
एत्तावता बंभवति त्ति वुत्ते, तस्सोदयट्ठी समणे त्ति बेमि ॥
- [७५८] समारभंते वणिया भूयगामं, परिग्गहं चेव ममायमाणा ।
ते नाइसंजोगमविप्पहाय, आयस्स हेउं पगरैति संगं ॥
- [७५९] वित्तेसिणो मेहुणसंपगाढा, ते भोयणट्ठा वणिया वयंति ।
वयं तु कामेसु अज्झोववन्ना अनारिया पेमरसेसु गिद्धा ॥
- [७६०] आरंभगं चेव परिग्गहं च, अविउस्सिया निस्सिय आयदंडा ।
तेसिं च से उदए जं वयासी, चउरंतनंताय दुहाय नेह ॥

सुयक्खंधो-२, अज्झयणं-६, उद्देसो-

- [७६१] नेगंत नच्चंतिव ओदए सो, वयंति ते दो वि गुणोदयंमि ।
से उदए साइमनंतपत्ते, तमुदयं साहयइ ताइ नाई ॥
- [७६२] अहिंसयं सव्वपयाणुकंपी, धम्ममे ठियं कम्मविवेगहेउं ।
तमायदंडेहि समायरंता, अबोहिए ते पडिरूवमेयं ॥
- [७६३] पिन्नागपिंडीमवि विद्ध सूले, केई पएज्जा पुरिसे इमे त्ति ।
अलाउयं वा वि कुमारए त्ति, स लिप्पई पाणिवहेण अम्हं ॥

- [७६४] अहवावि विद्वूण मिलक्खु सूले, पिन्नागबुद्धीए नरं पएज्जा ।
कुमारगं वा वि अलाबुयंति न लिप्पई पाणिवहेण अम्हं ॥
- [७६५] पुरिसं च विद्वूण कुमारगं वा, सूलंमि केइ पए जायतेए ।
पिन्नाय पिंडं सइमारूहेत्ता, बुद्धाणं तं कप्पइ पारणाए ॥
- [७६६] सिणायगाणं तु दुवे सहस्से, जे भोयए नितिए भिक्खुयाणं ।
ते पुन्नखंधं सुमहं जिणित्ता, भवंति आरोप्प महंतसत्ता ॥
- [७६७] अजोगरुवं इह संजयाणं, पावं तु पाणाण पसज्झ काउं ।
अबोहिए दोण्ह वि तं असाहु, वयंति जे यावि पडिस्सुणंति ॥
- [७६८] उड्ढं अहे यं तिरियं दिसासु, विन्नाय लिंगं तसथावराणं ।
भूयाभिसंकाए दुगुंछमाणे, वदे करेज्जा व कुओ विहऽत्थि ? ॥
- [७६९] पुरिसे त्ति विन्नत्ति न एवमत्थि, अनारिए से पुरिसे तहा हु ।
को संभवो ? पिन्नगपिंडियाए, वाया वि एसा बुइया असच्चा ॥
- [७७०] वायाभियोगेण जमावहेज्जा, नो तारिसं वायमुदाहरेज्जा ।
अट्टाणमेयं वयणं गुणाणं, नो दिक्खिए बूय सुरालमेयं ॥
- [७७१] लद्धे अहट्ठे अहो एव तुब्भे, जीवानुभागे सुविचिंतिते य ।
पुव्वं समुद्धं अवरं च पुट्ठे, ओलोइए पाणितले ठिए वा ॥
- [७७२] जीवानुभागं सुविचिंतयंता, आहारिया अण्णविहीय सोहिं ।
न वियागरे छन्नपओपजीवी, एसोऽनुधम्मो इह संजयाणं ॥
- [७७३] सिणाय गाणं तु दुवे सहस्से, जे भोयए नितिए भिक्खुयाणं ।
असंजए लोहियपाणि से ऊ, नियच्छई गरिहमिहेव लोए ॥
- [७७४] थूलं उरब्भं इह मारियाणं, उद्धिद्धभत्तं च पगप्पएत्ता ।
तं लोणतेल्लेण उवक्खडेत्ता, सपिप्पलीयं पगरंति मंसं ॥
- [७७५] तं भुंजमाणा पिसियं पभूयं, नो उवलिप्पामो वयं रएणं ।
इच्चेवमाहंसु अणज्जधम्मो, अनारिया बाल रसेसु गिद्धा ॥
- [७७६] जे यावि भुंजंति तहप्पगारं, सेवंति ते पावमजाणमाणा ।
मनं न एयं कुसला करंति, वाया वि एसा बुइया उ मिच्छा ॥
- [७७७] सव्वेसिं जीवाण दयद्वयाए, सावज्जदोसं परिवज्जयंता ।
तस्संकिणो इसिणो नायपुत्ता, उद्धिद्धभत्तं परिवज्जयंति ॥

सुयक्खंधो-२, अज्झयणं-६, उद्देसो-

- [७७८] भूयाभिसंकाए दुगुंछमाणा सव्वेसिं पाणाण निहाय दंडं ।
तम्हा न भुंजंति तहप्पगारं, एसोऽनुधम्मो इह संजयाणं ॥
- [७७९] निग्गंथधम्मंमि इमा समाही, अस्सिं सुठिच्चा अनिहे चरेज्जा ।
बुद्धे मुनी सीलगुणोववेए, अच्चत्थतं पाउणई सिलोगं ॥
- [७८०] सिणायगाणं तु दुवे सहस्से, जे भोयए नियए माहणाणं ।
ते पुन्नखंधं सुमहज्जणित्ता, भवंति देवा इइ वेयवाओ ॥

- [७८१] सिणायगाणं तु दुवे सहस्से, जे भोयए नितिए कुलालयाणं ।
से गच्छई लोलुवसंपगाढे, तिच्चाभितावी नरगाभिसेवी ॥
- [७८२] दयावरं धम्म दुगुंछमाणा, वहावहं धम्म पसंसमाणा, ।
एगं पि जे भोययती असीलं, निवो निसं जाति कुओ सुरेहिं ? ॥
- [७८३] दुहओवि धम्मंमि समुट्टियाओ, अस्सिं सुट्टिच्चा तह एस कालं ।
आयारसीले बुइएह नाणे, न संपरायंमि विसेसमत्थि ॥
- [७८४] अक्खत्तरूवं पुरिसं महंतं, सनातनं अक्खयमव्वयं च ।
सव्वेसु भूएसु वि सव्वओ से, चंदो व ताराहिं समत्तरूवे ॥
- [७८५] एवं न मिज्जंति न संसरंति, न माहणा खत्तिय-वेस-पेसा ।
कीडा य पक्खी य सरीसिवा य, नरा य सव्वे तह देवलोगा ॥
- [७८६] लोगं अयाणित्तिहं केवलेणं कहंति जे धम्ममजाणमाणा ।
नासंति अप्पाणं परं च नट्ठा, संसार घोरंमि अनोरपारे ॥
- [७८७] लोगं विजाणंतिहं केवलेणं, पुण्णेण नाणेण समाहिजुत्ता ।
धम्मं समत्तं च कहंति जे उ, तारंति अप्पाण परं च तिण्णा ॥
- [७८८] जे गरहियं ठाणमिहावसंति, जे यावि लोए चरणोववेया ।
उदाहडं तं तु समं मईए, अहाउसो विप्परियासमेव ॥
- [७८९] संवच्छरेणावि य एगमेगं, बाणेण मारेउ महागयं तु ।
सेसाण जीवाण दयइयाए, वासं वयं वित्तिं पक्कयामो ॥
- [७९०] संवच्छरेणावि य एगमेगं, पाणं हणंता अनियत्तदोसा ।
सेसाण जीवाण वहेण लग्गा, सिया य थोवं गिहिणोऽवि तम्हा ॥
- [७९१] संवच्छरेणावि य एगमेगं, पाणं हणंता समणव्वएसु ।
आयाहिए से पुरिसे अणज्जे, न तारिसं केवलिणो भणंति ॥
- [७९२] बुद्धस्स आणाए इमं समाहिं, अस्सिं सुट्टिच्चा तिविहेण ताई ।
तरिउं समुद्धं व महाभवोघं आयाणवं धम्ममुदाहरेज्जा ॥- त्ति बेमि

मुनि दीपरत्नसागरेण संशोधितः सम्पादितश्च “छट्टं अज्झयणं समत्तं”

◦ सत्तमं अज्झयणं- नालंदइज्जं ◦

[७९३] तेणं कालेणं तेणं समएणं रायगिहे नामं नयरे होत्था, रिद्धत्थिमियसमिद्धे,वण्णओ

सुयक्खंधो-२, अज्झयणं-७, उट्टेसो-

जाव पडिरूवे, तस्स णं रायगिहस्स नयरस्स बहिया उत्तरपुरत्थिमे दिसीभाए एत्थ णं
नालंदा नामं बाहिरिया होत्था, अनेग भवन सयसण्णिविद्धा [पासादीया दरिसणीया अभिरूवा] पडिरूवा ।

[७९४] तत्थ णं नालंदाए बाहिरियाए लेवे नामं गाहावई होत्था, अइडे दित्ते वित्ते
विच्छिन्न-विपुल-भवन-सयनासन-जाणवाहणाइण्णे बहुधन-बहुजायरूवरजए आओगपओग-संपउत्ते
विच्छड्डिय-पउर-भत्तपाणे बहुदासी-दास-गो-महिस गवेलयप्पभूए बहुजनस्स अपरिभूए यावि होत्था ।

से णं लेवे नामं गाहावई समणोवासए यावि होत्था, अभिगय-जीवाजीवे जाव विहरइ, निग्गंथे पावयणे निस्संकिए निककंखिए निव्वित्तिगिच्छे लद्धे गहियेठे पुच्छियेठे विनिच्छियेठे अभिगहियेठे अट्ठिमिंजपेम्माणुरागरत्ते,

अयमाउसो! निग्गंथे पावयणे अट्ठे अयं परमट्ठे सेसे अनट्ठे, ऊसियफलिहे अवंगुयदुवारे अप्पावय दुवारे चियत्तंतंउरप्पवेसे चाउद्धसद्धमुद्धिद्ध-पुण्णमासिणीसु पडिपुण्णं पोसहं सम्मं अनुपालेमाणे समणे निग्गंथे तहाविहेणं एसणिज्जेणं असन-पान-खाइम-साइमेणं पडिलाभेमाणे बहूहिं सीलव्वय-गुण-वेरमण-पच्चकखाण-पोसहोववासेहिं अप्पाणं भावेमाणे विहरइ ।

[७९५] तस्स णं लेवस्स गाहावइस्स नालंदाए बाहिरियाए उत्तरपुरत्थिमे दिसिभाए एत्थ णं सेसदविया नामं उदगसाला होत्था, अनेगखंभसय सन्निविट्ठा पासादीया जाव पडिरूवा, तीसे णं सेसदवियाए उदगसालाए उत्तरपुरत्थिमे दिसिभाए, एत्थ णं हत्थिजामे नामं वनसंडे होत्था, किण्हे वण्णओ वनसंडस्स ।

[७९६] तस्सिं च णं गिहपदेसंसि भगवं गोयमे विहरइ, भगवं च णं अहे आरामंसि० अहे णं उदए पेढालपुत्ते भगवं पासावच्चिज्जे नियंठे मेदज्जे गोत्तेणं जेणेव भगवं गोयमे तेणेव उवागच्छइ, उवागच्छित्ता भगवं गोयमं एवं वयासी-

आउसंतो! गोयमा अत्थि खलु मे केई पदेसे पुच्छियव्वे, तं च आउसो! अहासुयं अहादरिसियं मे वियागरेहिं सवायं, भगवं गोयमे उदयं पेढालपुत्तं एवं वयासी अवियाइ आउसो! सोच्चा निसम्म जाणिस्सामो सवायं, उदए पेढालपुत्ते भगवं गोयमं एवं वयासी- ।

[७९७] आउसो! गोयमा अत्थि खलु कुम्मारपुत्तिया नाम समणा निग्गंथा तुम्हाणं पवयणं पवयमाणा गाहावइं समणोवासगं उवसंपन्नं एवं पच्चकखावैति- नन्नत्थ अभिजोगेणं गाहावइ-चोरग्गहण-विमोक्खणयाए तसेहिं पाणेहिं निहाय दंडं, एवं ण्हं पच्चकखंताणं दुप्पच्चकखायं भवइ एवं ण्हं पच्चकखावेमाणेणं दुप्पच्चकखावियव्वं भवइ, एवं ते परं पच्चकखावेमाणेणं अइयरंति सयं पइण्णं, कस्स णं तं हेउं ? संसारिया खलु पाणा- थावरा वि पाणा तसत्ताए पच्चायंति, तसा वि पाणा थावरत्ताए पच्चायंति, थावरकायाओ विप्पमुच्चमाणा तसकायंसि उववज्जंति, तसकायाओ विप्पमुच्चमाणा थावरकायंसि उववज्जंति, तेसिं च णं थावरकायंसि उववन्नाणं ठाणमेयं धत्तं ।

[७९८] एवं ण्हं पच्चकखंताणं सुपच्चकखायं भवइ, एवं ण्हं पच्चकखावेमाणेणं सुपच्चकखावियं भवइ, एवं ते परं पच्चकखावेमाणेणं नाइयरंति सयं पइण्णं, नन्नत्थ अभिओगेणं गाहावइ-चोरग्गहण-विमोक्खणयाए तसभूएहिं पाणेहिं निहाय दंडं, एवं सइ भासाए परकम्मं विज्जमाणे जे ते कोहा वा लोहा वा परं पच्चकखावैति अयं पि नो उवएसे किं नो नेयाउए भवइ, अवियाइं आउसो ! गोयमा तुब्भं पि एयं रोयइ ? ।

सुयकखंधो-२, अज्झयणं-७, उट्ठेसो-

[७९९] सवायं भगवं गोयमे! उदयं पेढालपुत्तं एवं वयासी- आउसंतो! उदगा नो खलु अम्हं एयं रोयइ, जे ते समणा वा माहणा वा एवमाइकखंति जाव परुवैति नो खलु ते समणा वा निग्गंथा वा भासं भासंति, अनुतावियं खलु ते भासं भासंति, अब्भाइकखंति खलु ते समणे समणोवासए वा, जेहिं वि अन्नेहिं पाणेहिं भूएहिं जीवेहिं सत्तेहिं संजमयंति ताणवि ते अब्भाइकखंति, कस्स णं तं हेउं ? संसारिया खलु पाणा, तसा वि पाणा थावरत्ताए पच्चायंति, थावरा वि पाणा तसत्ताए पच्चायंति, तसकायाओ

विप्पमुच्चमाणा थावरकायंसि उववज्जंति, थावरकायाओ विप्पमुच्चमाणा तसकायंसि उववज्जंति, तेसिं च णं तसकायंसि उववन्नाणं ठाणमेयं अधत्तं ।

[८००] सवायं उदए पेढालपुत्ते भगवं गोयमं एवं वयासी- कयरे खलुते आउसंतो गोयमा! तुब्भे वयह तसा पाणा तसा आउ अन्नहा ?, सवायं भगवं गोयमे उदयं पेढालपुत्तं एवं वयासी- आउसंतो उदगा जे तुब्भे वयह तसभूया पाणा तसा ते वयं वदामो तसा पाणा, जे वयं वयामो तसा पाणा ते तुब्भे वदह तसभूया पाणा, एए संति दुवे ठाणा तुल्ला एगद्धा, किमाउसो! इमे भे सुप्पणीयतराए भवइ- तसभूया पाणा तसा, इमे भे दुप्पणीयतराए भवइ- तसा पाणा तसा, तओ एगमाउसो! पलिक्कोसह एककं अभिन्दह, अयं पि भेदो सेनो नेआउए भवइ ।

भगवं च णं उदाहु संतेगइया मनुस्सा भवंति, तेसिं च णं एवं वुत्त पुवं भवइ नो खलु वयं संचाएमो मुंडा भवित्ता अगाराओ अनगारियं पव्वइत्तए, वयं णं अनुपुव्वेणं गोत्तस्स लिस्सिस्सामो, ते एवं संखवेंति ते एवं संखं ठवयंति नन्नत्थ अभिजोगेणं गाहावइ-चोरग्गहण-विमोक्खणयाए तसेहिं पाणेहिं निहाय दंडं, तं पि तेसिं कुसलमेव भवइ ।

[८०१] तसा वि वुच्चंति तसा तससंभारकडेणं कम्मणा नामं च णं अब्भुवगयं भवइ, तसाउयं च णं पलिक्खीणं भवइ, तसकायद्विइया ते तओ आउयं विप्पजहंति, ते तओ आउयं विप्पजहित्ता थावरत्ताए पच्चायंति थावरा वि वुच्चंति थावरा थावरसंभारकडेणं कम्मणा नामं च णं अब्भुवगयं भवइ, थावराउयं च णं पलिक्खीणं भवइ, थावरकायद्विइया ते तओ आउयं विप्पजहंति ते तओ आउयं विप्पजहित्ता भुज्जो पारलोइयत्ताए पच्चायंति, ते पाणा वि वुच्चंति ते तसा वि वुच्चंति ते महाकाया ते चिरद्विइया ।

[८०२] सवायं उदए पेढालपुत्ते भयवं गोयमं एवं वयासी -आउसंतो गोयमा! नत्थि णं से केइ परियाए जं णं समणोवासगस्स एगपाणातिवायविरए वि दंडे निक्खित्ते कस्स णं तं हेउं ? संसारिया खलु पाणा, थावरा वि पाणा तसत्ताए पच्चायंति, तसा वि पाणा थावरत्ताए पच्चायंति, थावरकायाओ विप्पमुच्चमाणा सव्वे तसकायंसि उववज्जंति, तसकायाओ विप्पमुच्चमाणा सव्वे थावरकायंसि उववज्जंति, तेसिं च णं थावरकायंसि उववन्नाणं ठाणमेयं धत्तं । सवायं भगवं गोयमे उदयं पेढालपुत्तं एवं वयासी- नो खलु आउसो! अस्माकं वत्तव्वएणं तुब्भं चए अनुप्पवाएणं अत्थि णं से परियाए जे णं समणोवासगस्स सव्वपाणेहिं सव्वभूएहिं सव्वजीवेहिं सव्वसत्तेहिं दंडे निक्खित्ते भवइ कस्स णं तं हेउं ? संसारिया खलु पाणा, तसा वि पाणा थावरत्ताए पच्चायंति, थावरा वि पाणा तसत्ताए पच्चायंति, तसकायाओ विप्पमुच्चमाणा सव्वे थावरकायंसि उववज्जंति, थावरकायाओ विप्पमुच्चमाणा सव्वे तसकायंसि उव- वज्जंति, तेसिं च णं तसकायंसि उववन्नाणं ठाणमेयं अधत्तं ते पाणा वि वुच्चंति, ते तसा वि वुच्चंति, ते महाकाया ते चिरद्विइया,
सुयक्खंधो-२, अज्झयणं-७, उद्देसो-

ते बहुयरगा पाणा जेहिं समणोवासगस्स सुपच्चक्खायं भवइ, ते अप्पयरागा पाणा जेहिं समणोवासगस्स अपच्चक्खायं भवइ, से महया तसकायाओ उवसंतस्स उवद्वियस्स पडिविरयस्स जं णं तुब्भे वा अन्नो वा एवं वयह- नत्थि णं से केइ परियाए जंसि समणोवासगस्स एगपाणाए वि दंडे निक्खित्ते, अयं पि भेदे से नो नेयाउए भवइ ।

[८०३] भगवं च णं उदाहु नियंठा खलु पुच्छियव्वा- आउसंतो! नियंठा इह खलु संतेगइया मनुस्सा भवंति, तेसिं च णं एवं वुत्तपुव्वं भवइ- जे इमे मुंडे भवित्ता अगाराओ अनगारियं पव्वइत्ता, एएसिं णं आमरणंताए दंडे निक्खित्ते, जे इमे अगारमावसंति एएसिं णं आमरणंताए दंडे नो निक्खित्ते, केई च णं समणा जाव वासाइं चउपंचमाइं छट्ठदसमाइं अप्पयरो वा भुज्जयरो वा देसं दूईज्जित्ता अगारमावसेज्जा ? हंता वसेज्जा, तस्स णं तमगारत्थं वहमाणस्स से पच्चक्खाणे भग्गे भवइ ? नो तिण्ढे समढ्ढे, एवमेव समणोवासगस्स वि तसेहिं पाणेहिं दंडे निक्खित्ते, थावरेहिं पाणेहिं दंडे नो निक्खित्ते तस्स णं तं थावरकायं वहमाणस्स से पच्चक्खाणे नो भंगे भवइ, से एवमायाणह ? नियंठा, से एवमायाणियव्वं ।

भगवं च णं उदाहु नियंठा खलु पुच्छियव्वा आउसंतो नियंठा! इह खलु गाहावइ वा गाहावइपुत्तो वा तहप्पगारेहिं कुलेहिं आगम्म धम्मं सवणवत्तियं उवसंकमेज्जा ? हंता उवसंकमेज्जा, तेसिं च णं तहप्पगाराणं धम्मं आइक्खियव्वे ? हंता आइक्खियव्वे, किं ते तहप्पगारं धम्मं सोच्चा निसम्म एवं वएज्जा- इणमेव निग्गंथं पावयणं सच्चं अनुत्तरं केवलियं पडिपुण्णं नेयाउयं संसुद्धं सल्लगत्तणं सिद्धिमग्गं मुत्तिमग्गं निज्जाणमग्गं निव्वाणमग्गं अवितहं असंदिद्धं सव्वदुक्खप्पहीणमग्गं एत्थं ठिया जीवा सिज्झंति बुज्झंति मुच्चंति परिनिव्वायंति सव्वदुक्खाणमंतं करंति, तं आणाए तहा गच्छामो तहा चिद्धामो तहा निसीयामो तहा तुयट्टामो तहा भुंजामो तहा भासामो तहा अब्भुट्टेमो तहा उट्टाए उट्टेमो त्ति पाणाणं भूयाणं जीवाणं सत्ताणं संजमेणं संजमामो त्ति वएज्जा ? हंता वएज्जा ।

किं ते तहप्पगारा कप्पंति पव्वावेत्तए? हंता कप्पंति, किं ते तहप्पगारा कप्पंति मुंडावेत्तए ? हंता कप्पंति । किं ते तहप्पगारा कप्पंति सिक्खावेत्तए ? हंता कप्पंति । किं ते तहप्पगारा कप्पंति उवट्टावेत्तए ? हंता कप्पंति । किं ते तहप्पगारा कप्पंति उवट्टावेत्तए ? हंता कप्पंति, तेसिं च णं तहप्पगाराणं सव्वपाणेहिं जाव सव्वसत्तेहिं दंडे निक्खित्ते ? हंता निक्खित्ते ।

से णं एयारूवेणं विहारेणं विहरमाणा जाव वासाइं चउपंचमाइं छट्ठदसमाइं वा अप्पयरो वा भुज्जयरो वा देसं दूईज्जित्ता अगारं वएज्जा ? हंता वएज्जा । तस्स णं, सव्वपाणेहिं जावसव्वसत्तेहिं दंडे निक्खित्ते? नोइण्ढे समढ्ढे, से जे से जीवे जस्स परेणं सव्वपाणेहिं जाव सव्वसत्तेहिं दंडे नो निक्खित्ते ।

से जे से जीवे जस्स आरेणं सव्वपाणेहिं जाव सत्तेहिं दंडे निक्खित्ते, से जे से जीवे जस्स इयाणिं सव्वपाणेहिं जाव सत्तेहिं दंडे नो निक्खित्ते भवइ, परेणं अस्संजए आरेणं संजए, इयाणिं अस्संजए, अस्संजयस्स णं सव्वपाणेहिं जाव सत्तेहिं दंडे नो निक्खित्ते भवइ, से एवमायाणह ? नियंठा से एवमायाणियव्वं ।

भगवं च णं उदाहु नियंठा खलु पुच्छियव्वा आउसंतो! नियंठा इह खलु परिव्वाइया वा परिव्वाइयाओ वा अन्नयरेहितो तित्थायतणेहितो आगम्म धम्मसवणवत्तियं उवसंकमेज्जा ? हंता उवसंकमेज्जा ।

किं तेसिं तहप्पगारेणं धम्मं आइक्खियव्वे ? हंता आइक्खियव्वे, तं चेव उवट्टावित्तए जाव सुयक्खंधो-२, अज्झयणं-७, उट्टेसो-

कप्पंति ?, हंता कप्पंति ।

किं ते तहप्पगारा कप्पंति संमुजितए ? हंता कप्पंति, तेणं एयारूवेणं विहारेणं विहरमाणा तं चेव जाव अगारं वएज्जा ? हंता वएज्जा, ते णं तहप्पगारा कप्पंति संमुजित्तए ? नो इण्ढे समढ्ढे ।

से जे से जीवे जे परेणं नो कप्पंति संभुजित्तए, से जे से जीवे आरेणं कप्पति संभुजित्तए, से जे से जीवे जे इयाणि नो कप्पंति संभुजित्तए, परेणं अस्समणे आरेणं, समणे इयाणि अस्समणे, अस्समणेणं सद्धिं नो कप्पति समणाणं निग्गंथाणं संभुजित्तए, सेएवमायाणह ? नियंठा! सेएवमायाणियत्वं ।

[८०४] भगवं च णं उदाहु- संतेगइया समणोवासगा भवंति, तेसिं च णं एवं वुत्तपुत्वं भवइ नो खलु वयं संचाएमो मुंडा भवित्ता अगाराओ अनगारियं पव्वइत्तए, वयं णं चाउद्धसद्धमुद्धिद्वपुण्णमासिणीसु पडिपुण्णं पोसहं सम्मं अनुपालेमाणा विहरिस्सामो, थूलगं पाणाइवायं पच्चकखाइस्सामो, एवं थूलगं मुसावायं थूलगं अदिन्नादाणं थूलगं मेहुणं थूलगं परिग्गहं पच्चकखाइस्सामो, इच्छापरिमाणं करिस्सामो, दुविहं तिविहेणं मा खलु ममद्वाए किंचि वि करेह वा कारवेह वा तत्थ वि पच्चकखाइस्सामो, ते णं अभोच्चा अपिच्चा असिणाइत्ता आसंदीपेढियाओ पच्चोरुहित्ता ते तहा कालगया किं वत्तत्वं सिया सम्मं कालगय त्ति ?

वत्तत्वं सिया, ते पाणा वि वुच्चंति ते तसा वि वुच्चंति ते महाकाया ते चिरद्विइया ते बहुतरगा पाणा जेहिं समणोवासगस्स सुपच्चकखायं भवइ, ते अप्पयरगा पाणा जेहिं समणोवासगस्स अपच्चकखायं भवइ , इति से महयाओ जं णं तुब्भे वयह तं चेव जाव अयंपि भेदे से नो नेयाउए भवइ ।

भगवं च णं उदाहु संतेगइया समणोवासगा भवंति, तेसिं च णं एवं वुत्तपुत्वं भवइ- नो खलु वयं संचाएमो मुंडा भवित्ता अगाराओ अनगारियं जाव पव्वइत्तए, नो खलु वयं संचाएमो चाउद्धसद्धमुद्धिद्वपुण्णमासिणीसु पडिपुण्णं पोसहं सम्मं अनुपालेमाणा विहरित्तए, वयं णं अपच्छिम मारणंतिय संलेहणा झूसणा झूसिया भत्तपानं पडियाइक्खिया जाव कालं अनवकंखमाणा विहरिस्सामो सत्वं पाणाइवायं पच्चकखाइस्सामो जाव सत्वं परिग्गहं पच्चकखाइस्सामो तिविहं तिविहेणं, मा खलु ममद्वाए किंचि वि जाव आसंदीपेढियाओ पच्चोरुहित्ता एते तहा कालगया किं वत्तत्वं सिया सम्मं कालगय त्ति ? वत्तत्वं सिया, ते पाणा वि वुच्चंति जाव अयं पि भेदे से नो नेयाउए भवइ ।

भगवं च णं उदाहु- संतेगइया मनुस्सा भवंति, तं जहा- महिच्छा महारंभा महापरिग्गहा अहम्मिया जाव दुप्पडियानंदा जाव सव्वाओ परिग्गहाओ अप्पडिविरया जावज्जीवाए, जेहिं समणोवासगस्स आयाणसो आमरणंताए दंडे निक्खित्ते ते तओ आउगं विप्पजहंति विप्पजहित्ता भुज्जो सगमादाए दोग्गइगामिणो भवंति, ते पाणा वि वुच्चंति ते तसा वि वुच्चंति ते महाकाया ते चिरद्विइया ते बहुतरगा आयाणसो, इति से महयाओ णं जं णं तुब्भे वदह तं चेव अयंपि भेदे से नो नेयाउए भवइ ।

भगवं च णं उदाहु- संतेगइया मनुस्सा भवंति तं जहा- अनारंभा अपरिग्गहा धम्मिया धम्माणया जाव सव्वाओ परिग्गहाओ पडिविरया जावज्जीवाए, जेहिं समणोवासगस्स आयाणसो आमरणंताए दंडे निक्खित्ते ते तओ आउगं विप्पजहंति विप्पजहित्ता ते तओ भुज्जो सगमादाए सोग्गइगामिणो भवंति, ते पाणा वि वुच्चंति जाव नो नेयाउए भवइ ।

भगवं च णं उदाहु- संतेगइया मणुस्सा भवंति, तं जहा-अप्पिच्छा अप्पारंभा अप्पपरिग्गहा सुयक्खंधो-२, अज्झयणं-७, उद्देसो-

धम्मिया धम्माणया जाव एगच्चाओ परिग्गहाओ अप्पडिविरया, जेहिं समणोवासगस्स आयाणसो आमरणंताए दंडे निक्खित्ते, ते तओ आउगं विप्पजहंति विप्पजहित्ता, तओ भुज्जो सगमादाए सोग्गइगामिणो भवंति, ते पाणा वि वुच्चंति जाव नो नेयाउए भवइ ।

भगवं च णं उदाहु- संतेगइया मनुस्सा भवंति, तं जहा- आरणिया आवसहिया गामनियंतिया कण्हुई रहस्सिया- जेहिं समणोवासगस्स आयाणसो आमरणंताए दंडे निक्खित्ते भवइ- नो बहुसंजया नो बहुपडिविरया सव्वपाणभूय- जीवसत्तेहिं, अप्पणा सच्चामोसाइं एवं विउजंति- अहं न हंतव्वो अण्णं हंतव्वा जाव कालमासे कालं किच्चा अन्नयराइं आसुरियाइं किब्बिसियाइं ठाणाईं जाव उववत्तारो भवंति, तओ विप्पमुच्चमाणा भुज्जो एलमूयत्ताए तमोरूवत्ताए पच्चायंति, ते पाणा वि वुच्चंति जाव नो नेयाउए भवइ ।

भगवं च णं उदाहु- संतेगइया पाणा दीहाउया जेहिं समणोवासगस्स आयाणसो आमरणंताए जाव दंडे निक्खित्ते भवइ, ते पुव्वामेव कालं करंति करेत्ता पारलोइयत्ताए पच्चायंति, ते पाणा वि वुच्चंति ते तसा वि वुच्चंति ते महाकाया ते चिरिद्धिइया ते दीहाउया ते बहुयरगा जेहिं समणोवासगस्स सुपच्चक्खायं भवइ नो नेयाउए भवइ ।

भगवं च णं उदाहु- संतेगइया पाणा समाउया, जेहिं समणोवासगस्स आयाणसो आमरणंताए जाव दंडे निक्खित्ते भवइ, ते सयमेव कालं करंति करेत्ता पारलोइयत्ताए पच्चायंति, ते पाणा वि वुच्चंति ते तसा वि वुच्चंति ते महाकाया ते समाउया ते बहुयरगा जेहिं समणोवासगस्स सुपच्चक्खायं भवइ जाव नो नेयाउए भवइ ।

भगवं च णं उदाहु- संतेगइया पाणा अप्पाउया जेहिं समणोवासगस्स आयाणसो आमरणंताए जाव दंडे निक्खित्ते भवइ, ते पुव्वामेव कालं करंति करेत्ता पारलोइयत्ताए पच्चायंति, ते पाणा वि वुच्चंति ते तसा वि वुच्चंति ते महाकाया ते अप्पाउया ते बहुयरगा पाणा जेहिं समणोवासगस्स सुपच्चक्खायं भवइ जाव नो णनेयाउए भवइ ।

भगवं च णं उदाहु- संतेगइया समणोवासगा भवंति, तेसिं च णं एवं वुत्तपुव्वं भवइ- नो खलु वयं संचाएमो मुंडे भवित्ता जाव पव्वइत्तए, नो खलु वयं संचाएमो चाउद्धसट्ठमुद्धिपुण्णमासिणीसु पडिपुण्णं पोसहं अनुपालित्तए, नो खलु वयं संचाएमो अपच्छिमं जाव विहरित्तए, वयं णं सामाइयं देसावगासियं पुरत्था पाईणं वा पडीणं वा दाहिणं वा उदीणं वा एतावता जाव सव्वपाणेहिं जाव सव्वसत्तेहिं दंडे निक्खित्ते जाव सव्वपाणभूयजीवसत्तेहिं खेमंकरे अहमंसि ।

तत्थ आरेणं जे तसा पाणा जेहिं समणोवासगस्स आयाणसो आमरणंताए दंडे निक्खित्ते, तओ आउं विप्पजहित्ता तत्थ आरेणं चेव जे तसा पाणा, जेहिं समणोवासगस्स आयाणसो जाव तेसु पच्चायंति, जेहिं समणोवासगस्स सुपच्चक्खायं भवइ ते पाणा वि जाव अयं पि भेदे से नो नेयाउए भवइ,

[८०५] तत्थ आरेणं जे तसा पाणा जेहिं समणोवासगस्स आयाणसो आमरणंताए दंडे निक्खित्ते ते तओ आउं विप्पजहंति विप्पजहित्ता तत्थ आरेणं चेव जाव थावरा पाणा जेहिं समणोवासगस्स अट्ठाए दंडे अनिक्खित्ते अणट्ठाए दंडे निक्खित्ते तेसु पच्चायंति, जेहिं समणोवासगस्स अट्ठाए दंडे अनिक्खित्ते अणट्ठाए दंडे निक्खित्ते ते पाणा वि वुच्चंति ते तसा ते चिरिद्धिइया जाव अयं पि भेदे से नो नेयाउए भवइ ।

सुयक्खंधो-२, अज्झयणं-७, उद्देशो-

तत्थ आरेणं जे तसा पाणा जेहिं समणोवासगस्स आयाणसो आमरणंताए दंडे निक्खित्ते ते तओ आउं विप्पजहंति विप्पजहित्ता तत्थ परेणं चेव जे तसा थावरा पाणा जेहिं समणोवासगस्स

आयाणसो आमरणंताए दंडे निक्खित्ते तेसु पच्चायंति तेहिं समणोवासगस्स सुपच्चक्खायं भवइ, ते पाणा वि वुच्चंति जाव अयं पि भेदे से नो नेयाउए भवइ ।

तत्थ आरेणं जे थावरा पाणा जेहिं समणोवासगस्स अट्टाए दंडे अनिक्खित्ते अणट्टाए दंडे निक्खित्ते ते तओ आउं विप्पजहंति विप्पजहित्ता तत्थ आरेणं चेव जे तसा पाणा जेहिं समणोवासगस्स आयाणसो आमरणंताए दंडे निक्खित्ते तेसु पच्चायंति तेहिं समणोवासगस्स सुपच्चक्खायं भवइ ते पाणावि जाव अयं पि भेदे से नो नेयाउए भवइ

तत्थ आरेणं जे थावरा पाणा जेहिं समणोवासगस्स अट्टाए दंडे अनिक्खित्ते अणट्टाए दंडे निक्खित्ते ते तओ आउ विप्पजहंति विप्पजहित्ता ते तत्थ आरेणं चेव जे थावरा पाणा जेहिं समणोवासगस्स अट्टाए दंडे अनिक्खित्ते अणट्टाए दंडे निक्खित्ते तेसु पच्चायंति, तेहि समणोवासगस्स अट्टाए दंडे अनिक्खित्ते अणट्टाए दंडे निक्खित्ते ते पाणा वि जाव अयं पि भेदे से नो नेयाउए भवइ ।

तत्थ आरेणं जे थावरा पाणा जेहिं समणोवासगस्स अट्टाए दंडे अनिक्खित्ते अट्टाए दंडे निक्खित्ते तओ आउं विप्पजहंति विप्पजहित्ता तत्थ परेणं चेव जे तसा थावरा पाणा जेहिं समणोवासगस्स आयाणसो आमरणंताए दंडे निक्खित्ते तेसु पच्चायंति तेहिं समणोवासगस्स सुपच्चक्खायं भवइ, ते पाणा वि जाव अयं पि भेदे से नो नेयाउए भवइ ।

तत्थ परेणं जे तसथावरा पाणा जेहिं समणोवासगस्स आयाणसो आमरणंताए दंडे निक्खित्ते ते तओ आउं विप्पजहंति विप्पजहित्ता तत्थ आरेणं जे तसा पाणा जेहिं समणोवासगस्स आयाणसो आमरणंताए दंडे निक्खित्ते तेसु पच्चायंति, तेहिं समणोवासगस्स सुपच्चक्खायं भवइ, ते पाणावि जाव अयं पि भेदे से नो नेयाउए भवइ ।

तत्थ परेणं जे तसथावरा पाणा जेहिं समणोवासगस्स आयाणसो आमरणंताए दंडे निक्खित्ते ते तओ आउं विप्पजहंति विप्पजहित्ता तत्थ आरेणं जे थावरा पाणा जेहिं समणोवासगस्स अट्टाए दंडे अनिक्खित्ते अणट्टाए दंडे निक्खित्ते तेसु पच्चायंति, तेहिं समणोवासगस्स अट्टाए अनिक्खित्ते अणट्टाए निक्खित्ते जाव ते पाणावि अयं पि भेदे से नो नेयाउए भवइ ।

तत्थ परेणं जे तसथावरा पाणा जेहिं समणोवासगस्स आयाणसो आमरणंताए दंडे निक्खित्ते ते तओ आउं विप्पजहंति विप्पजहित्ता ते तत्थ परेणं चेव जे तसथावरा पाणा जेहिं समणोवासगस्स आयाणसो आमरणंताए दंडे निक्खित्ते तेसु पच्चायंति तेहिं समणोवासगस्स सुपच्चक्खायं भवइ ते पाणा वि जाव अयं पि भेदे से नो नेयाउए भवइ ।

भगवं च णं उदाहु- न एयं भूयं न एयं भव्वं न एयं भविस्सं जं णं- तसा पाणा वोच्छि-ज्जिहंति थावरा पाणा भविस्संति थावरा पाणा वि वोच्छिज्जिहंति तसा पाणा भविस्संति अवोच्छिन्नेहिं तसथावरेहिं पाणेहिं जं णं तुब्भे वा अन्नो वा एवं वदह- नत्थि णं से केइ परियाए जाव नो नेयाउए भवइ ।

[८०६] भगवं च णं उदाहु- आउसंतो! उदगा जे खलु समणं वा माहणं वा परिभासइ मित्ति मन्नइ आगमित्ता नाणं, आगमित्ता दंसणं, आगमित्ता चरित्तं, पावाणं कम्मणं अकरणयाए,से खलु परलोग-

सुयक्खंधो-२, अज्झयणं-७, उट्टेसो-

पलिमंथत्ताए चिद्वइ, जे खलु समणं वा माहणं वा नो परिभासइ मित्ति मन्नइ आगमित्ता नाणं आगमित्ता दंसणं आगमित्ता चरित्तं पावाणं कम्मणं अकरणयाए से खलु परलोगविसुद्धीए चिद्वइ, तए णं से उदए पेढालपुत्ते भगवं गोयमं अनाढायमाणे जामेव दिंसि पाउब्भूए तामेव दिंसिं पहारेत्थ गमणाए ।

भगवं च णं उदाहु आउसंतो उदगा! जे खलु तहाभूतस्स समणस्स वा माहणस्स वा अंतिए एगमवि आरियं धम्मियं सुवयणं सोच्चा निसम्म अप्पणो चेव सुहुमाए पडिलेहाए अनुत्तरं जोगखेमपयं लंभिए समाणे सो वि ताव तं आढाइ परिजाणेइ वंदइ नमंसइ सक्कारेइ सम्माणेइ कल्लाणं मंगलं देवयं चेइयं पज्जुवासइ । तए णं से उदए पेढालपुत्ते भगवं गोयमं एवं वयासी-

एएसि णं भंते! पदाणं पुत्विं अन्नाणयाए असवणायाए अबोहीए अनभिगमेणं अदिट्ठाणं असुयाणं अमुयाणं अविन्नायाणं अव्वोगडाणं अनिगूढाणं अविच्छिन्नाणं अनिसिद्धाणं अनिवूढाणं अनुवहारियाणं एयमद्वं नो सद्दहियं नो पत्तियं नो रोइयं, एएसि णं भंते! पदाणं एण्हं जाणयाए सवणयाए बोहीए जाव उवधारणयाए एयमद्वं सद्दहामि पत्तियामि रोएमि एवामेयं जहा णं तुब्भे वदह,...

तए णं भगवं गोयमे उदगं पेढालपुत्तं एवं वयासी- सद्दाहाहि णं अज्जो! पत्तियाहि णं अज्जो! रोएहि णं अज्जो! एवमेयं जहा णं अम्हे वयामो, तए णं से उदए पेढालपुत्ते भगवं गोयमं एवं वयासी- इच्छामि णं भंते! तुब्भं अंतिए चाउज्जामाओ धम्माओ पंचमहव्वइयं सपडिक्कमणं धम्मं उवसंपज्जित्ताणं विहरित्तए,...

तए णं भगवं गोयमे उदगं पेढालपुत्तं गहाय जेणेव समणे भगवं महावीरे तेणेव उवागच्छइ, उवागच्छइत्ता तए णं से उदए पेढालपुत्ते समणं भगवं महावीरं तिक्खुत्तो आयाहिणं, पयाहिणं करेइ, करेत्ता वंदइ नमंसइ, वंदित्ता नमंसित्ता एवं वयासी- इच्छामि णं भंते! तुब्भं अंतिए चाउज्जामाओ धम्माओ पंचमहव्वइयं सपडिक्कमणं धम्मं उवसंपज्जिता णं विहरित्तए ।

तए णं समणे भावं महावीरे उदयं एवं वयासी- अहासुहं देवाणुप्पिया! मा पडिबंधं करेहि, तए णं से उदए पेढालपुत्ते समणस्स भगवओ महावीरस्स अंतिए चाउज्जामाओ धम्माओ पंचमहव्वइयं सपडिक्कमणं धम्मं उवसंपज्जित्ताणं विहरइ । त्ति बेमि

मुनि दीपरत्नसागरेण संशोधितः सम्पादितश्च “सत्तमं अज्झयणं समत्तं”

0बीइओ सुयखंधो सम्मतो0

२	सूयगडो- बीअं अंगसुत्तं सम्मतं
---	--------------------------------------